

ВИЛЬЯМ ШЕКСПИР

ТАНЛАНГАН АСАРЛАР

Беш жилдлик

Иккинчи жилд

Тошкент

Фафур Фулом номидаги адабиёт ва санъат нашриёти
1981



ҚИРОЛ ЛИР

ҒАФУР ҒУЛОМ
таржимаси

ИШТИРОҚ ЭТУВЧИЛАР

Лир — Британия қироли.

Француз қироли.

Бургунд герцоги.

Корнуэль герцоги.

Альбан герцоги.

Граф Кент.

Граф Глостер.

Эдгар — Глостернинг ўғли.

Эдмунд — Глостернинг никоҳсиз хотинидан бўлган ўғли.

Куран — сарой аъёнларидан бири.

Кекса — Глостер хизматидаги ижарабчи.

Табиб.

Сарой масхабабози.

Освальд — Гонерильянинг саройида эшик оғаси.

Эдмунд қўл остидаги бир офицер.

Корделия атрофидаги аъёнлардан бир оқсуяк.

Худайчи.

Корнуэль герцогининг хизматкорлари..

Гонерилья — }
Регана — }
Корделия — } Лирнинг қизлари..

Лир аъёнларидан рицарлар, лашкарбошилар, чопарлар,
ҳарбийлар, сарой кишилари, хизматкорлар.

I ПАРДА

БИРИНЧИ САҲНА

Кирол Лирнинг саройида таҳт зали.

Кент, Глостер, Эдмунд'кириб келади.

Кент

Менга аввал шундай туюлган эдики, қирол герцог Корнуэлга қараганда, герцог Альбанига кўпроқ майл кўрсатмоқда деб.

Глостер

Ҳаммамизга ҳам шундай туюлган эди. Аммо энди, қироллик тақсим қилинар чоғда, қирол бу икки герцогдан қайси бирини ортиқ кўрганини аниқлаш мумкин бўлмай қолди. Ўртадаги текисликка шунчалик риоя қилинганки, ҳар иккови ҳам бундан ўбданроқ бўлакни танлаб ололмас эди.

Кент

Бу сизининг ўғлингизми, жаноб?

Глостер

Мен бунинг тарбиясини ўз устимга олганман, жаноб. Менга шу тўғрида гапиравериб кўл қизаришга тўғри келган, аммо энди чиниқиб кетдим.

Кент

Сўзларингизни тушуна олмадим.

Глостер

Боки йўқ, аммо бунинг онаси менга жуда яхши тушунар эди: шу тушуници сабабидан ҳам унинг қорни дўмпайиб қолди. Демак, у ўз ётогида эрга эга бўлишдан илгари, бешикда ўғилга эга бўлиб қолди. Бу ҳодисада андаккина гуноҳнинг ҳиди бурқсиганин сезган-дирсиз?

Кент

Модомики ўртада шундай жонон бир мева пайдо бўлган экан, ўша гуноҳ содир бўлгани учун қитти қайғирмайман.

Глостер

Аммо менинг бундан бир ёш катта бошқа ўғлим ҳам бор, у тамоман қонуний, лекин унинг қонунийлиги кўз ўнгимда бўлган қадриний бунга нисбатан баландроқ қилмайди. Гарчи бу маккор ёруғ дунёга ҳали чақирилмасдан бурун, бир оз беадаблик билан шошилиб келган бўлса ҳам, онагинаси гўзал нарса эди. Биз буни каттакон ҳузур-ҳаловатлар билан тайёр қилганмиз: шунинг учун ҳам бу қасангини ўғлим деб иқрор қилишга мажбурман. Эдмунд! Сен бу олижаноб арбобнинг ким эканликларини биласанми?

Эдмунд

Йўқ, жаноб.

Глостер

Бу киши — лорд Кент, ёдингда тут, бу киши менинг энг қадрли дўстим бўлади.

Эдмунд

Мен жаноб олийларнинг хизматларига доим тайёрман.

Кент

Мен сизни бора-бора севиб қолишимга ишонаман. Шунинг учун сизни яқинроқ таниб олишни истар эдим.

Эдмунд

Жаноб, мен муҳаббатингизга сазовор бўлиш учун тиришаман.

Глостер

Бу чет элларда тўққиз йил юриб келди, яқинда яна жўнайди. Қирол шу томонга келмоқда.

Фанфарлар

Лир, Корнуэль, Альбани, Гонерилья, Регана,
Корделия ва аъёнлар чиқиб келадилар: уларнинг орқасидан Лирниг тожини келтирмоқдалар.

Лир

Француз қироли, Бургунд герцоги,
Марҳамат қиласинлар, чақир, Глостер.

Глостер

Хўп, подшоҳим.

Глостер билан Эдмунд чиқиб кетадилар.

Лир

Ҳалигача яширин тутган андишамизни
Очмоқчимиз. Қани менга картани беринг!
Билиб қўйинг: уч тақсимга баравар бўлдик
Биз ҳукмрон бўлиб турган шу қиролликни,
Шу қариган елкамиздан давлат ташвишин
Улоқтириб ташламоққа айладик қарор.
Улим томон оғир юксиз судралиш учун
Барчасини ёш кучларга топширмоқчимиз.
Альбани, сен ўғлимизсан, сен ҳам Корнуэль,
Бизга бўлган муҳаббатинг ундан кам эмас,
Биз қизларга бермак бўлган меросимизни
Шу топдаёқ эълон қилиб қўймоқ истаймиз
Токи сўнгра бошбоштоқлик бўлиб юрмасин.
Французлар, бургундларнинг иккита шоҳи,

Бизнинг икки ёш қизимиз севгисин топниб,
 Меҳмон бўлиб яшамоқда саройимизда,
 Икки ошиқ жавобимиз кутиб мунтазир.
 Қани энди айтиб беринг менинг қизларим,—
 Модомики биз сизларга давлат, еру сув
 Ҳукмронлик иродасин берар эканмиз,
 Қай бирингиз бизни ортиқ севасиз, айтинг?
 Шунга қараб, кимда-кимнинг табиий қадри
 Юксак бўлса, биз беражақ мукофотлар ҳам
 Шу кишига улгуржироқ — кўпроқ бўлади.
 Гонерилъя, бош қизимиз, сен олдин гапир.

Гонерилья

Отажоним!

Сизга бўлган муҳаббатимни
 Қандай қалиб айтиш мумкин оддий сўз билан,
 Кўзда нуру олган нафас, озодлигимдан
 Нимаики қиймат, ноёб ва гўзал бўлса
 Ҳаёт, соғлақ, ҳусну номус барчасидан ҳам
 Бир қиз киши ўз отасин севолганича,
 Бир севгики айтмоқ учун сўз етишмайди,
 Барчасидан юксак қўйиб сизни севаман.

Корделия

(бир чеккага)

Бундан ортиқ қандай қилиб изҳор қиласман?
 Сўзлар билан айтиш қийин муҳаббатимни.

Лир

(Гонерильяга)

Шу ўлкани, бу қирғоқдан у қирғоққача
 Соя-салқин ўрмонлари, ерлари билан
 Жўшқин дарё, алвон-алвон қирлари билан
 Бутуничা, бир умрга сенга топширдим.

Бўғин-бўғин авлодларинг яйраб-яшнасин,
 Қани энди ўртанчи қиз, тантиқ Регана
 Бизга айтар гапларингни айт-чи, тинглаймиз.

Р е г а н а

Олам билан икковимиз бир металлданмиз,
 Қимматимиз баб-баравар. Дил сўзин айтсам,
 Олам айтди сизга бўлган муҳаббатимни.
 Мен ҳам унинг сўзларига бир оз қўшаман:
 Менинг ҳиссим орзу қилса эҳтимол бўлган
 Барча шодлик менинг учун тамом бегона.
 Сизга бўлган муҳаббатим қалбимга роҳат,
 Мана сўзим, шаҳаншоҳим!

К о р д е л и я

(*бир чеккага*)

Вой мен бечора!
 Иўғ-э, нега мен бечора бўлар эканман;
 Муҳаббатим айтадиган сўзимдан устин.

Л и р

(*Реганага*)

Сенга, сенинг авлодингга умрбод мерос
 Мамлакатнинг учдан бирин тортиқ қиласмиш.
 Сенга теккан бу ҳиссанинг уфқи кенглиги,
 Гўзаллиги ва қиммати зарра кам эмас
 Гонерильянинг ҳиссасига теккан бўлакдан.

(*Корделияга қараб*)

Қани сен-чи, қувончимиз, кенжатойимиз
 Катталардан кам бўлмаган овунчогимиз,
 Бургундларнинг қаймоғи-ю, фараанг шароби
 Ўртасида ишқ можаро боиси бўлган
 Қалб эгаси, қани айт-чи, сен нима дейсан?

Опаларинг ҳиссасидан ошиб тушарли,
Қандай сўзинг бор?

Корделия
Ҳеч қандай, шоҳим!

Лир

Ҳеч қандай.

Корделия
Ҳеч қандай.

Лир

Ҳеч қандайдан, ҳеч қандайнин нарса чиқмайди.
Яхши ўйлаб, сўнгра гапир.

Корделия

Афсус кучсизман,
Юрагимни тил учига қўя олмайман...
Сизга менинг жуда қаттиқ муҳаббатим бор,
Бу муҳаббат фарзандлигим бурчидир, холос.
Ана шундан ё зиёда ва ё кам эмас.

Лир

Нима?! Нима! Корделия! Жавобинг тузат,
Иўқса бутун тақдирингни бузиб қўясан.

Корделия

Шаҳаншоҳим,
Менга ҳаёт берган ўзингиз,
Боқиб-кўриб, эркалаган, севгаян ўзингиз.
Мен буларинг барчаси-чун сизга миннатдор,
Хурмат қилиш, жондан севиш менинг вазифам.
Опаларим нима учун эрга тегади,

Модомики сизни шунча яхши кўраркан?
 Ахир, мен ҳам бирор эрга тегмақчи бўлсам,
 Ўз ишқимдан, шафқатимдан анча қисмини
 Ўша ҳаёт йўлдошимга бағишилашим шарт.
 Мен, ҳойнаҳой опаларим сингари фақат
 Сизнигина севиб туриб, эрга чиқмайман.

Л и р

Шу сўзларни чин қалбингдан айтмоқдамисан?

К о р д е л и я

Чин қалбимдан, шаҳанишоҳим.

Л и р

Шунчалик ёш-ку,
 Қалби шунча қотиб кетган.

К о р д е л и я

Ёшликка ёшдир,
 Аммо қалби ҳаққонийлик билан лиммо-лим.

Л и р

Шундай бўлса бўла қолсин; нима қиласди,
 Ҳаққонийлик сенга сеп ҳам, бисот ҳам бўлсин.
 Онт ичаман офтобнинг эзгу нуринга,
 Қасам бўлсин ой шуъласи Гекат Маъбудга
 Ойдин кеча сирларига ва кўкда кезиб
 Бизнинг ҳаёт-мамотимиз тақдирин ешган
 Машъал каби порлаб турган сайёralарга:
 Оталикнинг бор меҳридан инкор қиласман,
 Бундан кейин ишқим, сен ҳам менга бегона —
 Бир умрга бегонасан! Ваҳший скифлар
 Ё бўлмаса очлигига таскин бериш-чун
 Ўз боласин тажиб егаи бошқа қабила

Менга қанча меҳрибону ва яқин бўлса,
Сен ҳам шундай менга яқин ва меҳрибонсан,
Қачонлардир менинг қизим аталгувчи шахс.

Кент

Подшоҳим!

Лир

Бир оғиз сўз айта кўрма, Кент!
Аждар билан ғазабининг оралиғига
Кира кўрма, йўқол ҳозир!

Уни ҳаммадан

Ортиқ кўриб севар әдим, унинг меҳрига
Такия қилиш менга ҳордиқ берар деярдим.
Жўна, йўқол! Қора гўрда насиб бўлажак
Истироҳат ҳурматига қасам ичаман:
Мен бу қизни юрагимдан юлқиб ташлайман.
Французлар қиролини тездан чақиринг!
Хўш, нимага ағрайганча туриб қолдингиз?
Бургундларнинг герцогин ҳам чақиринг бунда.
Альбани ҳам Корнуэлнинг герцоглари, сиз
Бу учинчи ҳиссани ҳам бўлишиб олинг.
Ва бу қизнинг куёви-чи, мерос ўрнига
Қизнинг ўзи ҳаққоният деб атаб юрган
Гурурини топиб олсин, хўжайн бўлсин.
Иккингизга топшираман ҳокимиятни,
Барча ҳуқуқ, шаҳаншоҳлик устунлигимни.
Менинг билан юзта аъён — рицарь қолади.
Ва уларнинг харажатин сизга юклайман.
Шу юз киши ўзим бошлиқ бир ой-бир ойлаб
Иккингизда навбат билан яшаб туради.
Мен қироллик унвонини, шараф-шонини
Ўзим билан қолдираман, аммо бус-бутун
Келимларни, мамлакатнинг идорасини
Иккингизга топшираман, ўғилхонларим;

Ва сўзимнинг тасдиқи-чун бошда тожимни
Бўлиб олинг, мана.

(Уларга тожини топширади.)

К е н т

Улуғ Лир,

Шу ном оша ҳурматлардим доим қиролни,
Отам каби севар эдим, соҳибқироним,
Ҳамма амри-фармонига бош билан тайёр,
Дуо чорги шу ном эди тилимда такрор.

Л и р

Қамон таранг тортилгандин, ўқидан сақлан!

К е н т

Қамалакни майли бўшат, ўз ўқинг билан
Юрагимни илма-тешик қилиб қўя қол.
Лир тентаклик қиласверса, Кент ўжар бўлар.
Айт-чи ўзинг, не қилғулик қилмоқчисан, чол?
Ҳокимият мақтовларга талтаяди деб,
Вазифалар қўрқиб сўёсиз қолар дейсанми?
Улуғворлик телбаликдан валақлаганда
Ҳақиқатни сўйламаклик бизнинг бурчимиз.
Эсингни йиғ! Тожи-тахтни қўлингдан берма,
Ғазабингни тизгинлаб ол! Шу жоним кафил,
Кенжা қизинг сени ҳаддан знёда севар:
Тид жимлиги, дил бўшлигин белгиси эмас:
Қайта, ичи бўш ерларда шовқин кўп бўлур.

Л и р

Ҳаётингни қиммат билсанг, тилингни тий, Кент!

К е н т

Ҳаётимми, бу ҳаётни доим сен учун
Гаров қилиб қўйилган деб ҳисоблаганман,

Ёвларингга қарши, сени қўриқлаганда
Хаётимни йўқотишидан ҳеч қўрқмаганиман.

Л и р

Кўзимдан йўқол!

К е н т

Кўзингни оч, фақат менга ижозат бер, Лир,
Фазабингга нишон бўлай умрим борича.

Л и р

Қасам бўлсин Аполлонга, ишқ тангрисига...

К е н т

Аполлонга мен қасам ичаман, қирол
Бўлар-бўлмас чорлайверма маъбудларингни.

Л и р

Мушрик югурдак!

(Қиличини сүғуради.)

Альба́ни ва Корнуэль

Тўхтанг, шаҳаншоҳ!

К е н т

Майли, чопа қол.
Беомон дард музди учун, табибингни сўй!
Бундан кейин, танамда жон, товушим борича
Сенга, ёмон иш қилиб қўйдинг, деб қичқираман!

Л и р

Сен фитначи, сўзларимга яхши қулоқ сол.

Менинг айтган сўзларимни тинглаш — вазифанг.

Ваъдамизни бузмоқликка чорлайсан бизни;
 Бундай аҳвол бу даргоҳда рўй берган эмас.
 Шаҳаншоҳлик, унинг ҳукми оралигига
 Суйканчиқлик қилиш билан суқулиб кирдинг:
 Бу қилиққа чидай олмас завқу рутбамиз.
 Бу ерда мен қирол! Мана сенга мукофот!
 Тупроққа хос оғатлардан сақланиш учун
 Тайёргарлик кўришингга беш кун ижозат.
 Олтинчи кун бўлганида ирганч елкангни
 Менга қарам ўлкаларга ўтиришинг шарт;
 Ӯнинчи кун мен қироллик қилган ерларда
 Қадамингдан из топилса, дарҳол ўласан.
 Қани жўна! Маъбудларга қасам ичаман,
 Бу қарорим ғоят қатъий, зарра ўзгармас!

Кент

Хайр, қирол; сен шунаقا экансан-а, Лир.
 Бунда қувғин, у ерда-чи, ҳур — эркин олам.

(*Корделияга*)

Ёмонликдан омон берсин сенга тангрилар,
 Фикрларинг барчаси ҳақ, сўзинг рост эди.

(*Регана ва Гонерильяга*)

Тантанаю дабдабалик севги сўзларин
 Ишлар билан тасдиқлашга ҳаракат қилинг.

(*Герцогларга ва сарой ходимларига қараб*)

Ҳаммангизга хайр энди, сизнинг Кентингиз
 Кекса умрин яшар бўлди ўзга юртларда!

(*Чиқиб кетади*)

Бурги овози
 Глостер, у билан бирга француз қироли,
 Бургунд герцоги ва аъёнлар кирадилар.

Г л о с т е р

Шаҳаншоҳим, қирол билан герцог шу ерда.

Л и р

Айтар сўзим аввал сизга, Бургунд герцоги.
Икковингиз, сиз француз қироли билан
Кенжা қизга уйланишга талашардингиз.
Қани айтинг; раъйнингиздан кечмаслик учун
Сизга қанча сепу бисот берилиши шарт?

Б у р г у н д г е р ц о г и

Шаҳаншоҳим,
Ваъдангиздан ортиқчасини
Сўрамайман, чунки уйдан камин бермайсиз.

Л и р

Аслзод герцог,
Қизга қиммат баҳо қўйғаи экамиз аввал:
Энди ўша нархи пасайиб кетди.
Мана ўзи, шу риёкор вужуд ичидан
Бирор нима тополсангиз, унинг устига
Менинг бутун ғазабимни жамбаст қилсангиз
Шу йиғиндиқ завқингизга мос кела олса,
Мана ўзи, бутунлайн сизники бўлсин.

Б у р г у н д г е р ц о г и

Нима жавоб беришни ҳам билолмай қолдим.

Л и р

Айб иш қилган ва ҳамманинг кўзидан тушган,
Бизнинг чексиз қарғишларга гирифтор бўлган,
Унинг сели отасидан теккан лаънатлар,
Ҳаммамизнинг меҳримииздан четга қоқилган
Ушбу қизни олиш-қўйиш ҳихтиёргиз.

Бургунд герцоги

Шаҳаншоҳим, кечирасиз, шунча шарт билан
Мен бу қизга уйланишдан бўйин товлайман.

Лир

Майли, қўйинг. Онт ичаман парвардигорга,
Мен бу қизнинг бойликларин сападим, холос.

(Француз қиролига)

Сизга эса улуғ қирол, эп тополмайман.
Ёмон кўрган кишим билан бирга бўлмоқни.
Ахир, сиз ҳам шу маҳлуқдан бошқа бирорта
Муносиброқ қизгинани яхши кўрарсиз.
Табиат ҳам ўкинади яратиб қўйиб.

Француз қироли

Бу гапларни эшитишим жуда таажжуబ!
Ҳалигача энг севимли бўлиб келган қиз
Қариликнинг овунчоги, мақташга лойик,
Ҳаммадан ҳам яқинроғу, ҳаммадан қиммат,
Бирданига шундай ёмон қилғилик қилиб,
Бутун меҳру шафқатлардан ажралиб қолса?
Сизнинг унга қўйганингиз шунча муҳаббат
Бирваракай йўққа чиқиб кетгандан кейин
Гуноҳи ҳам жуда мудҳиш, зўр бўлса керак.
Аммо қизнинг гуноҳига менинг зеҳнимни
Ишонтириш учун кучли мўъжиза керак

Корделия

Аммо сиздан, подшоҳим, сўрар эдимки,
Менда йўқdir тилёғлама сўзларни айтиб
Бирвларни ёлғондакам мақташ санъати.
Охирида қилган ишим мос келадиган

Тил билан дил бирга сўзни айтаман, холос;
 Бошқаларга айтиб қўйинг: отамни мендан
 Ранжитгану муҳаббаттин совутган нарса
 Ахлоқсизлик, пастгарчилик. одам ўлдириши,
 Беадаблик, бежо қадам каби гуноҳмас;
 Бир камчилик (шу камчилик менинг давлатим)
 Ялнинчоқ кўз, хушомад сўз менда топилмас.
 Отам мендан муҳаббатин олса оларки,
 Шу хислатлар йўқлиги-чун ҳеч ачинмайман.

Л и р

Менинг раъим ва кўнглимни топмас экансан,
 Шу дунёда туғилмассанг яхшироқ эди.

Француз қироли

Шу холосми? Үз табиий хижолатидан
 Дил сўзини айтолмаслик бутун айбими?
 Нима дейсиз, сиз муҳтарам Бургунд герцоги,
 Маликага айтадиган сўзингиз йўқми?
 Бирор илинч ё манфаат кўзда тутилган
 Ҳар қандайин муҳаббат ҳам муҳаббат эмас.
 Истайсизми, маликага уйланишликни?
 Ҳеч нимасиз унинг ўзи каттакон давлат.

Бургунд герцоги

(Лирга қараб)

Шаҳанишоҳим,
 ўша аввал ваъда қилинган
 Ҳиссасини берсайдингиз, Корделия ҳам
 Бургундларнинг маликаси бўларди шу чоқ.

Л и р

Йўқ! Ҳеч нарса! Ичган онтим — роятда маҳкам.

Бургунд герцоги

(Корделияга)

Демак, афсус, отангизни йўқотиш билан
Эр бўлажак йигитдан ҳам ажраб қолдингиз.

Корделия

Майли, герцог бундан буён хотиржам бўлсин.
Унинг ишқи даромадни кўзда тутаркан,
Мен албатта унга хотин бўла олмайман.

Француз қироли

(Корделияга)

Камбағаллик билан бойсан, жононгинасан,
Ҳамма сени ташлагандা, яна қимматсан,
Назарлардан тушиш билан дидимга ёқдинг,
Мен оламан сени бутун борлигинг билан,
Ҳамма четга улоқтирди, эгаллаш ҳақим.
Ё тавбай! Шу умумий ҳазарнинг ўзи
Унга бўлган ишқим ўтин алангалатди.

(Лирга)

Сен қизингни шуңдай ожиз, гадо ҳолида
Улоқтирдинг менинг меҳру шафқатларимга.
Франция қаби кўркам — гўзал ўлкада
Менинг севган қироличам бўлиб қолади.
Туман босгани Бургунддаги бутун герцоглар
Энди менинг жононимни сотиб ололмас.
Сен буларнинг муз қалбига «хайру хўш» деб қўй.
Гарчанд бунда йўқотибсан, унда мукофот.

Лир

Сен ола қол, бу қиз тамом сеники бўлди.
Бизнинг бундай қизимиз йўқ ва бўлган эмас,

Улинг билан сўнгги дафъа кўришишимиз.
 Вақт ўтказмай йўлга тушинг. Сизларга атаб
 Қиласиган дуон хайр, шафқатимиз йўқ.
 Кетдик, герцог.

Бурғи чалинади. Ли́р билан бирга герцог, Корнуэль,
 Альбани. Глостер ва аъёнлар чиқиб кетадилар

Француз қироли
Опаларинг билан хайрлаш.

Корделия

Сиз отамнинг қиммат баҳо хазиналари,
 Корделия сизни ташлаб кетар, кўзи ёш.
 Мен сизларни жуда яхши танийман, аммо...
 Бир туғишгай опаларим бўлганингиз-чун
 Сизда бўлган нуқсонларни айтиб турмайман.
 Отамизни яхши кўринг, уни сизларнинг
 Маҳмадона қалбингизга топширмоқдаман.
 Аттагинанг, назаридан тушмаган бўлсам
 Унинг учун соз бошпана топган бўлардим.
 Хайр опалар.

Регана
Сен бизларни ўргатмаёқ қўй.

Гонериля

Ундан кўра, раҳми келиб ёнига тортган
 Қайлиғингнинг кўнглини топ, яхши бўлади.
 Маъқул галга қулоқ солмай, ўжарлик қилиб,
 Уз-ўзингга жабру жафо ортдириб олдинг.

Корделия
Вақти келиб барча ёмон ният фош бўлар,
Охирида уялади яширин фитначи.
Бахтли бўлинг опаларим!

Француз қироли

Кетдик, жонгинам.

Корделия билан француз қироли чиқиб кетадилар.

Гонерилья

Синглим, ҳар иккимизга тегишли бир иш тўғрисида сен билан гаплашиб олишим жуда зарур эди. Отамиз бу куннинг ўзидаёқ кетишга қарор берганга ўхшайди.

Регана

Шунаقا, у сизлар билан бирга кетмоқчи, келаси ой бизларникига келиб турар экан.

Гонерилья

Ана кўрдингми, у кексайганда айнаб, товланиб турадиган бўлиб қолган. Бу гапни шу топдаёқ ўз кўзимиз билан кўрдик, ишондик. У ҳалигача синглимизни ҳар икковимиздан ҳам ортиқ кўриб севар эди. Тўсатдан айнаб ўнгу терисини ўйлаб кўрмай, уни оқ қилиб қўйди, ахир, шунга ҳайрон қолмай бўладими.

Регана

Ҳамма касал қарилигида, мияси ачиб қолган. Ундаидеса илгарилар ҳам у ўз-ўзини яхши танимас эди.

Гонерилья

У тетик, соғ-саломат замонларда ҳам жуда серзарда, ўжар эди, энди бўлса сен билан биз унинг феълига ўрнашиб қолган бу ярамас кулки ахлоқлардан тоза ҳам жабр-жафо тортсамиз керак, унинг устига кексалигидан келадиган гап кўтаролмаслиги, асабийлигини, бўлар-бўлмасга бадгумон бўлаверишини айтмайсанми?

Регана

Рост айтасан, сен билан биз, Кентни ҳайдагандаги-
га ўхшаган унинг тутқаноқдай тентаклигини, бемаъни-
гарчиликларини ҳали кўп бошимиздан ўтказамиз.

Гонерилья

Ё бўлмаса француз қироли билан хайларашган чоғ-
даги муомаласига қара. Кел, ҳали ҳам иккаламиз ба-
маслаҳат гапни бир ерга қўйиб ҳаракат қилайлик:
агар у шу аҳволида ҳам ҳокимиятни ўз қўлида тутиб
турмоқчи бўлса, таҳтдан кечганидан фойда йўқ. Қай-
тага не-не кунларни бошимизга солади.

Регана

Иккаламиз қиласар ишни яхшилаб ўйлашиб оламиз.

Гонерилья

Ишқилиб, вақт ўтказмасдан, нима билан бўлса
ҳамки, бўлар ишнинг олдини олиш керак.

Чиқиб кетадилар.

ИККИНЧИ САҲНА

Граф Глостернинг саройида бир зал. Қўлида бир хат билан

Эдмунд чиқади.

Эдмунд

Яратилиш! Менинг тангрим сенгина холос,
Сенинг ҳамма қонумингга хизмат қиласман.
Ўз акамдан бир йил ёки икки йил кейин
Туғилган-чун мерослардан маҳрум эмишман.
Бу одатга, бу хилдаги бидъат зулмига
Одамларга расм бўлган риёкорликка,
Нега хўй деб, бўйин эгиб қолар эканман?

Қонунсизмиш? Бу гап ўзи нима дегани?
 Нега мен паст бўларканман, менинг вужудим,
 Билак кучим, тетик руҳим, роса қоматим
 Орномусли эр-хотинлар туғдириб қўйган
 Болалардан заррагина камлиги йўқ-ку.
 Нега бизга ким кўринган таъна сўз билан
 «Паст», «қонунсиз» лақабини тамға қиласди?
 Биз, «қонунсиз», «зоти пастлар»— «зоти
 пастлармиз?»

Аммо бизни яратишда жонига теккан
 Ухлайвериб ялоқ бўлган кўрпа-тўшакда,
 Уйқусираб бўйда бўлиб, туғилиб қолган
 Жинни-санғи каллаларга нисбатан, кўпроқ
 Ихтиросли яширин ишрат завқи аралаш
 Катта кучлар, алангали зўрлик сарф бўлган!
 Сенга мерос тегадиган еру сувларни
 Мен оламан, билиб қўйгил, қонуний Эдгар:
 Отамизга сен қонуний ўғлидан кўра
 Мен қонунсиз кам қимматга эга эмасдир.
 «Қонуний-а!» Жаранглашин эшишиб қўйинг.
 Бурунда бил, ҳай қонуний акам, мабодо
 Хат орқали қилган макрим ўринлай қолса,—
 Ҳалигача камситилган уқанг Эдмунд
 Қонунний деб танилади. Усиб-унаман.
 Қонунсизлар иши учун худо мададкор.

Г л о с т е р киради.

Г л о с т е р

Кеңт қувланди. Французлар қироли эса
 Фазаб билан бизни ташлаб-кетиб ҳам қолди.
 Лир ҳам тахтдан воз кечдию оқшом жўнади.
 Бундан буён қизларига боқим яшайди...
 Бирваракай юз берди-я шунча ҳодиса!
 Сен ҳам шундамидинг, Эдмунд? Қандай хабар
 бор?

Э д м у н д

Ҳеч қанақа, жаноби олий.

(Битта хатни яширади)

Г л о с т е р

Нега мунча эҳтиёт билан бу хатни яширяпсан?

Э д м у н д

Мен ҳеч қандай янги хабар эшитганим йўқ, жаноби олий.

Г л о с т е р

Қандай қоғозни ўқиб турган әдинг?

Э д м у н д

Ҳеч нима ўқиётганим йўқ эди, жаноби олий.

Г л о с т е р

Ҳеч нима дедингми? Шошилиб-пишилиб чўнталингга суқаётган нарсанг нима эди? Агар у қофозда ҳеч нима бўлмаса, шошилиб яширишнинг ҳам ҳожати йўқ эди. Бу ёққа бер-чи... Қани! Агар қофозда ҳеч нима ёзилмаган бўлса, кўзойнак ҳам тақиб ўтирумайман.

Э д м у н д

Ёлвораман, жаноб, мени кечиринг. Бу хат акамдан. Мен ҳали охиригача ўқиб ҳам чиққаним йўқ. Шунчаки устидан бир кўз югуртирдим. Фикримча, сиз ўқимаганинг маъқул.

Г л о с т е р

Хатни менга беринг деяпман, жаноб.

Э д м у н д

Хатни сизга берсам ҳам, бермасам ҳам барибир, сизни ҳақорат қилган бўламан. Хатнинг мазмуни, менинг фаҳмимча, кишининг нафсини койитади.

Г л о с т е р

Кўрсат деяпман, қани кўрсат!

Э д м у н д

Мен ўз акамни оқлаш учун у бу хатни ёзища менинг кўнгли тозалигимни синамоқчи бўлган бўлса керак, деб айта оламан.

Г л о с т е р (Ўқиёди)

«Ана шу қонуни билан ёритилган ҳурматга лойиқ кексалик ҳақи, умримизнинг энг кўркам йилларида ҳаётимизни заҳарламоқда. У бизни ўз бадавлатлигимиздан фойдаланиш имкониятидан маҳрум қилмоқда. Қачонки ўша қариллик бизга халақит беришдан тўхтамагуича, биз ўз бойлигимизнинг ҳузур-ҳаловатини тата олмас эканмиз. Мен, қарилликнинг кишини эзib юборгувчи ана шу зулми қанчалик мақсадсиз ва аҳмоқгарчиликдан иборат эканлигини фаҳмлаб қолдим. Қарилликнинг бу зулми ҳақиқатан қудратли ва эўр бўлгани учун эмас, балки биз чидаб берганимиз учун устимиздан ҳукмронлик қилмоқда. Бу тўғрида аниқроқ гаплашиб олиш учун менинг олдимга кел. Агар бизнинг отамиз узун уйқу билан ухлаб, то мен уйғотмагунча уйғонмай турган бўлганда эди, отамиз даромадларининг тенг ярми сенга тегар эди ва сен ҳам умринг борича Эдгарнинг севган укаси бўлиб қолар эдинг».

Ҳмм... бу сунқасд!.. «Мен уйғотмагунча уйғонмай турган бўлганда эди, даромадларнинг тенг ярми сенга тегар эди...» Менинг ўғлим Эдгар! Наҳотки унинг қўли қалтирамай шуларни ёзолди? Унинг қалби ва фикри шу хаёлларга боролди? Бу хатни сен қачон олдинг? Буни ким олиб келди?

Э д м у н д

Ҳеч ким олиб келиб бергани йўқ. Қизиги ҳам шунда-да. Хатни хонамнинг дарchasидан ташлаб кетишибди.

Г л о с т е р

Сен ҳам бу хатни акангнинг ўз қўли деб билдингми?

Э д м у н д

Агар бу хатда бирор маъқул гап ёзилган бўлса, акамнинг ўз қўли деб қасам ичишим мумкин эди. Аммо бу хилдагини шундай эмасдир, деб ўйлашни истар эдим.

Г л о с т е р

Бу унинг қўли.

Э д м у н д

Ха, бу унинг қўли, жаноб. Аммо мени ишонмоқчи бўламанки, бу хатни ёзар чоғда қалби билан қўли бир фикрда бўлмаса керак.

Г л о с т е р.

Илгарилар ҳам бирор гал сен билан шу фитна гапларни гапиришган эдими?

Э д м у н д

Ҳеч қачон, жаноб. Аммо ундан, чунончи, ўғил балоттага етиб, ота деган кексайгандан кейин, ўша ота ўғлининг қарамоғига ўтмоғи керак, ўғил эса бутун даромадларни ўз қўлига олмоғи керак,— деган фикрларини бир неча бор эшитганим бор.

Г л о с т е р

Аҳ, ярамас, ярамас! Бу ёзган хатида ҳам шу фикрларнинг ўзгинаси. Жирканч, ярамас! Иўлдан тойган, манфур ярамас! Ваҳший ҳайвон! Ваҳший ҳайвондан

ҳам ёмон! Бор, уни топиб кел. Мен уни қамаб қўяман.
Ирганч, ярамас! Қаерда экан?

Э д м у н д

Билмасам, жаноб. Агар сиз акамнинг ўйлаган ўйларини аниқ билиб олгунча, унга қарши бўлган ўз ғазабларингизни босиб туролсангиз эди, тўғри йўл тутган бўлардингиз: агар сиз унга қарши адолатсизлик қилиб тўсатдан кескин чоралар ишлата бошласангиз, балки бу чоралар сизнинг шахсий ҳурматингизга ҳалал етказиб, акамнинг сизга бўлган ўғиллик итоатини тубдан сўндириб қўйиши мумкин. Мен ўз жонимни кафил қилиб айта оламанки, балки у бу хатни ёзишда ҳеч қандай ёмон ниятни ўйламай, менинг сиз ҳурматлимизга бўлган садоқатимни текшириб кўрмоқчи бўлгандир.

Г л о с т е р

Сен шундай деб ўйлайсанми?

Э д м у н д

Агар сиз ҳурматлимиз бир маслаҳатни маъқул кўрсангиз, мен у билан бир суҳбат уюштирадим. Ҳамма гапларни ўз қулогингиз билан әшишиб, тасдиқ қиласар эдингиз. Хўп десангиз бу суҳбатни шу кечдан қолдирмай ташкил қилиш мумкин.

Г л о с т е р

У бунчалик ёввойи, ёвуз махлуқ бўлмаса керак,
токи...

Э д м у н д

Албатта бўлмаса керак.

Г л о с т е р

Уз отасига қарши-я. Уз меҳрибон, жондан севган
отасига қарши-я? Осмону заминга қасам ичаман!

Эдмунд, уни қаердан бўлмасин топ! Дилидаги гапларни рўёбга чиқар. Зеҳнинг нимани маслаҳат кўрса, шундай ҳаракат қил. Мен ҳақиқий гап нима эканини билиб олиш учунгина дунёдаги ҳамма нарсани ҳадя қилишга тайёрман.

Э д м у н д

Мен уни қаердан бўлмасин излаб топаман, жаноб. Бор ҳаракатимни қилиб кўраман, кейин келиб ҳамма гапни ўзингизга баён қиласман.

Г л о с т е р

Бу ҳалигача кўрилмаган хусуф-кусуфлар. Қуёшнинг, ойнинг тутилиши бизлар учун ҳеч қандай бир яхшиликдан дарак бермайди. Табиатшунослар бу ҳодисаларни турли-туман йўллар билан тушунтироқчи бўлсалар ҳам, ҳар ҳолда кулли мавжудот бу ҳодисаларнинг оғир таъсиридан шикаст топмоқда: муҳаббатлар совиб бормоқда, дўстлик емирилмоқда, оға-инилар бир-бирларига қарши қўзғалмоқда, шаҳарларда, қишлоқларда олаговур, сарой доираларида хиёнатлар, отоналар билан фарзандларни бир-бирига боғлаган иплар узилмоқда. Менинг ярамас ўғлим устидаги фол айниқса тўғри чиқмоқда, ўғил отага қарши қўзғалган қиролнинг ўзи табиат қонунларини бузмоқда, ота ўз гўдакларига қарши исён қилмоқда. Яхши замонлар ўтиб кетди; турли-туман макру ҳийлалар, кўнгли қаттиқлик, хиёнат, барбод қилувчи ўзбошимчалик — ана шулар энди бошимиз гўрга киргунча бизга азоб беради. Топ, ўша ярамасни, Эдмунд; топсанг афсус емайсан. Аммо жуда эҳтиёткор бўл. Аслзот ва вафодор Кент эса қувғинда! Унинг бутун гуноҳи — садоқати. Ҳаммаси ҳам таажжуб ҳодисалар! (Чиқиб кетади).

Эдмунд

Одам болаларининг ҳайрон қоларли аҳмоқликларини қаранг! Кўпинча ўз гуноҳимиз билан баҳт биздан юз ўгириб қолса, бу фалокатларга сабаб қилиб қуёшини, ойни, юлдузларни гуноҳкор қила бошлаймиз. Гўёки тиз муттаҳам, ярамас бўлган бўлсак, ноиложликдан аҳмоқ бўлиб қолган бўлсан — бу осмон ҳукмидан, алдамчи, ўғри, хиёнаткор бўлган бўлсан, бунга ҳам фалак таъсир қилган, ичувчи, ёлгончи, фоҳиш, бузуқи бўлган бўлсан — кўкдаги юлдузларнинг нури тушган, хуллас, биздаги ҳамма расвогарчиликларда тангри таоллонинг иродаси бор, тақдирга тан беришимиз керак. Зоти бузуқ одамлар учун жажжигина баҳона; ўзингдаги саёқ майлларга жавобгарликни юлдузларнинг гарданига афдарасан холос. Менинг отам менинг онам билан аждар юлдуздари туркуми қиронида йўли-қишган бўлса, мен Дубби Акбар, яъни Катта Айиқ юлдузлари туркуми қиронида туғилганман: шунинг учун ҳам мен золим, бузуқи одам бўлишим керак эди! Бўлмаган гап! Осмон гумбазидаги энг ювош қиздай мулойим юлдуз бешигим устида мўлтираб турганда ҳам мен ҳозир қандай бўлсан ўшандай бўлиб қолаверардим.

Эдгар келиб киради.

Ана, ўзи ҳам келиб қолди. Бу эски комедия ҳам ора очиқ бўладиган бўлди. Бедлам жиннихонасидан чиқсан жинни, Томга ўхшаш ўзимни анқов, ярамасликка солиб тураман. Аҳ, бу, кун тутилиш, ой тутилишлар бизга бошбошдоқликлардан хабар беради.

Эдгар

Салом, укам, Эдмунд! Нима тўғрида мунча чуқур ўйланиб қолдинг?

Э д м у н д

Шу ой, кун тутилишлари натижасида рўй бериши мумкин бўлган ҳодисаларни олдиндан айтиб ёзилган ҳапларни яқинда ўқиган эдим, шуни ўйлаяпман.

Э д г а р

Сен шу гапларга қизиқасаними?

Э д м у н д

Сени ишонтиришим мумкинки, баҳтсиз ҳодисалар рўй бериши тўғрисида илгари айтилган гаплар тўғри келяпти. Масалан, ота-оналар билан болалар ўртасидаги муомалаларнинг дуруст бўлмаслиги, ўлим-етим кўплиги, қимматчилик, қадим дўстларнинг бир-биридан жудо бўлиши, ҳукумат ишида олағовур, сарой аҳлларининг қиролга қарши дўқ уриши ва лъянатлар ёғдириши, бекорчи гумон ва андишалар, дўстларнинг қувғунилиги, қўшин ичидаги интизом тушкунлиги, эру хотинлар ҳортасида бевафолик ва бошқа ва бошқалар.

Э д г а р

Қачондан буён мунажжимлар маслагига кириб олдинг?

Э д м у н д

Ҳа, майли, буни қўйдик. Отам билан энг охирги ғил қачон кўришган эдинг?

Э д г а р

Кечаке кечқурун.

Э д м у н д

У билан гаплашган эдингми?

Эдгар

Ҳа, икки соат тўла-тўқис.

Эдмунд

Яхшилиқча ажрашганмидиларинг? Сен унинг галидами, юзидағи имою ишорасидами бирор норозилик аломатини сезмаганмидинг?

Эдгар

Хеч нима сезғаним йўқ.

Эдмунд

Ёдингга тушир, сен бирор бало қилиб қўйиб ранжитган бўлмагин. Ҳам сендан сўрайман, сал жаҳлидан тушиб, тапти босилгунча кўзига кўринмай тур. Шу топда у шунаقا ҳам ғазаб билан тўлқинланиб турибдики, кўрина қолсанг сўкиш, койишнинг ўзгинаси билан унинг қўлидан чиқиб кетолмайсан.

Эдгар

Нима бало, биронта ярамас мени унга ёмонлаб чаққанмикин.

Эдмунд

Шунаقا бўлган деб қўрқяпман. Сендан сўрайман, унинг ғазаби босилгунча ўзингга эҳтиёт бўл. Юр, менинг хонамга кирамиз. У ерда мен сени бирор ўнғай ерга жойлаштираман, сен у ердан сенинг тўғрингда нималар деяётганини эшитасан. Марҳамат қил, мана менинг калитим. Агар ташқарига чиқмоқчи бўлсанг, ўзинг билан яроғ ола чиқ.

Эдгар

Яроғ ола чиқ?

Э д м у н д

Ака, мен ахир сенинг фойдаиг учун маслаҳат беряпман. Майли, агар сенинг тўғрингда бирор ёмонлик ниятим бўлса, виждонсиз киши бўлай. Мен сенга ўз кўрганим ва эшитганимни шипшитиб қўйяпман, холос. Бор бутун даҳшатни, чин гапни сенга ҳали айтганимча йўқ. Сендан сўрайман, бу ердан кет.

Э д г а р

Мен, ахир, тездан ҳамма гап нима эканини сендан билиб оламанми?

Э д м у н д

Менга орқа қиласавер.

Э д г а р чиқиб кетади.

Отам содда, ҳар нарсага ишонаверар,
Акам эса асл йигит, унинг вужуди
Ҳар қандайин ёмонликдан жуда ҳам тоза,
У, буларга ишонмайди. Тўғриликда-чи
Аҳмоқларча тўғри. Майли, у билан ишни
Жуда енгил ҳал қиласман. Масала равшан.
Туғилишим — фарзандлигим бермаган билан
Ақлим берар менинг ҳақим бўлган меросни,
Шу мақсадим йўлидаги ҳамма чора хўп!

УЧИНЧИ САҲНА

Герцог Альбанининг саройида бир хона. Гонерилья, Освальд ва бошқарувчи кирадилар.

Гонерилья

Наҳотки отам ўз масҳарабозини сўккани учун менинг мулозимларимдан бир аъённи тутиб олиб урган бўлса?

О с в а л ь д

Шундай бўлди, маликам.

Г о н е р и л ь я

Кечакундуз менга озор бергани-берган.
Дам ўтмасин бир сўкишга чидаб берамиз.
Бундан ортиқ тўзолмайман, тоқатим битди.
Шовқин-сурон қиласар унинг мулоzимлари,
Ўзи эса ҳар бўлмағур гапга сўкади.
Овдан қелсин, мен у билан сўзлашмайман ҳам,
Сен — касал деб қўя қолгил мени сўраса.
Аввалгидай сертавозе бўлабермагил.
Бир гап бўлса, ўзим унга жавоб бераман.

О с в а л ь д

Товуши келди, маликамиз, келишяпти.

Саҳна орқасидан бурғи овози

Г о н е р и л ь я

Сен ҳам, бошқа мулоzимлар хизмат қиласкан
Истаганча ўзингизни диққатсиз тутиңг.
Пала-партиш ишингизни ўзи ҳам сезсин.
Еқтирипаса, кета қолар синглимникига.
Биз у билан гаплашганимиз. Жавоб бермаймиз
Устимиздан ҳукмронлик қиласверишга.
Бу тентак чол, ҳукуматни топшириб қўйиб.
Аввалгидай эга бўлиб қолиш истайди.
Кексалар ҳам бола феъл бўлиб қолади.
Дағдаға ҳам қилиш керак эркалаб туриб,
Бу давара ўзларига фойда қиласди.
Буйруғимни ёдинга тут.

О с в а л ь д

Маъқул, маликам.

Гонерилья

Мулозимлари билан ҳам оддийроқ бўлинг.
 Нима бўлса бўла қолар. Қолганларга айт!
 Мен чол билан бир гаплашиб қўймоқчиман
 Қулай фурсат келишин кутиб турибман.
 Синглимга ҳам хат ёзаман, орқаворатдан
 Бамаслаҳат иш қиласиз.— Овқатланайлик!

Чиқиб кетади.

ТУРТИНЧИ САҲНА

Ҳалиги ерда бир зал.
 Ўзга кийим-бош кийган Кент чиқади.

Кент

Усти-бошни қойил қилиб ўзгартиргандай,
 Товушимни ҳам ўриилатиб ўзгартиrolсам,
 Мўлжал қилган мақсадимга, зарра қийналмай
 Етар эдим, қани, қувғин Кент!
 Айборлик вақтингда ҳам хизмат тополсанг,
 Жуда севган хўжайнинг, сенинг ҳойнаҳој
 Шунча сидқу ихлосингга қойил қоларди.

Саҳна орқасидан бурғи овози.
 Ли р. рицарлар ва мулозимлар чиқади.

Лир

Овқатни бир минут ҳам кутишга тоқатим йўқ.
 Дарров дастурхон ёзилсин.

Хизматчи чиқади

Бу нима гап? Кимсан ўзинг?

Кент

Битта одамман!

Лир

Сенинг қиласынан ҳунаринг нима, ҳам биэдан сенга нима керак?

Кент

Менинг ҳунарим ўз-ўзимни әвлаб юриш, кимки менга ишонч билдирса, ўшанга садоқат билан хизмат қилиши. Кимнинг дили тоза бүлса ўшани севиш, кимки доно-ю камгал бүлса, ўшанинг ёнидан ажралмаслик; қиёматдан құрқиши; керак бүлганды жангта кириш ва балиқ емаслик.

Лир

Ахир, ўзинг кимсан?

Кент

Мен, дилида кири йўқ, маъқулгина одамман, аммо қиролдай камбағалман.

Лир

Уша қирол қироллар ичида камбағали бүлгандай, сен ҳам фуқаролар ичида камбағал бүлсанг, чинданам бадавлат бўлмаганинг бўлади. Қани энди, сен нима истайсан?

Кент

Хизмат қилиш.

Лир

Кимга, ахир, хизмат қилишни истар эдинг?

Кент

Сизга.

Лир

Сен мени танийсанми, ошна?

К е н т

Танишга танийман, чунки чөрткизда, сиэни хўжайиним аташга арзийдиган қандайдир ёқимлилик бор.

Л и р

Нима? Қанақа нарса бор дединг?

К е н т

Хукмроилик.

Л и р

Сен қандай хизматларнинг уддасидан чиқа оласан?

К е н т

Садоқат билан сир сақлашни, отда юришни, чопишни, ўзимнинг айтадиган ҳикояларим билан чигал жанжалли воқеаларни бузиб юборишни ва унча ҳам чигал бўлмаган топшириқларни бажаришнинг уддасидан чиқаман. Росмана одамлар қила оладиган ишларни бажаришга менинг ҳам кучим етади. Менинг яхши фазилатларимдан бири шуки, жуда тиришқоқман.

Л и р

Неча ёшга кирдинг?

К е н т

Хотинларнинг ялласинигина эшитиб ошиқ бўлиб қоладиган даражада ёш ҳам эмасман, жаноб. Аммо ҳеч қандай сабабсиз уларга мафтун бўладиган даражада қари ҳам эмасман: елкамда қирқ саккиз йиллик умрнинг юки бор.

Л и р

Менга әргашавер. Сен менга хизмат қилиб қоласан; агар овқатдан сўнг ҳам ёқтирганимча тураверсан,

сен билан бу яқин орада ажралишадиган кўринмайман.
Овқат тайёрми? Ҳой, овқат! Менинг масхарабозим
қаерда қолди! Масхарабозим! Тез боринг, масхарабо-
зимни чақириб келинг!

Хизматчилардан бири чиқиб кетади. Освальд киради.

Ҳой, йигитча, менинг қизим қаёқда?

Освальд

Сизнинг ижозатингиз билан... (кетади)

Лир

Нима деяпти у? Бу тўнгни қайтариб келинг!

Рицарлардан бири кетади.

Масхарабозим қаерда деяпман? Нима, ҳаммангиз
ухлаб қолдингизми?

Рицарь қайтиб келади.

Ҳа, қани, ҳалиги мангровни олиб келдингми?

Рицарь

У, айтятники, подшоҳим, қизингиз касал экан.

Лир

Нега у ярамас мен чақирганимда қайтмабди?

Рицарь

Мен сўрасам, подшоҳим, у менга жуда дағаллик
билан истамаслигини айтди.

Лир

Истамас эмиш?

Рицарь

Подшоҳим, мен нима гап эканини билолмадим, аммо менга шундай кўриняптики, сиз ҳазрат олийлари билан, одат бўлиб кетган садоқат; иззату ҳурмат билан муомалада бўлмаяптилар. Битта хизматчиларниг ўзигина эмас, балки герцог ҳам, ўз қизингиз ҳам илгаригидай хушмуомала эмаслар.

Лир

А! Сен шундай деб ўйлаяпсанми?

Рицарь

Утиниб сўрайман, подшоҳим, агар хато қилаётган бўлсам, мени кечиринг, аммо менинг вазифам сиз ҳазрати олийларига беадаблик қилинаётганини кўриб турив жим қолишга ижозат бермайди.

Лир

Сен, менга сезилиб юрган нарсани тасдиқ қиляпсан, холос. Сўнгги вақтларда баъзи бир нўноқликларни пайқаб юрибман. Мен бу гапларни ўзимнинг ҳаддан зиёда бадгумонлигимдан кўриб, ярамас андишаларга ишонишни истамаган эдим. Энди бу ҳолатга айрича ёътибор беришга тўғри келади. Менинг масхарабозим қани ахир?.. Мен уни икки кундан буён кўрганим йўқ.

Рицарь

Кенжа маликамиз Францияга жўнаб кетганларидан буён масхарабоз жуда қайғириб, мунгланиб қолган.

Лир

Бу тўғрида чурқ эта кўрма. Мен ҳам буни пайқаган эдим, бор, қизимга айтки, мени у билан гаплашмоқчиман.

Сен бориб менинг қизиқчимни айтиб кел.

Яна бир хизматчи кетади.

Освальд киради

Қани, ҳе, қани, жаноб! Бери кел-чи! Мен ким бў-
ламан, жаноб?

Освальд

Маликанинг отаси!

Лир

Маликанинг отаси? Вой падарингга... ярамас жа-
ноб-эй, тубан, кўппак, қулвачча, ит!

Освальд

Бўлмаган гап, жаноби олий, кечирасиз.

Лир

Ҳали сен кўзимга тик ҳам қарайдиган бўлдингми,
ирганч. (*Уни уради.*)

Освальд

Мен, ўзимни уришга ижозат бермайман, жаноб!

Кент

Юзтубан йиқитишга ижозат берасанми, паст одам?
(*Оғидан олиб йиқитади.*)

Лир

Раҳмат, биродар, бу хизматинг менга маъқул
тушди.

Кент

Қани, мугомбир, бир ўрнингдан туриб жўнаб қол!
Мен сенга одамларни бир-биридан фарқ қилишини ўрга-
тиб қўяман! Йўқол! Йўқол деялман. Агар ўз ифлос

гавданг узунлиги билан ерни қайтадан ўлчаб кўришни орзу қилмаётган бўлсанг жўнаб қол! Яхшиликча кет! Жўна! Тушундингми? (Освальдни туртиб.) Мана! Мана, бўлмаса.

Л и р

Балли, менинг яхши хизматчим, ташаккур айтаман. Мана буни хизмат ҳақингга, мукофот учун ол. (Кентга пул беради.)

К и з и қ ч и киради.

М а с х а р а

Бўпти, мен ҳам буни ўз хизматимга ёллайман. Мана, сенга менинг аҳмоқлик қалпоғим. (Кентга ўз қалпоғини беради.)

Л и р

Ҳа, салом, азизим! Ҳолу аҳволлари қалай?

М а с х а р а

Дўстим, сен менинг шу аҳмоқлик қалпоғимни ола қолсанг-чи.

К е н т

Нега энди, масхара?

М а с х а р а

Нега дедингми? Ҳа, шунинг учунки, бу қалпоқ назардан тушиб қолган одамларга жуда ярашади. Агар сен шамол қай томонга эсаётганини фарқ қилмасанг, жуда тез тумовлаб қоласан. Ол қалпоғимни, ола қол! Ўзинг, ахир, ўйлаб кўр, мана бу азamat ўзининг иккисизини ҳайдаб, учинчисига беихтиёр фотиҳа берганини билмай қолди. Агар сен унга астойдил хизмат қилмоқчи бўлган бўлсанг, аҳмоқлик қалпоғимни киймай иложинг дўйқ. Қани, хўш, бунга нима дейсан, амакижон? Эҳ,

қани энди менинг иккита қалпоғиму, иккита қизим бўлса!

Лир

Сенга улар нимага керак эди, масхара?

Масхара

Агар, мен, бор буди-шудимни қизларимга бериб юборганимда ҳам, қалпоқларим ўзимда қолар эди. Биттасига меникини ола тур, иккинчисини қизларингдан сўраб оларсан.

Лир

Эҳтиёт бўл, жонгинам, қамчи бор-а!

Масхара

Тўғри гап — бу ҳовли қўриқлайдиган кўпнакка ўхшайди, уни қамчи билан ҳайдайдилар, аммо ҳурматли тоэиларчи, сасиб қетганларида ҳам, иссиқ уйда, гулхан ёнида ётишлари мумкин.

Лир

Бу гаплар менга аччиқ ништардай ботади.

Масхара

Дўстгинам, мен сенга чўпчак боши ўргатайми?

Лир

Ургат.

Масхара

Бўлмаса, ёдингда тут, амакижон,

Бори-йўғин гумдон ошир,

Билганинг айтмай яшир.

Мулкинг улашаверма,

Отга мин, яёв юрма,
Билмагани билиб тўй.
Вино-ю хотинни қўй,
Топсанг, елиб-юурма.
Икки ўндири бу йигирма.

Кент

Бу гапларнинг ҳаммаси ҳам ҳеч нимага арзимайди,
масхара.

Масхара

Бу гапларнинг ҳаммаси, хизматига ҳақ тўланмаган
адвокатнинг нутқига ўхшаган гаплар, сиз ҳам, ахир,
менга ҳеч нима берганингиз йўқ-ку. Айт-чи, амакижон,
сен ҳеч нимадан бирор нима қила оласанми?

Лир

Йўқ, дўстим, ҳеч нимадан ҳеч нима чиқмайди.

Масхара

(Кентга)

Сендан сўрайман, сен унга тушунтириб қўй, у ҳам
ўзи шудгор қилган ерларидан худди ҳалигига ўхшаш
даромад олади. Шу гапни айтсам у менга — масхара-
бозга ишонмаётиди.

Лир

Баджаҳл аҳмоқ экансан!

Масхара

Сен менга айт-чи, азизим, баджаҳл аҳмоқ билан
бежаҳл аҳмоқ ўртасидаги фарқни биласанми?

Лир

Билмайман, билмайман, менга ўргат, барака ғонкур!

Масхара

Барча мулкинг қизларингга улаш деб
 Маслаҳатни сенга бергувчи кимдир?
 Шу одамни дарров менга топиб бер
 Е ўрнига ўзинг келиб бунда тур.
 Ким бежаҳл, ким бежаҳл аҳмоқлигин
 Бу гапдан сўнг тезда топса бўлади,
 Биттаси бу аҳмоқлик қалпоғида,
 Ва биттаси — рўпарада туради!

Лир

Сен бизни аҳмоқ деб айтяпсанми, дўстгинам?

Масхара

Сен ўзинг, ахир, бошқа ҳамма отларингни улашиб
 бўлдинг. Бу от билан эса онадан туғилгац эдинг.

Кент

Аҳмоқ-ку унчалик аҳмоқ эмас, жаноб.

Масхара

Йўқ, худо урсин, бу лордлар, аъёнлар битта ўзим
 аҳмоқ бўлиб қолишумга қўйишишмайтибди. Агар мен бу-
 тун аҳмоқгарчиликларга якка ўзим хўжайнин бўламан
 деганимда эди, улар тўш-тўшдан ёпишиб, унинг бир
 қисмини юлқиб олар эдилар, хотинларни айтмайсизми,
 улар ҳам менинг якка ўзим аҳмоқ бўлиб қолишумга
 қўймаётидилар. Ҳар биттаси шу аҳмоқликдан бир
 бўлагини юлиб олмоқчи бўлади. Амакижон, сен менга
 битта тухум бер, мен унинг бадалига сенга иккита тож
 бераман.

Лир

Бу ҷанақа тож бўлди?

Масхара

Жуда ўнгай, мен тухумни баб-баравар икки палла қилиб кесаман, ўртасини ейман, қолган тухум пўчоридан иккита тож бўлади. Қачонки сен ўз тожингни икки бўлакка ушатиб ҳар икки бўлагини ҳам топшириб юбординг. Бу қилган ишинг ботқоқдан ўз эшагингни ўз елкангда олиб ўтиш билан баравар бўлди. Олтик тожингники бошингдан олиб бирорвга берганингдан кейин, бу кал «тожингда» ақл камроқ эканини кўрсатади. Мен бу гапларни аҳмоқлигимдангина гапирганимни кимки исбот қила олса майли, ўша одамни қамчинлай қолсинлар.

(Куйлади)

Бу йил аҳмоқларнинг омади кетган,
Аҳмоққа айланди ақли расолар.
Тентаклик ҳисобичувалиб битган,
Маймуналлик қилмоқда бутун донолар.

Лир

Сен дайди, қачондан буён ашулачи бўлиб қолдинг?

Масхара

Ўз қизларингни ўзингга она қилиб олганингдан буён, амакижон. Сен уларнинг қўлига хипчин бериб, ўзинг орқа ўгириб, иштонингни тушириб турадиган бўлганингдан буён.

(Куйлади)

Қувонгандан йиғлар эдилар,
Мен қайгириб қўшиқ айтардим,
Еш ўслирин болалар каби
Аҳмоқ бўлиб қолгач қиролим.

Сендан илтимос қилардим, амакижон, сен ўз масхаранг учун битта ўқитувчи ёллаб бер. У меңга ёлғон

гапиришдан дарс берсин: жуда ҳам ёлғон гапиришни ўргангим келяпти.

Лир

Сен саёқ, ёлғон гапирадиган бўлсанг буюрамиз,
сени калтаклайдилар.

Масхара

Мен тушунолмай қолдим, сенинг ўз қизларинг билан
қандай қариндош-уруғчиллик алоқанг бор? Улар мени
рост гапирганим учун калтакламоқчи бўладилар. Сен
эса ёлғон гапирганим учун. Баъзи-баъзида мени инда-
маганим учун ҳам калтаклайдилар. Майли, мен ким
бўлсам ҳам бўлаверар эдим-у, аммо сенинг ўрнингда
бўлишни истамас эдим. Сен ўз ақлингни икки баравар
тақсим қилиб улашдинг, ўзингга ҳеч бало олиб қолма-
динг. Ана ўша яримталардан биттаси келаётиди.

Гонерилья киради.

Лир

Нима дейсан, қизим? Қовоқларинг солиқ, қошинг
чертилган, бу нима дегани? Нима учундир сўнгги вақт-
ларда жуда тез-тез қовоқ соладиган бўлиб қолдинг.

Масхара

Илгарилар сен жуда маъқул киши эдинг. У қовоқ
солганда парво қилмас эдинг, ҳозир-чи, рақамсиз нул-
нинг ўзисан. Мен сендан дурустман, негаки, масхараман,
сен-чи, ҳеч нимасан. (Гонерильяга.) Дарвоқе тилимни
тияман: сизнинг чеҳрангизга қараганда шундай қилга-
ним маъқулроқ кўринади, гарчан бу тўғрида сиз бирор
гал айтганингиз йўқ.

Тўқ эдинг-у, нон бурдага боқмасдинг
Пушаймонлар қилсанг керак, дўстгинам.

(Лирга ишорат қиласы)

Мана бу эса бўш қиринди, қовузгоқ.

Гонерилья

Биргина бу тийик билмас масхарангизмас,
 Сизнинг орсиз талайгина мулозимингиз
 Куни бўйи тиним билмай жанжаллашади,
 Шовқин-сурон кўтарида, ҳазрати олий.
 Мен бу гапни сизга айтиб, сизнинг томондан
 Бир ҳимоят топарман деб ишонган эдим.
 Сиз қайтага сўзингизу ишингиз билан
 Ушаларнинг бу бемаъни қилиқларига
 Баракалла деяпсиз, деб чўчимакдаман.
 Агар шундай бўла қолса баҳона тайёр:
 Бирор жазо чораси ҳам пусиб қолмайди,
 Яхшиликни кўзда тутган ушбу чоралар
 Сизга бир оз қаттиқ тегиб ранжитса мумкин.
 Чин вазифа талаб қилган бу зарурият
 Уят билан андишага ўрин қўймайди.

Масхара

Ана шунинг учун-да, кўрмайсанми, амакижон:
 Чумчуқ шўрлик узоқ муддат ҳаккани боқди
 Ҳакка ўсиб, шу чумчуқнинг миясин қоқди,—
 деганлар.
 Ана шундай. Шам ёниб бўлди. Бизлар эса қорон-
 филикда қолдик.

Лир

Ва шу бизнинг қизимизми?

Гонерилья

Бу гапни қўйинг!
 Сиз, саломат фикрларни ёдга туширинг,
 Мен биламан, улар сизда ҳали мукаммал.

Бу бачкана қилиқларни итқитиб ташланг,
Ажва бўлманг, булар сизга муносиб эмас.

Масхара

Юкни от тортиб кетаётганини эшак ҳам фаҳмига
боради. Чуҳ, ҳе азамат! Сенга қойилман.

Лир

Мени бунда ким танийди? Йўқ, мен Лир эмас!
Наҳотки Лир шундай сўзлаб, шунаقا юрса?
Қани унинг аввалгидай кўрар кўзлари?
Ёки унинг эси ҳуши чарчаб қолдими?
Унинг ақли рагисакта бўлдими? Қандай?
Ухлайманми? Ким айтади, менинг ўзим ким?

Масхара

Лирнинг сояси.

Лир

Мен буни аниқлаб олишим керак, мен ҳалигача
ўзимнинг қироллик иқтидоримга, илмим ва ақлимга
эътимот қилиб, ёлғон тасаввур билан қизим бор деб
юрад эканман.

Масхара

Қайсики у қиз ўзи учун муте ва фармонбардор ота
қидиради.

Лир

Сизнинг исмингиз нима, гўзал хоним?

Гонерилья

Бу ҳам янги тантиқликка жуда муносиб,
Менга ахир қулоқ солинг, сиздан сўрайман.
Сиз ҳурматга лойиқ бўлган бир мўйсафидсиз,
Ёзингизга донищмандлик қўп ярашади.

Амриигизда бўлган юзта мулозим — рицарь
 Шундай бебош, дағал, бузуқ кишилардирки,
 Таъсиrlари ўтиб бизнинг хизматчиларга
 Ўрда ичи карвонсарой каби тўполон.
 Бузуқилик, айшу ишрат, тарааллабедод,
 Худди битта қовоқхона, шодлик уйидай
 Булғатмоқда пок-покиза саройимизни.
 Бу гапларга энди барҳам беришлик керак,
 Сизга битта илтимос шу, ўтинар эдик,
 Йўқ десангиз ўзимиз ҳам қила оламиз,
 Шу аъёнлар саноғини бир оз қисқартинг,
 Ўзингизга ёшдош, лойиқ кишилар қолсин.
 Ўзини ҳам ва сизни ҳам ҳурмат қилолсин.

Л и р

О, зулматларнинг мунгли руҳи, сиз э иблислар!
 Аъёнларни тездан йигинг, отни эгарланг!
 Ҳаромзода! Оғирлигим сенга тушмайди.
 Сендан бошқа яна битта қизим бор, ахир.

Гонерилья

Сиз ўзингиз савалайсиз хизматкорларни,
 Орқангизга эргашган бу галалар эса
 Ўзларидан яхшиларга қун бермайдилар.

Альбани киради.

Л и р

Оҳ, сўнгги пушаймон.

(*Альбанига*)

Сиз бундамисиз?

Бу барчаси сизнинг амру фармонингизми?
 Жавоб беринг!

Қани, отлар тез эгарлансан.

Яхшиликни билмайдиган ношукур банда,
 Сен мармардай совуқ қалбли қора Демонсан!

Сен қайтадан болаликка айланар чоғи
 Сен қизимнинг кўкрагига тирмашар чогинг
 Денгизларнинг махлуқидай яна жирканчсан.

Альбани

Тинчланинг!

Лир

(Гонерильяга)

Елғонлайсан, лаънати калхат!
 Енимдаги кишиларнинг барчаси тоза,
 Уз бурчини биладиган асл одамлар
 Ва рицарлик ҳурматини муқаддас сақлар.
 Корделия қилиб қўйган арзимас гуноҳ
 Кўзларимга жуда катта даҳшат кўриниб,
 Қалбимдаги унга бўлган муҳаббатимни
 Сафроларга айлантирган эди.

О, Лир, Лир, Лир!

(Уз бошига уради)

Ақл кетиб, тентакликлар кирган бу уйнинг
 Қопқасини қоқавер! Ҳей, қани одамлар!
 Кетдик.

Альбани

Подшоҳим, бу ишларда ҳеч гуноҳим йўқ,
 Ва билмайман нега бунча ранжиб қолдингиз.

Лир

Балки шундайдир!

Қулоқ сол эй, менга табиат.
 Э, маъбуллар, ўзгартиринг ўз ҳукмингишни,
 Бу махлуққа фарзанд насиб қилган бўлсангиз,
 Бефарзандлик ўти билан пуштин қуритинг.
 Тухми ўчсин, ич-ичидан ўртаниб кетсин,
 Қувонмасин, бир тирноққа зор бўлиб ўтсин!

Туғар бўлса, болалари зардоб туғилиб,
 Шодлик бетин кўрсатмасин ўз онасига.
 Ва уларнинг қийноғидан сўлим бетлари
 Фижим-фижим ажин бўлсин ва кўз ёшлари
 Ариқ очиб чеҳрасини барбод қилсинлар,
 Оналарин муҳаббати, эркалашига
 Мазах қилиб, ҳазар билан жавоб берсинлар.
 Ана шунда болаларнинг ота-онага
 Қиладиган ҳар беадаб, ношукурлиги,
 Илонларнинг тишидан ҳам ўткир эканин
 Пайқаб олар!
 Йўқол, йўқол, қўзимдан.

(Чиқиб кетади)

Альбани

Э қудратли парвардигор! Ўзи нима гап?

Гонерилья

Бу тўғрида диққат бўлма, парво ҳам қилма.
 Болалиги қўзгаяпти, чол тушмагурнинг.

Лир яна киради.

Лир

Ҳа, шундай де! Аъёнларнинг текис ярмига
 Икки ҳафта ичидәёқ жавоб берайми?

Альбани

Шаҳаншоҳим, айтсангиз-чи, ўзи нима гап?

Лир

Нима гап деб сўрайсанми? Ҳозир айтаман.

(Гонерильяга)

Қасам ичиб айтаманки, бу менга уят,
 Сен эркаклик журъатимни сустлатиб қўйдинг.

Эҳтиёрсиз қайноқ ёшлар кўзимдан оқар.
 Вабо, қуюн битмайдиган яра оғриги
 Ва оталик қарғишилари сенга ёғилиб,
 Ништар каби санчиб ўтсин ҳиссиётингни.
 Сиз ҳам энди йиғлайсизми, аҳмоқ кўзларим!
 Мен сизларни юлиб олиб ерга ташлайман,
 Майли тупроқ балчиқ бўлсин!

Бўлар иш бўлди.

Бисотимда ҳали менинг бошқа қизим бор:
 Мехрибон қиз, албатта, у мени овутар.
 Шу ишингни билиб қолса, тирноғи билан
 Юзларингни тимдалайди, урғочи бўри!
 Сен бир умр ташлади деб ўйлаб юрганинг
 Ҳокимият тизгинини қўлга оламан.
 Кўриб қоларсан, кўриб қоларсан, биллоҳи қасам!

Лир. Қент ва аъёнлар чиқиб кетади.

Гонерилья

Гапларини эшитдингми, эрим жонгинам?

Альбани

Сенга бўлган муҳаббатим ўбдан бўлса ҳам,
 Буғилари унча маъқул дёёлмайман...

Гонерилья

Сўрайман, бас! Освальд, ҳой, Освальд!
 Сиз-а, ҳали, масхарабоз эмас, ҳийлакор.
 Эгангизнинг орқасидан жўнаб қолинг-чи!

Масхара

Амаки Лир, амаки Лир, ҳо, Лир, тўхта, масхарангни ҳам ўзинг билан ола кет!

Қўлга тушган тулки деган беюзни,
 Е бўлмаса бунақа беюз қизни
 Хўш, нима қилмоқ керак?

Бўғиб ўлдирмоқ керак.
 Бўғган арқони учун
 Қалпогим бермак бўлдим.
 Мен аҳмоқ изинг қувиб
 Шошиб югурмак бўлдим.

(Чиқиб кетади.)

Гонерилья

Ростанам-а, чакки ўйланган эмас:
 Уз тушлари, гумонлари, ифвоси,
 Тентаклигин ҳимоя қилмоқ учун,
 Сену бизнинг ҳаётимизни доим
 Уз раъига қарам қилиб сақлашга
 Юз рицарнинг дағдағаси керакмиш.
 Освальд!

Альбани

Сенинг мунча қўрқувларинг ўринисиз.

Гонерилья

Ута лақма бўлганликдан шу яхши;
 Таҳлиқанинг олдин олиб қўйишлик
 Хавф ичидагандан маъқулроқ
 Мен отамнинг одатларин биламан.
 Айтганларин синглимга хатда ёздим,
 Шу хатимни ўқиб, қани кўрамиз
 Юз рицарни қандай кутиб оларкан...

Освальд қайтиб киради.

Айт-чи, Освальд,
 Синглимга ёзган хатни,
 Узинг билан олганмисан?

Освальд

Балли, маликам.

Гонерилья

Узинг билан одам олиб отга мин!
 Менинг бутун ташвишимни унга айт.
 Гапларимни тасдиқлашга, ўзинг ҳам
 Билганингни бир сидирға айтиб бер.
 Дарров жўна, тезлик билан қайтгил!

Освальд кетади.

Иўқ, йўқ, жаноб, тортинчоқлик одатингиз бор,
 Бунинг учун сиздан унча гина қилмайман,
 Аммо шунча камчиликнинг олдин олишда
 Керагича ақл ишлатмай, бўшлик қилди — деб,
 Сиздан ўпка қиладилар, мақтамайдилар.

Альбани

Мен билмадим: сен узоқни ўйлагандирсан,
 Лекин баъзан холис хизмат қилмоқчи бўлиб,
 Яхши ишнинг чатоғини чиқариш мумкин.

Гонерилья

Ундай бўлса...

Альбани

Қолганини кейин кўрамиз.

БЕШИНЧИ САҲНА

Герцог Альбани саройи олдидағи майдон.
 Лир, Кент ва Масхара чиқади.

Лир

Мана шу хатни олиб Глостернинг олдига бор.
 Қизим хатни ўқиб, ўзи сендан бирор нима сўрамагунча,

ўзинг ҳеч нима айтма. Агар сен шошмасанг, сендан олдин ўзим етган бўламан.

К е н т

Хатни олиб бориб топширмагунча ухламайманам, подшоҳим. (*Кетади.*)

М а с х а р а

Агар одамзотнинг ақли товонида бўлганда эди, бунинг ақли аллақачон қадоқ бўлган бўлмасмиди?

Л и р

Ҳа, дўстим.

М а с х а р а

Шундай бўлгандан кейин, ўйнаб-кул, барака топкур. Сенинг ақлингга туфлида юриш тўғри келмайди.

Л и р

Ҳа, ҳа, ҳа!..

М а с х а р а

Ана кўрарсан, бу қизинг сени астойдил туғишганлардай кутиб олади, чунки бу икки қиз бир-бирига ёввойи олма билан пайванд олма қандай ўхшаса, шундай ўхшаб кетади. Мен бир гапни биламан дегандан кейин биламан-да.

Л и р

Қани, сен нималарни биласан, дўстгинам?

М а с х а р а

Мен шуни биламанки, уларнинг иккита ёввойи олмадай маза-матралари бир хил. Сен ўзинг нега бурун юзнинг қоқ ўртасида эканини биласанми?

Лир

Йўқ.

Масхара

Чунки буруннинг ҳар икки ёнбошида биттадан кўз бўлиши учун: Киши бирор нарсани ҳидлар экан, кўриб туриши ҳам керак!

Лир

Еки мен қизимга ножўя муомала қилдиммикан...

Масхара

Сен шиллиқ қурт қандай қилиб ўз қобигини ясанни биласанми?

Лир

Билмайман.

Масхара

Мен ҳам айта олмайман. Лекин шиллиқ қуртнинг нима учун уйи бор эканини биламан.

Лир

Нима учун?

Масхара

Бу уй, ўз шоҳини қинсиз қолдириб, қизларига топшириш учун эмас, балки ўшангага бошини суқиш учун керак бўлади.

Лир

Шунчалик қўли очиқ оталик! Мен ўз табиатимни инкор қиласман! Отлар тайёрми?

Масхара

Сенинг эшакларинг отларни олиб келишга кетди.
Шу жумбоқни топ-чи? Нега Қатта Айиқ деб аталган
юлдузлар атиги еттита, холос.

Лир

Саккизта бўлмагани учунми?

Масхара

Топдинг. Сендан дуп-дуруст аҳмоқ чиқади.

Лир

Е бўлмаса ҳокимиятни зўрлик билан қайтариб ол-
саммикин? О, даҳшат даражада нонкўрлик, ношукур-
чилик.

Масхара

Агар сен менинг аҳмоғим бўлганингда эди, амаки-
жон, мен сени bemavrud, вақтидан илгари қартайиб
қолганинг учун дўпослар эдим.

Лир

Хўш, нега энди?

Масхара

Ақл тўлиб кирмагунча, қартайишлик бўлмайди-да.

Лир

Парвардигор, ақлим жўйма, ўзинг бер омон,
Куч-қувват бер, тентаклиқдан сақла, осмон.

Мулозим киради.

Лир

Қани, отлар тайёр бўлдими?

Мулозим

Тайёр, шаҳаншоҳ!

Лир

Кетдик, дўстгинам.

Масхара

Қизлар мени масхаралаб кулишса кулар,
Қачонгача қиз қолади, бир бало бўлар.

Парда

II ПАРДА

БИРИНЧИ САҲНА

Граф Глостернинг сарой қўраси.
Икки томондан Эдмунд билан Куран чиқиб келади.

Эдмунд

Салом, Куран.

Куран

Сизга ҳам, жаноб. Ҳозиргина мен отангизнинг ҳузурларида бўлган эдим. Бугун кеч герцог Корнуэль билан малика Регана бу ерга ташриф буюрар эканлар; шунинг хабарини олиб қелган эдим.

Эдмунд

Нима муносабат билан келишар экан?

Куран

Билмадим. Сиз янги хабарни эшитдингизми? Ҳозирча бу хабарни шивирлашиб гаплашмоқдалар, шунинг учун ҳам уни қулоққагина айтиш мумкин.

Эдмунд

Ҳеч нима эшитганим йўқ. Үзи нима гап?

Куран

Эшитдингизми, ҳойнаҳой герцог Корнуэль билан Альбани ўртасида уруш бўлар эмиш.

Эдмунд

Бир оғиз сўз эшитганим йўқ.

Куран

Хўп, ҳали эшитиб қоларсиз. Хайр, жаноб.
 (Кетади...)

Эдмунд

Герцог бунга келар эмиш? Яхши, жуда соз!
 Ишларимнинг ўринлаши учун шу керак.
 Уз акангни қамагил — деб отам буюрди:
 Бу машаққат вазифани бажариш керак.
 Эй, тақдиру қудрат, ўзинг менга ёрдам бер!
 Икки оғиз сўзим бор, ҳой, aka пастга туш.
 Тинглайсанми aka?

Эдгар чиқади.

Отам пайингга тушган.
 Вақт ўтказмай, бу ерлардан дарров қочиб қол.
 Унга кимдир қайдалигинг айтиб қўйибди:
 Жўнаб қол, бутун кўча ихтиёрингда.
 Корнуэлни сўкканмидинг, ростини айт-чи?
 Нима учундир, шошиб оқшом бунда келармиш,
 Ва хотини Регана ҳам у билан бирга.
 Сен уларнинг Альбани билан жанжалларини
 Бирор кимга тасодифан айтмаганмидинг?
 Едингга сол.

Эдгар

Едимда бор, чурқ этмаганман.

Эдмунд

Отам бунда келяпти. Мени кечиргин,
 Ёлғондакам қиличимни яланғочлайман;
 Сен сақланган бўлиб кўрин, ундан кейин қоч.
 Таслим бўл!.. у сени кўрса ҳам майли!
 Чироқ!
 Қоч aka.
 Ҳой, машъал ёқинглар.
 Хайр!

Акам билан олишганим чын бўлсин учун
Бир озгина қон чиқарай.

(Ўзини яралайди.)

Битта мастни танир эдим, кулги бўлиш-чун
Ўз ўзини яралайди.

Ота!

Ота!

Вой ёрдам беринг!

Глостер, хизматчилар қўлларида машъаллар билан
кирадилар.

Глостер

Эдмунд, у ярамас қани ўзи, қаёққа кетди?

Эдмунд

Шу ердайди, қоронғида, қўлида қилич.
Сўкинарди, лаънатларди, ҳаттоки ойни
Ёрдам бер, деб чақиравди.

Глостер

У ўзи қани?

Эдмунд

Ия, ия, қои-ку!

Глостер

Қани, қани ўша бадбахт, Эдмунд?

Эдмунд

Мени бунга кўндиришга кўзи етмагац
Қоча қолди.

Глостер

Тезроқ бўлинг, изидан қувинг.

Бир неча хизматчилар қувлайди.

Нима дединг? Нима ишга кўндира олмади?

Э д м у и д

Мени сизни ўлдиришга кўндиրмак бўлди,
 Унамадим, чунки ҳар бир ота ўлдирган
 Худойимнинг ғазабига гирифтор бўлиб,
 Бош устига ҳатто тоғлар қўпарилармиш.
 Чунки ота-ўғилларнинг орасидаги
 Боғланишлар жуда маҳкам ва муқаддасдир.
 Унинг бундай жиноятли суиқасдига
 Менинг ғоят зид ғазабим ошкор эди.
 Шуни дарров тушунди-ю, эпчиллик билан
 Ҳалигача тайёр турган қиличин олиб,
 Мен қуролсиз бўлган ҳолда, қўлимга чопди.
 Қарасаки, мен ҳам ортиқ чидаб туролмай
 Ҳақ иш учун курашишга ҳужум бошлайман,
 Еки менинг қичқиришим уни қўрқитиб,
 Бирданига қочиб қолди.

Г л о с т е р

Қайга қочса ҳам,
 Барибир у бу ерларда биқина олмайди,
 Қўлга тушди — иши тамом. Бу оқшом бизнинг
 Аслзода гердогимиз, пушти-паноҳим
 Бу ерларга келмакчиидир. Унинг номидан
 Эълон қилиб айтаманки: агар кимда-ким
 У бадкорни топиб, тутиб ҳукмга берса,
 Бизнинг чексиз ташаккурга сазовор бўлур.
 Ким яширса, ўша одам ўлимга маҳкум.

Э д м у и д

Аввал уни ўз қасидан қайтармоқ бўлдим,
 Заррача ҳам ён бермади, кейин қўрқитдим.
 Ҳамма гапни отамизга айтаман, десам,
 Менга жавоб бериб «эҳ-ҳе ҳароми»— деди.
 «Ҳали шундай ўйлайсанми, ҳуқуқсиз инсон,

Сенинг билан ади-бади айтишмак бўлсан,
 Сенинг бутун ихлосингга, тўғрилигингга,
 Сўзларингта бирор киши ишонардими?
 Иўқ, барчасин рад қиламан, ҳатто хатимни
 Ҳужжат қилиб кўрсатсанг ҳам, инкор қиламан.
 Булар бари сенинг менга қилган бўхтонинг
 Ва макрингдир, деб уқтираман. Сен ўйлайсанки:
 Ҳамма одам — аҳмоқ бўлган, тушунмайди — деб,
 Ахир менинг йўқолишим, ўлиб кетишим
 Сенинг учун қанча зарур, қанчалик фойда
 Сен бу гапни ич-ичингдан истамайсанми?»

Г л о с т е р

Вой, ашаддий муттаҳам-эй, шундай дедими,
 Ҳатто инкор қилармишми? У ўғлим эмас!

Саҳна орқасидан бурги овози.

Ҳап, герцогнинг бурғиси бу! Нега келдийкан?
 Қочолмайди; бекитамиз қалъя қопқасин.
 Бунинг учун герцог менга ижозат берар
 Ҳамма ерга суратини тарқатдираман,
 Қиролликда ҳамма кўриб уни танисин.
 Ер-сувимни, содик ўғлим, ишонган ўғлим,
 Сенгагина мерос қилиб берганим бўлсин!

Корнуэль, Регана ва уларнинг аъёллари кирадилар.

Корнуэль

Салом бўлсин, аслзода қадрдонимиз.
 Келар-келмас таажжуб бир хабар эшитдик.

Регана

Чиндан бўлса, қанча жазо берилса ҳам кам.
 Ярамасга жазо керак! Соғмисиз, граф?

Г л о с т е р

Кекса қалбим парчалаиган,

Дабдала бўлган.

Регана

Уз ўғлингиз ўлдирмакчи бўлдими, қандай?

Ўша ахир, Эдгарингиз менинг отамнинг
Чўқинтирган ва тутинган ўғилчасими?

Глостер

Уялгандан яширмоқчи эдим, маликам.

Регана

У, отамнинг хизматида бўлган бир тўда
Бебошбоқлар билан таниш-билишмасми?

Глостер

Билолмадим, маликамиз, машаққат, қайғу.

Эдмунд

Улар билан яқин таниш эди, маликам.

Регана

Демак, унинг ёмон хулқи таажжуб эмас,
Эдгарга ўз отангни ўлдир деб қистаб
Бойликларни баҳамжиҳат совуришмоқчи.
Ва опам ҳам шу тўғрида менга ёзибди.
Ушаларнинг хатаридан сақлангил, дебди.
Агар улар биз томонга келишмоқчи бўлса
Үйни ташлаб кетаману.

Кориуэль

Мен ҳам сен билан.
Эдмунд, сенинг бу кўрсатган қаҳрамонлигинг
Ўғилларнинг оталарга чин садоқати.

Эдмунд

Бу иш менинг бурчим эди, муҳтарам жаноб.

Г л о с т е р

Акасининг сунқасдин фош қиласман, деб
Олишаркан, яхшигина яраланди ҳам.

К о р н у э л ь

Орқасидан қувдиларми?

Г л о с т е р

Юбордик, жаноб!

К о р н у э л ь

Уни топиб келсинлар-чи, у ортиқ сизга
Зиён-захмат етказа олмас ва бундан буён
Унга қандай жазо бериш ихтиёргизда,
Мен бу ишда сизга тўла ҳуқуқ бераман.
Сен, Эдмунд, шу жасорат, итоат билан
Мақтовларга сазоворсан, шунинг учун ҳам
Бизга хизмат қилмоғинг шарт. Бизда айниқса
Сендай содиқ кишиларга эҳтиёж катта.
Ва биз сени биринчи деб ишга оламиз.

Э д м у н д

Ҳар аҳволда, садоқатли бўла оларман.

Г л о с т е р

Ўғлим учун сизга чуқур ташаккурим бор.

К о р н у э л ь

Сабабини биласизми, биз нега келдик?

Р е г а н а

Дабдурустдан, тим қоронги шундай кечада!
Фоят муҳим битта сабаб бизни қўзғатди.
Биз маслаҳат сўраб келдик, азиз Глостер.
Отамдан ҳам, опамдан ҳам икки хат олдик,

Икковларин ўртасида жанжал чиқибди.
 Уйдан четда, бундан жавоб берганим яхши.
 Икки чопар жавоб хатин кутиб турибди.
 Бир озгина тинчланинг-да, кекса қадрдон;
 Мана шу иш юзасидан маслаҳат беринг.
 Бундай ишни кечиктириш ҳеч ярамайди.

Г л о с т е р

Бошим усти, маликамиз,
 Қани марҳамат.

Чиқиб кетадилар.

ИККИНЧИ САҲНА

Г л о с т е р н и н г қасри олди.
 Бир томондан К е н т, иккинчи томондан Освальд
 чиқади.

О с в а л ь д

Тонг отаринг қутлуғ бўлсин, оғайни.
 Сен шу ерликмисан?

К е н т

Ҳа.

О с в а л ь д

Отларни қаерга қўйсак экан?

К е н т

Ҳов, анов кўлмакка.

О с в а л ь д

Сўрайман, ошиалик қил, тўғри айт.

К е н т

Мен сенга тубдан ошина эмасман.

О с в а л ь д

Бўлмаса, мен ҳам сени танимаганим, билмаганим бўлсин.

К е н т

Сен менга Липсбери яйловида йўлиқмадинг-да.
Бир татифингни бериб, ким эканимни кўрсатиб қўяр
эдим!

О с в а л ь д

Нега сен мен билан бундай қўрс муомала қиласатипсан?
Мен ахир сени танимайман-ку.

К е н т

Сен танимасанг, мен сени танийман, жонидан.

О с в а л ь д

Хўш, бўлмаса сенингча мен кимман?

К е н т

Сенми? Сен ёлғончи, муттаҳам, яллақихўр, даюс, суй-канчуқ, тубан гадой, кўски, ифлос, исқирт, қўрқоқ, шикоятчи, шум, жилпанг, хира олифтасан, сандиқча қўлтиқлаган малай, лаганбардорлик юзасидан қўшма-чилик қилишни ҳам хоҳлайсан, ҳақиқатда эса, ғирром билан қўрқоқ, гадой билан қўшмачининг аралашмасидан пайдо бўлган, пойлоқчи қанжиқнинг ўғли ва меросхўрисан. Агар сен шу мен айтган рўйхатдан бирорласини инкор қилсанг, шундай дабдалангни чиқараман-ки, вангиллаб қоласан.

О с в а л ь д

Ҳай, сен қанақа ярамассан, сен уни танимаган, у сени танимаган бир одамни шунақа ҳақорат қилаверасанми?

К е н т

Сен мени танимайман деяпсан, уятсиз, муттаҳам?
 Қирол олдида мен сени тойдирис, йиқитиб, адабингни берганимга икки кун ҳам ўтгани йўғ-у. Қиличингни суғур, ифлос! Ҳали қоронғиликка-ку қоронғи, ойнинг нури ҳам бўлаверади. Мен сени ойдан аралашган қўймоққа айлантириб юбораман. Қиличингни суғур, ҳой, тубан маҳлуқ, ярамас олифта.

О с в а л ь д

Йўқол! Менинг сен билан заррача ҳам ишим йўқ.

К е н т

Қиличингни суғур деяпман, ҳой, шумшук. Сен қиролга қарши ёзилган мактуб билан бу ерга келгансан. Сен ўз шаҳаншоҳ оталарига қарши қўзғалган ўша шуҳратпаст қўғирчоқларнинг тарафдорисан. Сенга қиличингни суғур деяпман, ҳой, тубан, мен сени қийма-қийма қилиб ташлайман. Қиличингни суғур, бемаъни олиш.

О с в а л ь д

Войдод, ёрдам беринглар! Үлдиряпти, ёрдам!

К е н т

Ботир бўл, ожиз банд! Ўзингни мудофаа қил, ҳийлагар, сақлан! Сеними, ҳу... кичик югурдак... олиш деяпман! (*Уни уради*).

О с в а л ь д

Ердам беринг! Войдод! Үлдиряпти!

Қўлида ялангоч қилич билан Эдмунд чиқади, орқасидан Корнуэль, Регана, Глостер ва мулозимлар.

Эдмунд

Нима ғовға? Нима гап бу? (Уларни ажратади.)

Кент

Хизматингизга тайёрман, ҳурматли ўспирин.
Марҳамат, сени ҳам қўноқ қилиб қўйишим мумкин.
Яқинроқ кел, гўдаккина.

Глостер

Бу қиличлар! Бу қуроллар! Нима гап ўзи?

Корнүэлль

Ҳаётини қадр қилган — дарров тўхтасии.
Ким қайтадан қилич янса, ўшанга ўлим.
Хўш, нима гап?

Регана

Опам билаи қиролдан чопар.

Корнүэлль

Нима учун жанжал чиқди? Қани айтингиз?

Освальд

Ҳансираоб қолдим, жаноб.

Кент

Бўлмасам-чи! Сен ахир бу курашда охириги нафасингача сарф қилиб олишдинг. Ирганч, қўрқоқ, сени ҳатто табиат ҳам инкор қилади. Сени дўзанда баҳиялаб тикиб яратган.

Корнүэлль

Сен қанақа тентаксан, одами ҳам дўзанда баҳиялаб яратса оладими?

К е н т

Албатта-да, буни тикувчи дўзанда яратган, жаноб.
Бўлмаса истаган тошчақар ҳам, бўёқчи ҳам ёппасига
икки соат уринганда ҳам бунчалик расво буюнни яра-
та олмас эди.

К о р н у э л ь

Бу жанжалнинг чиқишига сабаб нимада?

О с в а л ь д

Ҳаммасига сабаб бўлган манов дағал чол,
Оқ соқолин сийладим-у, саломат қолди.

К е н т

Вой, разил махлуқ-эй, сот-зотларга ўхшаш алиф-
бодаги кераксиз ҳарф. Жаноби олий, ижозат беринг,
мени бу эланмаган қабиҳни эзив упа қилайин, кейин у
билин бадрафнинг деворини бўяйман. Менинг оқ соқо-
лимни сийлаган эмиш-а! Вой, сен жиблажибон-эй!

К о р н у э л ь

Жим бўл, разил, ирганч банда, нима деган гап.
Унутдингми, лозим бўлган таъзим, ҳурматни.

К е н т

Унутмадим, жаноб олий. Аммо ғазаб ҳам ўз ҳақи-
га эга, ахир.

К о р н у э л ь

Ғазабинг нега?

К е н т

Шундай орсиз бандаларга қилич тутқазган
Кишилардан кўп хафаман. Бу суйканчуқлар,

Узиш ғоят мушқул бўлган алоқаларнинг
 Қутлуқ ипин каламушдай кемирадилар,
 Ва ўзлари хизмат қилган хўжайнинларин
 Расво хулқин — фазилатдай мақтайдилар ҳам,
 Алангага ёғ қуийиш-у, совуқлиқча кор,
 Лаббай, йўғ-эй, тарозидай ғоят риёкор
 Тумшуғини елга туттган куркунаклардай
 Эгаларин раъйин излаш буларга хислат.
 Эгасининг орқасидан итдай эргашар.
 Қинғир, майриқ, ҳу... бетингни кулгина боссин.
 Масхарадан кулган каби қағ-қағлайсан-а?
 Бирор қирда қўлгинамга тушмадинг, сен ғоз,
 Бир қағ-қағлаб қочишингни кўрган бўлардим.

К о р н у э л ь

Хой, мўйсафид, сен девона бўлган ўхшайсан!

Г л о с т е р

Бу жанжалнинг чиқишига сабаб нимади?

К е н т

Жаҳонда мен-у манов маккор сингари
 Яна икки зид кишилар бўлмаса керак.

К о р н у э л ь

Уни маккор деяпсанми, хўш, нима учун?

К е н т

Башарасин кўрсам жуда ҳазар қиласман

К о р н у э л ь

Шундай дегин, балки менинг ва бу срдаги
 Бошқаларнинг башарасиям сенга манзурмас?

К е н т

Хурматли зот, мен чин гапга одат қилганман:
 Ўз умримда, бугун бунда ўнгимда турган
 Елкаларга пайванд бўлган юзлардан кўра,
 Кўп ёқимли чеҳраларни кўриб тўйганман.

К о р н у э л ь

Қачонлардир тўғри айтган бир сўзи учун
 Мақтov олган кишилардан кўринади бу,
 Шундан буён ўша дағал филофга кириб,
 Жўрталикка кеккайди; гёё у содик,
 Мақтov билмас, тўғри сўзу чин кўнгил одам;
 Ишонсалар — яхши, йўқса — ўжар бўлади...
 Мен бундақа айёрларни яхши танийман:
 Саройларда эртаю кеч чин таъзим билан,
 Хизмат қилган ўн-ўн бешта хушомадгўйдан,
 Бундайларнинг ғирромлиги ортиқ бўлади.

К е н т

Жаноб олий, шу мукаммал виждони билан
 Осмондаги ярқираган сайёralарнинг
 Нуридаги шағшали оташ чамбарлар
 Ва мунаvvар чеҳраларга Фейба аксидек...

К о р н у э л ь

Бу қанақаси?

К е н т

Мен сизга унчалик ҳам ёқмайдиган содда тил услубимни ўзгартиromoқчиман. Мен ўзимни яхши биламан, жаңоб, хушомадгўй эмасман. Мабодо бирор киши сизни содда сўzlари билан лақиллатиб кетган бўлса, у

оддий алдамчилардан бири экан. Менга ғазаб қиласангиз, қила қоларсиз, аммо мен ўшандака одамлардан бўлишни истамайман.

Корнурэль

Сен буни ранжитганимидинг?

Освальд

Менми? Ҳеч.

Шу яқинда қирол, яъни бунинг хўжаси
Бир янгилик сабаб бўлиб мени урганди.
Шунда бу-чи, тўполондан фойдаланди-ю,
Орқа ёқдан келиб чалди, мени йикитди,
Тозза сўкли, тозза кулди. Шу қилган иши
Гўё унга қаҳрамонлик обрўсин берди,
Қиролдан ҳам анчагина мақтov эшилди.
Мен чидадим, ўша топда шу керак эди.
Қарабисизки, бу ерда ҳам ёлғон ботирлик,
Эсга тушиб, қиличини суғуриб қолди.

Кент

Вой ярамас,вой қўрқоқ-эй, сенинг олдингда,
Аякс деган паҳлавон итнинг боласи.

Корнурэль

Қани боринг, дарров битта кунда келтиринг,
Бу мақтанчоқ, ўжар чолга таълим берайлик.

Кент

Қариб қолдим, таълим олиб нима бўлардим.
Кунда нега? Мен қиролнинг хизматкориман.
Унинг зарур фармойишин сизга келтирдим.
Агар унинг элчисига кунда солсангиз
Бу қиролга ҳурматсизлик, таҳқир бўлади.

Корнүэль

Кунда беринг! Виждон билан ичаман қасам,
Кун оғгуинча шу кундада ўтириб турсин.

Регана

Кун оғгуинча? Иўқ, йўқ. Оқшом, бутун кечаси!

Кент

Мабодо мен отангизнинг ити бўлсанм ҳам
Менга шундай ёмон кўзла қарамасангиз.

Регана

Унинг ҳар бир қули билан муомалам шу.

Корнүэль

Ҳойнаҳой бу опам мени огоҳлантирган,
Гардани ғовус йигитларнинг оломонидан.
Қани ахир, кунда қани, келтирмайсизми?

Кунда келтирадилар.

Глостер

Жаноб олий, бу жазони қўйинг, сўрайман.
Бу гуноҳкор, аммо унга лойиқ жазони —
Марҳаматли қирол ўзи топиб беради.
Бу хил жазо, бадбахтларга, муттаҳамларга
Саёқларга, ўғриларга муносиб жазо.
Элчисига шундай жазо берилганини
Қирол билса, анчагина қаттиқ ранжийди.

Корнүэль

Бунинг учун якка ўзим жавоб бераман.

Регана

Хўш, опам-чи, у ҳам жуда қаттиқ ранжийдик.
У ҳам ўзин элчисига, хизмат вақтида
Шундай оғир ҳақоратлар бўлганин билса.
Қараб турманг, дарров буни кундага солинг.

Кентни кундага соладилар.

Қани кетдик, эрим, жоним.

Глостер билан Қентдан бошқа ҳамма чиқиб кетади.

Глостер

Ачинаман, азиз дўстим; герцогнинг амри:
Ҳамма билар, ўз раъидан қайтариш қийин.
Сенинг учун ҳимоячи бўлганим бўлсин.

Кент

Керак эмас, жаноб олий. Йўлда уриндим,
Ухламадим, дам оламан, тўйиб ухлайман.
Ундан кейин ҳуштак чалиб, эрмак қиласман.
Омад келса кундада ҳам бизни топади.
Ҳозирча хайр, омон бўлинг.

Глостер

Аммо герцогнинг
Иши чакки, оқибати ёмон бўлади.

(Кетади.)

Кент

Марҳаматли қиролимиз — «аввал бой эдим,
На қоқсанда қозиқ қолди ва на хурмача»,
Деган содда бир мақолнинг, рост гаплигига
Ўз тажрибанг билан энди ишонгандирсан.
Э, осмон гумбазининг ёруғ машъали,

Яқинрсқ жел, шу ҳаётбахш нуринг туфайли
 Битта хатни ўқиб олай. Шу аниқ бўлди,
 Мўъжизалар түғилармиш қайгу чоғида!
 Мен биламан, Қорделия ёзган бу хатни,
 Кимдир унга менинг қайда яширганимни
 Хабар берган бўлса керак, у ҳам ҳойнаҳой,
 Шундай оғир аҳволларда бизларни йўқлаб
 Ердам бермак бўлса керак.— Қўзларим толди.
 Оғирлашган қовоғларим, энди юмилинг,
 Шум босган шу хонадонга қарамаёқ қўй.
 Бахт тангриси, Ҳефуртуна, хайрли кеч бу!
 Биз томонга бир озгина табассум қилиб
 Толеларнинг ғилдирагин чаппа айлантир.

(Ухлади)

УЧИНЧИ САҲНА

Ўрмон

Э д г а р чиқади.

Э д г а р

Мен қонундан ташқари деб эълон бўлибман,
 Бир дараҳтнинг кавагига кириб яшириниб,
 Қувловчилар назаридан қутулиб қолдим.
 Қалъанинг ҳам қопқоқлари тамоман бекик.
 Қоровуллар қидирмаган бурчак қолмади.
 Қутулишим мумкин, фақат яшириниш керак.
 Жуда ожиз, ҳайвонсифат, ҳазар қилгудай
 Бир нотавон қиёфага киришим керак:
 Юзларимга балчиқ-қурум сурис ташлайман.
 Соchlаримни тўзғитаман ва эгнимга-чи
 Дағал, йиртиқ латта-путта боғлаб оламан.
 Бундан кейин бўронлару қуюн, тўфонга

Ширяланғоч яғрин билан туриб берамай
 Юртимизда санқиб юрган, Бадламдан келган
 Гадо — саққо оз әмас-ку, ана ўшалар
 Тентакларча фифон тортиб, уюшиб қолган
 Құлларига игна, хипчин, михларни тиқиб,
 Күринганга даҳшат солиб, тентиб юрарди.
 Қишлоқларда, чайлаларда, тегирмонларда,
 Бир күрсангиз аллакимга лаънат ёғдириб,
 Бир күрсангиз дуо ўқиб садақа йиғар,
 Вод шүрлик — Том!

Том аталсам, бу-ку баҳарнов.
 Аммо Эдгар отим билан — бу энди йўқлик.

ТҮРТИНЧИ САҲНА

Глостернинг саройи олди.
 Кентнинг оёғида кунда.

Лир. Масхара ва аъёнлар киради.

Лир

Жуда қизиқ, менинг учун чопар қолдирмай,
 Ҳаммалари бирваракай кетишиб қобди.

Аъёнлардан бири

Орқаворотдан эшитишимча, ҳатто кеча ҳам
 Кетишлари тўғрисида сўз бўлгани йўқ.

Кент

Салом бўлсин, шаҳаншоҳим!

Лир

Бу нимаси!
 Бу пастликни кулги бўлиш учун қилдингми?

К е н т

И ўр-эй, ундаимас!

М а с х а р а

Ха, ха, ха, қаранглар-а, жуда ҳам дагал боғичбоғ билан зийнатланибсан-ку. Отларни бошидан боғлайдилар, ит ва айиқларни бўйинларидан, маймунларни белларидан, одамларни эса оёқларидан боғлар эканлар. Агар одам боласининг оёғи жуда ҳам югурик бўлса, унга ана шундоқ ёғоч пайпоқ кийгизиб қўяр эканлар.

Л и р

Кимдир ўзи, сенинг олий рутбангга боқмай,
Бу кундага солиб қўйган?

К е н т

Улар иккови,
Куёв ўғил ва қизингиз.

Л и р

Йўқ-эй!

К е н т

Шундай!

Л и р

Йўқ-эй, деяпман!

К е н т

Шундай деяпман!

Л и р

Йўқ, йўқ, улар бу қилиққа ботинмайдилар.

Кент

Ботинадилар.

Лир

Юпитерга қасам бўлсин, бу мумкин эмас.

Кент

Юнонага онт ичаман, бу мумкин экан.

Лир

Улар бундай қилиқларга ботинмасдилар,
 Қиммасдилар ва қилолмас эдилар. Чунки
 Бизни бу тарз менсимаслик — ўлимдан оғир!
 Тезроқ айт-чи, сенинг қилган гуноҳинг нима?
 Улар қандай журъат билан менинг элчимга
 Шундай тубан муомала қила олдилар?

Кент

Шаҳанишоҳим, сиз амир этган мактубни олиб,
 Мен уларнинг саройига етганимдан сўнг
 Одат ҳукми тизза чўкиб, дарров толширдим,
 Бу таъзимдан туриб боқсан яна бир чопар
 Терлаб кетган, ҳансираиди, усти-боши чанг.
 Гонерилья номидан у салом топширди,
 Мендан кейин у ҳам битта мактубни берди.
 Улар дарров ўқидилар, минут ҳам ўтмай
 Аъёнларни йифдилар-у отга миндилар,
 Менга эса совуқ, қатъий; бизлар билан юр,
 Хатга жавоб олгунингча кутгин — дедилар.
 Бунида ўша чопар билан яна учрашдим.
 Ўша келиб, совуқликка дуч бўлдим, балки.
 Қарасамки, у, тунов кун жанобингизга
 Дағалликка ботина олган азамат экан.
 Жаҳлим чиқиб, эсу ҳушдан устинлик қилди,

Қиличимни ширр... суғурдим, у номард эса
 Қўрқанидан дод солди-ю, бутун уй турди.
 Күёвингиз ва қизингиз менинг бу қилган
 Қилиғимни шу уятга лойиқ топдилар.

Масхара

Еввойи ғозлар ҳали ҳам шу томонга учишларига
 қараганда, ҳали қиши келмаган экан. (*Куйлади.*)

Жулдуровоқи тўрва кўтарган ота
 Болаларга маъқулмас.
 Оталарнинг ғазнаси бўлиб катта,
 Давлатлари бўлса бас.
 Тақдир-чи, равшан нарса,
 Унинг қўли ҳеч қачон
 Силашга чўзилмайди
 Камбағал боши томон.

Бу гапларнинг ҳаммасидан шу маълум бўлиб турибдики, сен ўз қизингдан ҳали кўп совға-салом олар экансан, уларнинг ҳисобига бир йилда ҳам ета олмайсан.

Лир

Қандайдир бир оғриқ келиб қалбимни тутди.
 Бир тугунчак юқорига ўрмаламакда.
 Сенинг ўрнинг у ердамас, қуйироқقا туш.
 Қани ўша менинг қизим?

Кент

Граф қасрида.

Лир

Сиз орқамдан бора кўрманг.
 Шу ерда қолинг.

(Чиқади.)

А ъ ё н

Шундан бошқа ҳеч қанақа гуноҳинг йўқми?

К е н т

Йўқ.

Нима учун аъёнлар кам, қирол ёнида?

М а с х а р а

Агар сени мана шу саволинг учун кундага солғанларида эди, тамоман ҳаққоний иш қилган бўлардилар.

К е н т

Нима учун, аҳмоқ?

М а с х а р а

Биз сени чумолининг мактабига ўқишига берамиз: у сенга қишида ишлаш мумкин эмаслигини ўқитади. Қимнингки думоғи ҳид билса, қайси томонга юриш кераклигини кўзи билан кўриб билади; лекин кўр бўлмаслиги шарт. Сасиб ётган мурда олдидан ўтган йигирмата буруннинг ичиди шу ҳидни анқимаган бирор бурун то-пилмайди. Тоғдан пастга фидириб келаётган фидиракка ёпиша кўрма, бўйнинг узилади. Аммо бирор катта фидирак пастдан тоққа ўрмалаётган бўлса, ана унга ёпиш, чунки у сени ҳам ўзи билан баландликка олиб чиқади. Агар бирорта ақлли киши чиқиб қолиб, сенга бундан яхши маслаҳат берса, меникини ўзимга қайтариб бер: агар шу маслаҳатни бирор аҳмоқ киши бера турган бўлса, майли унга алдамчилар эргашсинлар.

Қимки пулга хизмат кўрсатса,

Узин ишда кўрсата олар.

Юқин боғлар сал ёмғир ёғса

Бўронда-чи зўр ташлаб кетар.

Мен қоламан — бу гапим аниқ;
Ақллилар қочар боякбор.
Маккор, аҳмоқ бўлиши мумкин,
Аммо аҳмоқ, бўлмайди маккор.

Кент

Сен қаердан ўргаигансан бу гапни, аҳмоқ?

Масхара

Кундаларга солинмасдан ўргандим, нодон.

Лир билан Глостер киради.

Лир

Кўришолмас эмишларми ҳозир мен билан?
Чарчагану қасалмишлар? Бутун қечаси
Юравериб толганимишлар! Бу барчаси важ!
Бу бир исён — қўзғолоннинг ўзгинаси-ку!
Дарров бориб бошқа маъқул жавоб олиб кел.

Глостер

Шаҳаншоҳим,

Биласизми, герцог сержаҳл,
Бир қарорга келиб қўйса, ундан қайтариш
Жуда мушкул, ўжар одам, тўнг бўйин одам.

Лир

Улим! Қасос! Вабо билан лаънатлар бўлсин!
Сержаҳл одам? Нима ўзи?

Глостер, Глостер,
Мен шу топда кўрмоқчиман
Герцогни ҳам, хотинини ҳам!

Глостер

Мен уларга буни айтдим, соҳибқироним.

Лир

Сен айтдингми? Үзинг мени тушуна олдингми?

Глостер

Балли, шаҳаншоҳ!

Лир

Қирол орзу қиласиди, кўрса — герцогни;
 Ота эса ўз суюмли қизчаси билан
 Сўзлашмоқчи. Итоатин кутиб турибди.
 Буни ахир сен айтдингми? Жоним, қоним у!
 Герцог эса сержаҳлми? Ўша сержаҳл
 Күёвимга айтиб қўйки... Йўқ керак эмас;
 Балки касал, вазифасин бажара олмас,
 Соғ кишига муқаддас бурч бўлган ишларни
 Бажаришда баъзан касал халақит берар.
 Ва табиат жонимизни танимиз билан
 Бирга қўшиб қийнаганда, бизлар — биз эмас.
 Мен кутаман, ўзимдаги бу ўжарликни
 Хўп коййман; касал киши билан соғлардек
 Муомила қилиш ахир мумкин ҳам эмас.

(Кентга қарайди.)

Бошимизга ўлим, оташ-жаҳаннам ёғсин!
 Нима учун бу кундага солинди, ахир?
 Шу қилиқнинг ўзи равшан айтиб турибди;
 Ўша ердан жўнашларин ўзи бир ҳийла.
 Буни дарров бўшатинглар! Сен бориб айтки,
 Мен шу соат ҳар икковин кўрмак истайман.
 Тезлик билан, ушбу ерга етиб келсинлар,
 Йўқ эса-чи ўзим бориб эшикларини
 Муштлайвериб уйқуларин қочиришим рост.

Глостер

Икки ўрта тотувчилик бўлса яхши-да.

(Чиқади.)

Л и р

Тағин ўша тугун, юрак томон келмоқда!
Пастроққа туш!

М а с х а р а

Ха, ҳа, қичқиравер, амаки, ошпаз хотин илон балиқларга қичқиргандай қичқиравер. Ўша хотин сомсаға тирик балиқларни сола туриб, уларнинг бошига урад эди «жим туринглар, ярамаслар, жим туринглар!!» Ўша ошпаз хотиннинг укаси чавандоз эди. Отларини шундай севар эдики, пичанга сариф мой қўшиб боқар эди.

Г л о с т е р, К о р н у э л ь, Р е г а н а в а м у л о э и м л а р
киради.

Л и р

Иккингизга салом бўлсин!

К о р н у э л ь

Салом, шаҳаншоҳ!

Кентни бўшатадилар.

Р е г а н а

Сизни кўриб кўп қувондим, ёруғ юзлигим.

Л и р

Ишонаман, Регана бу ишончимга ҳам
Сабаблар бор, агарда сен қувонмасайдинг
Мен онангнинг тупроғини сўккан бўлардим,
Бир сатангнинг ҳоки ётган мозор ушбу деб.

(Кентга қараб)

Ха, ҳа, ахир, бўшадингми? Бу гап кейинроқ.
Сенинг опанг — ёвуз экан, дўстим Регана!
У шунчалик қаҳри қаттиқ, кўрнамак экан.
Юрагимга калхат каби чангалин солди.

(Юрагини кўрсатади.)

Айтаверсам сўз етмайди, сен ишонмайсан,
У шунчалик жирканч ғазаб билан... Регана!

Регана

Сўрар эдим, тинчлансангиз. Менинг фикримча,
Опам сизга ҳурматини унутмасданоқ
Сиз опамнинг қийматини унумоқдасиз.

Лир

Нима дединг, бу нима гап?

Регана

Ишонаманки,
Опам зарра бўлса унуганча йўқ.
Фақатгина, яхши ният, муроса учун
Аъёнларнинг тўс-тўполон қилиқларини
Босмак бўлиб шундай чора кўрган эҳтимол.
Шундай бўлса, бу туҳматлар унга ўринисиз.

Лир

Унга лаънат!

Регана

Отажоним, қариб қолдингиз,
Ешиңгиз ҳам маррасига бориб тақалди:
Энди сизни етакловчи, йўлга солувчи
Истагингиз нима бўлса, сиздан яхшироқ
Шу истакни тушунувчи ғамхўр, меҳрибон
Ва донороқ кишиларнинг ёрдами керак.
Сўрар эдим, дарров опам олдига бориб,
— Биздан ўтди,— деган бўлиб кечирим сўранг.

Л и р

Кечирим сўраш? Ота бориб — ўз қизидан?
маъқул маслаҳат!
— «Қизим, жоним, қариб қолдим, қариллик
қурсин,
Тизза чўкиб ўтинаман, шу нотавонга
Қийим-бош бер, бошпана бер, озиқ-овқат бер!»

Регана

Бас, етарлик! Бундай ҳазил сизга эпмас.
Дарров қайтинг!

Л и р

Иўқ, Регана, мен ҳеч қачон қайтиб бормайман.
У тепла-тенг қисқартирди аъёнларимни,
Қора булат каби қараб, илон тил билан
Найзасини қоқ қалбимга санчиб олди у.
Эй осмон қасослари, у кўрнамакнинг
Бош устида уввос солинг, гулдурос солинг.
Вабо билан заҳарланган ҳаво, сен унинг
Бутун наслин дўзахларга гирифтор қилгил.

Корнуэль

Уят, уят, шаҳаншоҳим!

Л и р

Эй, чақинлар, сиз оташин нурингиз билан
Унинг ўткир кўзларини ўйиб туширинг!
Қуёш нури чуқурликдан кўтариб чиқсан
Эй сиз ботқоқ туманилари, унинг ғурурин
Ва жамолин несту нобуд қилинг, оғулланг!

Регана

Вой худойим! Фазабингиз чиқсан минутда
Бизларни ҳам шундай қарғаб қоларсиз, балки?

Л и р

Йўқ, Регана, йўқ, йўқ, қизим, сени ҳеч қачон!
Нозик таъбинг бу қаргашга муносиб эмас.
Унинг кўзи-қошлари ҳам ғоятда даҳшат.
Сеники-чи кўнгилларга берар тасалли.
Сен, албатта, менинг эркин турмушим бузиб,
Аъёнларим сонини ҳам қисқартмас эдинг,
Сўзда чақиб, харжимни ҳам шунча қисқартиб,
Энг охири юзимга ҳам эшик ёпмасдинг.
Узинг яхши тушунасан, табиий тортим,
Ота, қизлик муҳаббати боғланишлари,
Ўз бурчига назокатни талаб қиласди;
Сен, албатта, унутмайсан, ахир, мен сенга
Подшоликнинг бутун ярмини бериб қўйибман.

Р е г а н а

Сўрар эдим, муддаога яқинроқ келинг.

Л и р

Ким кундага солди менинг мулозимимни?

К о р н у э л ь

Кимнинг бурги овози бу?

Р е г а н а

Опам келгандир.

О с в а л ь д қ и р а д и .

Езган эди, Маликангиз бирга келдими?

Л и р

Мана бу қул! Хўжайнилар унга кўрсатган
Кўп ишончсиз марҳаматдан шишиниб кетиб,
Шу омонат ғууррга ҳам эга бўлибди.
Қоч кўзимдан, тубан малай.

Корнуэль

Бу нима ўзи?

Лир

Кундага ким солди дейман мулозимимни?
Сен, Регана, бу ишлардан бехабардирсан?
Келаётган ким?

Гонерилья киради.

Эй осмон, қариларга шафқатинг бўлса,
Жорий бўлса, мутеъларга меҳрибон ҳукминг,
Агар сенинг қадимлигинг барқарор бўлса
Бир имою ишорат қил, менга ҳоми бўл!

(Гонерильяга.)

Тагин менга қарайпсан, уялмайсанми?
Сен Регана, нега унга қўл беряпсан?

Гонерилья

Нега ахир қўл бермасин? Гуноҳим нима?
Эсдан жўйган кишиларга гуноҳ кўринган
Ҳар қандай иш ҳақиқатда гуноҳ бўлмайди.

Лир

Оҳ, юрагим, сен шунчалик бевафомисан?
Шунча оғир гапларга ҳам бардошинг борми?
Ким, деяпман, хизматчимни кундага солган?

Корнуэль

Мен солганман, шаҳаншоҳим! Қилган гуноҳи
Бундан оғир жазога ҳам сазовор эди.

Лир

Сен сојдингми? Сен-а?

Регана

Қўйинг энди, отажон!
 Бедармонсиз, ўзингизни унча урнатманг.
 Аъёнлардан бир қисмига ижозат бериб,
 Шу ойгина олам билан яшаб турингиз.
 Ундан кейин бизникига кела қоларсиз.
 Ҳозир эса, уйдамасмиз, қабул қилмайман,
 Ҳурматингиз бажо қилиб кута олмайман.

Лир

Аъёнларнинг қоқ ярмига ижозат бериб,
 Яна унинг даргоҳига қайтиб борайми?
 Йўқ, яхшиси бу шафқатнинг баҳридан кечиб
 Бошим олиб кетажакман дала-тузларга.
 Бойқушларга, бўриларга улфат бўламан.
 Мұхтоҗликнинг ўткир тиши! Қайтар эмишман?
 Ундан кўра кенжак қизни гадо ҳолида
 Олиб кетган ўша ўжар француз томон
 Дарров бориб, қуллар каби тизимни букиб,
 Ушбу аянч ҳаётимда эҳсон сўрайман.
 Яна унинг даргоҳига қайтиб борайми?
 Ундан кўра қул бўлишни афзал кўраман.
 Шу ифлоснинг жонивордай юкин ташийман.

(Освальдни кўрсатади.)

Гонерилья

Ихтиёргиз!

Лир

Ҳой қиз, мени қутуртирма! Ва бундан кейин
 Озорим йўқ. Болаларим, хайр!
 Бундан кейин кўришмаймиз, учрашмаймиз ҳам,

Ҳар ҳолда сен вужудимсан, қоним, қизимсан,
 Вужудимга битган дардсан, яна тўғриси,
 Ўздан чиқсан бало бу деб иқрор қиласан.
 Сен шу оғриқ қонимдаги йирингли яра,
 Ирганч шишсан. Таъна нима учун?
 Чақирмайсан, уят деган ўзи келади.
 Мен қасосга чақинларни чақирмайман ҳам,
 Юпитерга қила турган шикоятим йўқ.
 Ўз хулқингни тузатиб ол, қўлингдан келса,
 Бир озгина бошқача бўл: чидаб тураман.
 Мен ҳозирча Реганада яшашим мумкин!
 Юзта аъён менинг билан бирга бўлади.

Регана

Йўқ, ҳозирмас, мен сизни ҳеч кутмаган эдим,
 Ҳурматингиз бажо қилиб кута олмайман,
 Опамга ҳам қулоқ солинг. Сизнинг шунчалик
 Жаҳлингизга парво қилмай қараган одам
 Тушунади, сиз кексайиб қолган кишисиз,
 Опам, ахир, ўз ишини билиб қиласди.

Лир

Сенинг фикринг шуни ўзи, шундай әмасми?

Регана

Үйлашим шу, дарҳақиқат элликта аъён,
 Сизнинг учун кифоядир? Кўпи не ҳожат?
 Шунчасини ушлаб туриш хавфли ва қиммат.
 Бир уй бўлса ва иккита хўжайн бўлса,
 Шунча ходим муросаси чиқишаармикан?
 Үйлашимча, жуда қийин, мумкин бўлмайди.

Корнүэль

Нима учун, шаҳаншоҳим, бизнинг, опанинг
 Одамлари сизнинг учун хизмат қиласин?

Регана

Хўш, нима учун? Агар улар сизга нисбатан
Беадаблик қилар бўлса, танбиҳ берамиз.
Сиз мабодо менинг билан турмак бўлсангиз
Ҳар қандайин хавф-хатарнинг олдини олиб,
Кўп деганда йигирма беш хизматчи олинг,
Ортиғини қўймайман ҳам, харж ҳам бермайман!

Лир

Мен сизларга топшираркан ҳамма нарсани...

Регана

Бу иш жуда ўз вақтида бўлган иш эди.

Лир

Мен сизларга ўз ҳукмимни ва давлатимни
Топшираркан, юзта аъён мен билан бирга
Қолади деб шарт қўйганман. Энди сен эсанг,
Фақатгина йигирма беш киши бўлсин, деб
Айтяпсан, Регана хўш, шундай дедингми?

Регана

Шундай дедим. Ортиғини қабул қилмайман.

Лир

Ёмон одам, кўп ҳам ёмон кўринмас экан
Ёвуз билан қиёс қилиб кўрсанг, албатта.
Энг ярамас саналмаган
Шаксиз яхшироқ бўлгай.

(Гонерильяга.)

Сеникига борай, майли. Сен эллик дединг,
Эллик, ахир, икки марта йигирма беш-ку,—
Икки ҳисса ортиғини сен севасан-ку.

Гонерилья

Шаҳаншоҳим,

Йигирма беш нимага керак?
 Ўнни айтинг, бешни айтинг — шу ҳам ортиқча.
 Сиз борсангиз, хизматингиз учун берармиз.
 Керагидан икки ҳисса ортиқ мулозим.

Регана

Менга қолса бир нафар ҳам одам керакмас.

Лир

Менга нима кераклигин қайдан биласан?
 Жуда ожиз бир гадо ҳам эҳтиёжига
 Керагидан ортиқчароқ нарсага эга.
 Агарда сен фақатгина эҳтиёж учун
 Зарур бўлган нарсаларнинг ўзини берсанг
 Одамизод ҳайвон билан тенглашиб қолур.
 Чунончи, сен бекач хотин. Зийнат не керак?
 Табиатга иссиқина кийим кифоя:
 Бу ясанлар вужудингни иситмайди-ку —
 Олифталик бизнинг учун нимага керак?
 Э, осмон, керагича менга чидам бер!
 Э худолар, олдингизда бир бечора чол,
 Оғир қайфу, баҳтсиз умр уни ранжитган:
 Ёки сизлар сабаб бўлиб қизларнинг қалби
 Отасига қарши шундай газабли бўлса,
 Шунинг ўзи кифоядир, бундан ортиқча
 Ўз устимдан ҳақоратга чидай олмайман,
 Шунга тўзим беришга ҳам сиз мадад беринг,
 Юрагимда эзгу қасос ўтини ёқинг!
 Эркак юзи, хотинларнинг қуроли бўлган
 Йишлилар билан булғонишга ижозат берманг.
 Сиз ёвузлар, қараб туринг, ҳар иккингиздан
 Шундай қасос олайин-ки, бир бутун олам...
 Шундай ишлар қилайинки, билмайман нима:

Ҳар ҳолда мен коинотга даҳшат соламан.
Сиз нима деб ўйлаяпсиз, мен йиғлайманми?
Иўқ, йиғлаётганим йўқ.
Ўкирсам ҳам бўладиган сабаблар бор-ку,
Йиғламасдан бурун менинг бечора қалбим,
Минг бўлакка парча-парча бўлиб кетади
Ҳой, масхара, ақлдан озаётубман:

Лир, Глостер, Кент, Масхара чиқиб кетади.

Корнуэль

Биз ҳам кетдик. Қуюн, довул яқинлаб қолди.

Момақалдироқ, узоқдан бўрон овози.

Регана

Үйимиз тор; чол шунча кўп аъёнлар билан
Кичик жойга сиғишмайди.

Корнуэль

Ўзидан кўрсин:

Тинч, осойишта яшамакни истамас экан,
Пушаймонлар бўла қолсин тентаклигидан.

Регана

Елғиз ўзин, майли, хўп деб қабул қиламан,
Аъёнлардан бирортасин қўймайман, аммо.

Гонериля

Мен ҳам шундай.

Ҳа, дарвоқе, Глостер қани?

Корнуэль

Чол изидан кетган эди. Ана ўзи ҳам...

Глостер киради

Г л о с т е р

Кирол,—

Қаттиқ ғазабдадир.

К о р н у э л ь

Қайга кетармиш?

Г л о с т е р

Отланинг деб буюрди-ю, қайга, билмадим.

К о р н у э л ь

Истагани. Кўнгли чопган томонга кетсин.

Г о н е р и л ь я

Ва раъидан қайтаришнинг кераги ҳам йўқ.

Г л о с т е р

Афсусларки, тез орада оқшом чўкади,

Теваракда ғуввос билан бўрон эсмоқда.

Гир атрофда бир тиккайган қора дараҳт йўқ.

Р е г а н а

Эй муҳгарам, бундай ўжар одамлар учун

Ўз бебошибоқ иродаси натижасида

Бу баҳтсизлик яхшигина сабоқ бўлади.

Тез қалъанинг қопқаларин бекитмоқ керак!

Унинг билан бирга бўлган саёқ оломон

Чолни ҳар бир йўл-йўриққа бошлиши мумкин.

Ва уларга астойдил қулоқ солади,

Маслаҳат шу, эҳтиётроқ бўлайлик биз ҳам.

К о р н у э л ь

Дарвозалар бекитилсин. Қоронги кеча.

Ва бўрондан қочиш керак. Яхши маслаҳат.

Кетадилар.

III ПАРДА

БИРИНЧИ САҲНА

Чўл

Бўрон

Саҳнанинг икки томонидан Кент ва бир сарой кишиси келиб чиқади.

Кент

Хе, бу ерда ким бор яна бўрондан бошқа?

Сарой кишиси

Жони худди бўрон каби нотинч бир одам.

Кент

Мен-ку сизни танияпман, қирол қаерда?

Сарой кишиси

У қутурган офат билан баҳслашмоқда.

У бўрондан ер юзини битта уфуриб,

Денгизларга супуришни, ёки бўлмаса

Аёв билмас тўлқинларга итқитишни

Сўрамоқда, токи ерда бор, мавжуд нарса

Ё ўзгарсин ёки тамом йўқолсин эмиш:

Оқ соchlарин юлқимоқда ғазаби билан,

Бўрон эса тарқатмоқда ҳурмат қилмасдан,

Инсонга хос кичик — ожиз жони билан у —

Баҳлашиб енгмоқчидир ёмғир, шамолни.

Бу оқшомда овга чиқмас урғочи айик

Маммасида бирор қатра сут қолмаса ҳам,
 Арслон билан озгин бўри қуруқ ер излар
 У бўлса-чи, боши очиқ, тентиб юрибди.
 Гўё сўнгги соатларни кутар беқарор.

Кент

Бирор киши бор эканми у билан бирга?

Сарой кишиси

Ёлғизгина Масхара бор унинг ёнида
 Ҳазил билан жўймак бўлар қалб аламини.

Кент

Мен танийман сизни, худди шунинг учун ҳам
 Ишонаман, битта зарур сир бор, айтаман.
 Альбани ҳам Корнуэллинг ораларида
 (Гарчанд икков ҳийла билан сирин бой бермас)
 Кўпдан бери ҳукмрондир келишмовчилик.
 Осмоннинг раъи билан тахтга ўтирган
 Барча шоҳлар каби энди бу икковининг ҳам
 Атрофида талай ходим, мулозимлар бор,
 Булар бари баққановуз, жосус кишилар.
 Хизмат қилар тўппа-тўғри французларга.
 Юртимиизда не иш бўлса уларга аён.
 Чол қиролга қилинмоқда бўлган сиқиқлар,
 Герцогларнинг ўртасида бўлган зиддият,
 Балки бундан яна нозик кўп сирлар маълум.
 (Ва билингки булар бари — сўз боши, холос.)
 Шу ҳам аниқ, Фарангларнинг катта қўшини
 Ола-ғовур ўлкамизга босиб келмоқда.
 Улар яширин, бизнинг муҳим портларимизда
 Қирғоқларга аскар тўккан, энди биз билан
 Очиқ жангга кириш учун тайёр турибди.
 Агар менга сиз ишонган бўлсангиз, дарров
 Девор томон ошиқингиз ва у ерда сиз
 Кишиларни учратарсиз ва ўшаларга

Қиролимиз тортаётган ва кўз кўрмаган
 Бутун жабру жафоларининг ростини айтинг.
 Улар сизга керагича берар мукофот.
 Мен ҳам оддий киши эмас, сизни тамийман,
 Сизга жуда ишонаман, шунинг учун ҳам
 Шундай нозик топшириқни сизга бераман.

Сарой кишиси

Сиздан шуни сўпар эдим.

Кент

Иўқ, керак эмас.
 Шу топдаги кўринишими шубҳа туғдирап.
 Ҳақиқатда анчагина қиммат тураман,
 Бу ҳамённи олиб қўйинг, далили учун,
 Ва ичидা нима бўлса бари сизники.
 Сиз у ерда учратасиз Корделияни,
 Ва албатта учратасиз, имоним комил,
 Унга мана шу узукни нишон берсангиз:
 У ҳам сизга шу топдаги суҳбатдошингиз
 Ким эканин айтиб берар. Бўронни қаранг,
 Мен қиролни қидиришга бораман энди.

Сарой кишиси

Мана сизга, менинг қўлим! Бошқа гап йўқми?

Кент

Ҳаммасимас, жуда зарур битта иш қолди.
 (Бу томондан сиз борасиз, бу томондан ман.)
 Ким биринчи топа қолса қиролимизни,
 Уртоғига хабар берсиз шу онидаёқ.

Икки томонга кетадилар.

ИҚКИНЧИ САҲНА

Чўлда бошқа бир жой.
Бўрон давом қилмоқда.

Лир билан Масхара чиқади.

Лир

Қутур шамол, уфуравер, лунжинг ёрилсин.
Сиз жалалар ва қуюнлар шу қўнғироқли
Миноралар, гумбазларни тамом гарқ қилинг!
Сиз чақинлар олтингугурт ўтидан бўлган,
Қари азим эманларни парчалагувчи,
Фикрдан тез учалгувчи найзангиз билан
Менинг оппоқ шу бошимни куйдириб ташланг!
Ер куррасин эзид ташла, момақалдироқ.
Табиатнинг шу азали шаклини ёмир,
Бу кўрнамак одамларнинг наслини қурит!

Масхара

Рост амакижон, саройда — қуппа-қуруқ хонада,
шишаларда турадиган муқаддас сув — обизамзам, очиқ
ҳаводаги ёмғир сувига қараганда анча кўркам экан.
Марҳаматли амаки, юр кетамиз, бориб қизларингдан
уэр сўра. Бунақа бўрон ақллини ҳам, аҳмоқни ҳам
сийлаб турмайди.

Лир

Ўкиравер! Чақинавер! қуявер ёмғир.
Гулдирашув, чақин, ёмғир — табиий оғат
Менинг қизим эмассизки бунча зулм учун
Мен сизларни қаррасаму ё гина қилсан.
Мен сизларга подшоҳликни топширмаган,
Ва сизларни ўз болам деб атамаганман:
Сизлар менга муте бўлган қудрат эмассиз.
Даҳшат тўла эрмак учун қутураверинг.

Шу ердаман, қулингизман, бир афтода чол.
 Ҳамма ундан ҳазар қилар, кучсиз, нотавон!
 Бугун сизлар, фармонбардор мулозимлардай
 Менинг золим қизларимга ёрдам бергали
 Ўзингизда бўлган бутун кўк қудратини
 Шу мўйсафид қари бошга ёғдирмоқчисиз.
 Қандай уят! Уят сизга!

Масхара

Кимнингки бош устида бошпанаси бўлса, ўшанинг
 боши ҳам ўз ўрнида.

Ҳар кимники иштони битта
 Ва бошида томи бўлмаса
 Уйланмасдан ўтсин албатта.
 Битлайверсин қўлидан келса.
 Кимни қалби товонидадир
 Тез фурсатда босади қадоқ.
 Тинч ухлашлиқ унга қайдадир
 Додлаб чиқар тонггача уйғоқ.

Чунки ойнага қараганда юзининг ажва қилишини
 ёқтиримайдиган гўзал жаҳонда топилмайди.

Лир

Йўқ, йўқ, энди мен чидамда ўрнак бўламан.
 Бир оғиз сўз сўзламайман!

Кент киради.

Кент

Бу ерда ким бор?

Масхара

Ким бўларди, улуғворлик билан масхарабозлик-
 нинг иштони бор, битта ақлли билан битта аҳмоқ.

К е н т

Бу сизмисиз, шаҳаншоҳим? Нима деган гап!
 Бу оқшомдан кечасилик ҳайвонлар қўрқар:
 Кўк ғазаби, шу зулматга ўрганган ваҳший
 Ҳайвонларни ин-инига қувиб киргазди.
 Мен ўзимни танигандан буён бунчалик
 Зўр чақинни, гулдуросни, бўрон, қуюнни
 Қўрмаганман, катталардан эшитмаганман.
 Бу даҳшатга одамзоднинг чидаши қийин.

Л и р

Майли, бизнинг бошимизда ўкираётган
 Шу яздонлар, ўз ёвини қидириб топсин.
 Бу даҳшатдан қилган иши қонундан яширин
 Жинояткор қалтираши, қўрқиши мумкин!
 Кушандалар, ўз қон юқи милкингни яшир.
 Қўринишга гуноҳсиздай қўриниб, аммо
 Дилярида қотилликка сунқасди бор,
 Қасамхўрлар, қон булғовчи жунун, ярамаслар,
 Риёкорлик қобигига бурканган шахслар,
 Ана шулар қалтирасин, даҳшатга тушсин.
 Яширин гуноҳ, ўз устингдан ниқобингни от!
 Омон сўраб, кўк кучига қилғил илтижо!
 Мен эса-чи, гуноҳи оз битта одамман,
 Бошқаларнинг гуноҳи кўп менинг олдимда.

К е н т

Қандай қайғу!

Бошяланг-а, ҳе подшоҳим!

Шу яқинда бир чайла бор бошпана берар,
 Бўрондан ҳам биқинасиз. Мен эса ҳозир
 Тош иморат эшигига. қайтиб бораман.
 Биламанки, у ердаги кишилар қалби
 Шу иморат бино бўлган тошлардан қаттиқ.
 (Сизни излаб ўша томон борган эдим мен

Эшикни ҳам очмадилар, йўлатмадилар.)
 Кучим етган даражада тортиб-талашиб,
 Қиттаккина шафқатларин юлқиб оламан.

Лир

Мен эсимни жўяётибман.

(Масхарага)

Юр оғайни. Сен ҳам бунда совуқ қотибсан.
 Мен увушдим.

(Кентга)

Уша чайланг қаерда, дўстим?
 Е таажжуб! Бу эҳтиёж зўрин кўрсатса
 Арзимаган нарсалар ҳам қадр топаркан.
 Чайланг ўзи қай томонда? Шўрлик Масхарам.
 Юрагимдан бир бўлаги сенга ачинар.

Масхара

(Куйлайди)

Ҳар ким бир оз ақлу ҳушга хўжайин бўлса,
 Унинг учун ҳай-хуй демак шамол ва ёмғир,
 Тақдир унга не юборса ўшангра рози.
 Куни бўйи ёғмайдими ёмғир тинмагур.

Лир

Гапинг тўғри.

(Кентга)

Қани, бизни чайлангга бошла.

Лир билан Кент чиқади.

Масхара

Мана бунағанг кеча, ҳар қандай қичиқ хотиннинг
 ҳам таптини босиб қўя олади. Қани энди кетишдан
 илгари жиндаккина пайғамбарлик қилиб қўяй:
 Поплар халқقا ёлғон гапни айтмайдиган кун,

Пивочилар сув қўшмаса пивога бу кун,
 Сен даҳри — деб шўрликларни дорга осмасдан,
 Ёлғондакам ошиқларни ёқса тўсатдан,
 Судъялар ҳам гуноҳсизни ҳукм қилмаса,
 Бирор одам бошқасидан қарздор бўлмаса,
 Бўхтончининг тили тубдан қирқилиб кетса,
 Судхўр бутун пулларини чуқурга тиқса,
 Кисовурлар ёт чўнтақни ковламай турса,
 Қўшмачи-ю бузуқ хотин маъбатлар қурса,
 Яқин Урта Англияда бўлар шу замон,
 Мамлакатни чулғаб олур улуг ҳаяжон.
 Шундай замон тез фурсатда етиб келади,
 Шунда ҳамма оёғини босиб юради.

Бундан бўёнги пайғамбарликни Мирлин деган сеҳргар қиласди, чунки у мендан кейин ёруғ дунёга туғилади.

УЧИНЧИ САҲНА

Глостер саройида бир хона.
 Глостер билан Эдмунд чиқади.

Глостер

Афсус, афсус, Эдмунд. Буларнинг одамзод щаънига келишмайтурган муомилалари менга маъқул бўлмай қолди. Мен улардан нима билан бўлса ҳам унга бир оз ёрдам бериш учун ижозатларини сўраган эдим, улар аввалига менинг ўз уйимни эгаллаб олдилар, кейин ҳамиша назардан туширамиз деган қўрқитиш билан унинг ҳатто отини аташни ва унинг учун қайси йўл билан бўлмасин ёрдам сўраб мурожаат қилишимни ҳам қатъян ман қилдилар.

Эдмунд

Бу ғоятда қаттиғлиқ ва одатга зид гап-ку.

Г л о с т е р

Мана бу гапга қара, лекин бу тўғрида ҳеч кимга чурқ этиб оғиз очма. Ҳар икки герцог ўртасида келишмовчилик бор, балки келишмовчиликдан ҳам ўтқирроқ гап бор. Бугун кечқурун мен хат олдим, бу тўғрида гапиришнинг ўзи ҳам хавфли, мен бу хатни яшириб қўйдим. Қиролга берилаётган шунча озорлар, яқинда ўз жазосини олади. Қўшинларнинг бир қисми қирғоқ-қа тушиб бўпти. Биз қирол томонда туришимиз керак. Мен уни қидириб топиб унга ёрдам бераман. Сен тез бор, герцогни овунтириб тур, менинг йўқлигимдан хабардор бўла кўрмасин.

Агар мени сўраб қолса, касал деб айт, кўрпа-тўшак қилиб ётибди де. Майли, мен таҳдид остидаман. Шу ҳақ иш учун ўлсам ўларман, аммо ўз қиролимга, ўз эски ҳукмронимга ёрдам беришим шарт. Фоятда катта ҳодисалар рўй берай деб турибди, Эдмунд, жон ўғлим, ўзингга эҳтиёт бўл.

(Чиқади.)

Э д м у н д

Бу гапларни герцог дарров билмоги керак,
 Билиб қўйсин шафқатни ҳам, келган хатни ҳам.
 Мен оламан хизматимга лойик мукофот
 Ва отамдан ниманики тортиб олсалар,
 Ҳаммаси ҳам келиб менинг қўнимга тегар.
 Қайда кекса қулар бўлса, ёшлар тикияр.

ТУРТИНЧИ САҲНА

Чўл. Чайла олди.
 Лири, Кент, Масхара киради.

К е н т

Мана шу ёр, марҳаматли соҳибқироним,
 Дарров киринг. Бу кечанинг уқубатига
 Кенг ялангда туриб бериш ҳеч мумкин эмас.

Бўрон давом қилади.

Л и р

Мени қолдир.

К е н т

Сиздан шуни сўрар эдим.

Л и р

Менинг мунгли юрагимни эзмоқчимисан?

К е н т

Аввал бошлаб ўзимнини эзилса кошки.

Марҳамат, кириңг.

Л и р

Қуюн бизнинг мағзимизга ўтиб кетганин

Жуда аянч ҳодиса деб ўйласанг керак?

Сенинг учун худди шундай бўлиши мумкин:

Бундан оғир жабру жафо эзиб турганда,

Озгинасин биз унчалик ҳис ҳам қилмаймиз.

Сен айлқининг чангалидан омон қутулиб,

Бир айлансанг, кўз ўнгингда пишқирган денгиз,

Чор-ночор қайтасан ваҳший оғзига.

Руҳинг озод бўлганида тан сезгир бўлар,

Руҳингда-чи шунча тўфон, қуюн бор экан,

Барча сезги ўтмасланиб қолган бўлади:

Ва бу санчиқ (*юрагини кўрсатиб*)

Қизларимнинг кўрнамаклиги.

Бу иш худди бутун умр тўйдириб келган

Қўлни оғиз тишлаганга ўхшаб кетади.

Бироқ, қасос оламан ман. Йўқ, йигламайман!

Шундай кезда мени қувлаб чиқардилар-а!

Қуявер-эй, қуявер-эй, чидаб бераман!

Шу кечача-я! Сен Регана! Гонерилья!

Отағиз-ку сизни жондан севувчи эди,

Бор давлатин иккингизга бўлишиб берди!
 Бироқ, бу йўл тентакликка олиб борармиш,
 Истамайман! Бундан ортиқ бир сўз айтмайман!

Ке нт

Шаҳаншоҳим, киринг, ахир.

Л и р

Ўзинг кириб ўз-ўзингга паноҳ топавер.
 Шундай бўрон, хаёлимдан ёмон ўйларни
 Бир чекқага суриб туар. Кирсам киарман.

(Масхараға.)

Сен олдин кир, оғайнижон, уйсиз бечора!
 Мен ибодат қилиб бўлиб кириб ётаман.

М а с х а р а чайлага киради.

Омон билмас шамолларнинг қувғиндилари.
 Бошпанасиз, увин-тўда, доимо муҳтоҷ,
 Оч-ялангоч бечоралар, сиз қандай қилиб
 Шу табиий офатларга туриш берасиз?
 Оҳ, мен жуда кам ўйлардим бу тўғриларда.
 Улуғворлик соғайиб ол, ўз вужудингда
 Гадоликнинг бутун ҳиссин синаб қўй энди.
 Осмоннинг адолатин кўрсатмоқ учун
 Ўзингда бор эҳтиёждан ортиқ нарсанинг
 Ҳаммасини шуларга бер.

Э д г а р

(Чайла ичидан.)

Тўққиз фут, чўнқирлиғи тўққиз фут. Шўрлик Том!

М а с х а р а чайладан қочиб чиқади.

М а с х а р а

Амакижон, бу ерга кира кўрма, бу ерда ажина-
 алвости бор экан. Ердам беринг, ёрдам беринг.

К е н т

Менга қўлингни бер. Ҳой, у ерда ким бор?

М а с х а р а

Алвасти! У менинг отим — шўрлик Том, деб айта-
ётибди.

К е н т

Ўзинг кимсан, похолнинг орасида нима деб киши-
наётиссан? Қани, бу ёққа чиқ!

Ўзини телбаликка соглан Эдгар чайладан чиқади.

Э д г а р

Қоч, қочинглар, орқамдан шайтон қувлаб келмоқ-
да. «Сув тагида сулаймон, ғув-ғув гувалак, зув-зув
зувалак!..» Дррр... муздак ётоққа ёт, исиниб ол.

Л и р

Буд-шудингни икки қизга топшириб қўйиб,
Ўзинг шундай аҳволларга тушиб қолдингми?

Э д г а р

Шўрлик Томга, ким бирор нарса садақа қила ола-
ди?

Шайтон уни қувлагани қувлаган. Оловлар ва
алангалар ўртасидан, гирдоблар ва кўлмаклар ўртаси-
дан, балчиқлар ва ботқоқлар ўртасидан дам бермас-
дан қувлади. Ётар бўлса ёстигининг тагига тикка
пичноқ қўяди, ўлтирганда бош устига дор сиртмоғин
илади, овқатига маргимуш заҳарин қуяди; яқинда у,
шўрлик Томни: жийрон отга миндириб ўз сояси орқа-
сидан худди сотқинларни қувлагандай тўрт дуймлик
тор кўприкдан от қувишга зўрлади. Тангри таоло
сенинг эс-ҳушингни жойида қилсин! Том совқотди.
Дррр-дрррр!.. Тағри таоло сени бўроңлардан ва юл-

дузларнинг юқумли қасалларидан омон сақласин. Шўрлик Томга бўзгинагина садақа беринг; уни ёвуз шайтон қийнамоқда. Мана ўзи, мен уни тутиб олишим мумкин... Мана бунда... Мана бунда... Мана бунда... Мана бунда...

Бўрон давом қилмоқда.

Л и р

Қизларининг бу шўрликка жафосин кўринг.
Яширмасдан бор давлатни топширганимидинг?

М а с х а р а

Уятим кўриниб қолмасин деб шу жулдирвоқилардан бошқа ҳаммасини топширган.

Л и р

Оҳ, дунёдаги мавжуд бўлган ҳамма яралар,
Инсонларнинг шум феълига жазо бермоққа
Ўз таъбida бузғунчилик яширган ҳаво
Офат бўлиб қизларингнинг бошига ёғсин!

К е н т

Ахир, унинг қизи йўқ-ку.

Л и р

Елғон, сотқин! Фақатгина шафқатсиз қизлар
Киши зотин шундай таҳқир қила олади.
Иўқ, наҳотки ўз вужуди бўлган фарзанддан
Шунча изо торта олса қувғинди ота?
Нима қилсан, ўз гуноҳи! Саққо қуш каби
Шу қизларни туғиб қўйган унинг ўзи-ку.

Э д г а р

Митти-митти, тўнкага минди,
Митти-митти, гу, гу, гу...

Масхара

Бу совуқ кеча, ҳаммамизни ҳам ё аҳмоққа, ё тен-такка айлантириб қўйиши мумкин.

Эдгар

Шайтондан сақлан! Ота-онангга қулоқ сол, сўзингда тур, таъзим қилма ва бирорларнинг хотинини йўлдан урма, савлатли кийим-бошлар орқасидан югурма. Ана ўшаларга совуқ...

Лир

Сен, аввал ким бўлган эдинг?

Эдгар

Сарой аъёнларидан, бекбачча: юрагим ҳам, зеҳним ҳам мағрур эди, сочимни жингалак қилдирап эдим, ёримнинг қўлқопини шляпамда олиб юрадим, ўз нозанининмнинг кўнглини топишга тоза уринардим, у билан гуноҳ ишлар ҳам қилишиб турардик, икки гапнинг бирида қасам ичардим ва ёп-ёргуғ кўкка қараб туриб қасамимни бузаверадим, уйқуга кетишдан илгари ҳар хил шаҳвоний ҳузур-ҳаловатларни ўйлардим. Уйғонганимдан кейин эса ўша ўйларни амалга оширадим: ичкиликни жуда ҳам севардим, ўлгунча ичар эдим, хотинлар жинсига келганда-чи, суюқликни Турк султонидан ҳам ўтказиб юборар эдим, қалбим алдам-қалдам, қулогум бадгумон, қўлим қонли эди: ялқовликда чўчқа, маккорликда кал, суқтойликда бўри, баджаҳлликда ит, ваҳшийликда арслон эдим. Эҳтиёт бўл, пошналарнинг тақиллаши, ипак кийим-бошларнинг шилдираши сенинг бечора қалбингни хотинларнинг ҳукмронлигига топшириб қўймасин. Доимо сенинг оёқларинг хурсандчилик хоналаридан нари, қўлларнинг хотин этагидан узоқ, қаламинг қарз тилхати ёзишдан озод бўлсин. Ва кучинг келганча, шайтон билан кураш.

«Яна қайта; сув тагида сулаймон, ғув-ғув ғувалак, зув-зув зувалак, чори чамбар! Дофин! Үфилгинам, унга айт, ёнимдан ўтиб кета қолсин.»

Бўрон давом қиласди.

Л и р

Тўғри, яланғоч баданингни кўрсатиб осмоннинг ғазабини чиқаргунча, тинчгина гўрда ётганинг маъқул. Наҳотки, одамзод деган нарсанинг мазмуни мана шундан зиёда эмас? Бунга сиз бир яхшилаб қаранг-а. Бу, ўзининг шу туришида ҳеч кимга, ҳеч нима қарзи йўқ; на қуртга ипак қарзи бор, на ҳайвонга пўстин, на қўйга жун, на кийикка мушт! Шундай! Биз учовимиз ҳам қалбаки, сен бўлсанг чинакам ўзгинаси. Бўёқсиз, ранисиз одамзод деган сўз, бу энди мана сенга ўхшаш, ожиз, яланғоч, икки оёқли ҳайвоннинг ўзгинаси. Йўқолсин, йўқолсин, бутун бегоналиклар! Тугмаларни тезроқ ечсангиз-чи! (Устидаги кийимларини йирта бошлиди.)

М а с х а р а

Амакижон, сендан сўрайман, бир оз тинчлан: шундай кечада чўмилиш унчалик маза бўлмайди. Шу топда, шу очиқ ялангла кичкинагина бўлса ҳам гулхан бўлармиди-а, бу гулхан кекса саёқнинг қалбини битта чўғдай иситган бўлар эди, бошқалари нима бўлса бўлар. Қаранглар-а, ҳув биз томонга милтираган бир ўт келаётиди.

Э д г а р

Бу Флибертиджиббет деган ажина. Хонадонларда чироқлар ўчиши билан саёҳатга чиқади-да, биринчи хўрор қичқиргуича юради. У кўзларга оқ туширади, филай қиласди, лабларни қийшайтириб кетади, буғдойларга куя туширадиган ҳам ўша, ишқилиб, ердаги бор нарсаларга зиён-захмат етказиб юради.

Шудгор ичин уч айланди «Витольд» авлиё,
 Кўз олдида уюмсимон бўлмишди пайдо
 Унинг билан бирга тўқиз эгачи-сингил
 Ва авлиё афсун ўқиб буорди — ийқил,
 Кўз очгунча несу нобуд бўлиб йўқолди!
 Ҳайда, ҳайда париларни, йўқол, алвасти!

Кент

Аҳволингиз қалай энди, соҳибқироним?
 Кўлида машъал билан Глостер киради.

Лир

Ким бу?

Кент

Кимсиз? Кимни қидириб юрибсиз?

Глостер

Узингиз ким ва бу ерда нима қилаётисиз?

Эдгар

Бу шўрлик Том. У қурбақа, эчкимар, итбалиқ, калтакесак, ишқилиб, сувда, қуруқликда яшайдиган махлуқотларни ея беради. Юраги уриб, жони сиқилиб кетганда аччиқ-чучук ўрнига сигир тезагини ҳам ошайверади, каламушлар, ўлган итларни еб чанқагандан кейин турғун ботқоқлардаги ям-яшил кўлмак сувлар билан ташналигини қондиради. Аммо унинг орқасидан ёвуз арвоҳлар қувлагани қувлаган, уни кундаларга соладилар, авахтага қамайдилар, бир вақтларда унинг елкасида учта яктаги, ёнбошида олтита кўйлаги, юрай деса тагида оти, уришай деса қўлида қиличи бор эди.

Каламушу сичқонни еб, етти йил тамом
Тириклигин ўтказмоқда бу бечора Том.
Менга азоб берувчи арвоҳдан сақлан
Чири! Хап бўл! Чири,
Мурдор дев.

Г л о с т е р

Хўш, шаҳаншоҳ! Бошқа улфат топилмадими?

Э д г а р

Зулматларнинг бегзодаси ва аъёнлари:
Бирин исми Азозилу, бириси Ифрит.

Г л о с т е р

Тўғри, жуда пастлаб кетди қону наслимиз.
Ва фарзандлар ёмон кўрас тутдирганларни.

Э д г а р

Шўрлик Том музлаб кетди.

Г л о с т е р

Менинг билан бирга юринг! Кучимдан келмас,
Бағри қаттиқ қизларингиз амрин тутмакка.
Гарчан менга, йўлни ёпиб, шундай кечада
Сизни даштда қолдиришга буйруқ бўлса ҳам,
Сизни топиб, бирор ерга яширмоқ бўлдим,
Юринг унда иссиққина уй-жой, овқат бор.

Л и р

Ижозат бер, суҳбатлашай файласуф билан.
(Эдгарга)

Қани айт-чи, бу бўроннинг сабаби нима?

К е н т

Шаҳаншоҳим, ялиноман, бирга қетайлик.

Лир

Энг аввал шу Фив шаҳридан чиққан донишманд
Киши билан сўзлашайин. Илминг нимада?

Эдгар

Шайтонлардан сақланмоғу девларни янчмок,

Лир

Яширинча сендан бир гап сўрамоқчиман.

Кент (*Глостерга*)

Бирга кетиш учун уни қистанг, кўндириинг:
Эси унча жойидамас.

Бўрон давом қилади.

Глостер

Таажжуб эмас,

Уз қизлари ўлимини тилаб турибди.

Кент, қара-я, бу қувғунди шўрлик, бечора
Бўлар ишни олдинданоқ кўролган экан.

Қирол тентак бўлиб қолди, дедингми ҳали?

Бир у эмас, мен ҳам тентак бўлай деб қолдим
Бош ўғлимни оқ қилдиму, баҳридан ўтдим,

Уша мени ўлдиришга қасд қилар экан,

Ҳаддан зиёд меҳр билан севгувчи эдим,

Бу қайғудан жинни бўлиш кўп узоқ эмас.

Кечни қара!

Ўтинаман, соҳибқироним...

Лир

Афвингизни ўтинаман, қани мен билан
Бирга кетдик, аслзода, доно, файласуф!

Эдгар

Том совуққотган.

Глостер

Чайлага кир, қадрдоним, исиб кетасан.

Лир

Кетдик.

Кент

Бу томонга, соҳибқироним.

Лир

Лекин у билан,

Ажралишни истамайман, файласуфимдан.

Кент (*Глостерга.*)

Шаҳаншоҳимнинг кўнглин овланг,

Хўп, ола қолсин,

Гадони ҳам.

Глостер

Уни ҳам олинг.

Кент

Юр, қадрдон, биз билан бирга.

Лир

Қани, кетдик, афиналик меҳрибон дўстим.

Глостер

Жим...

Гап бўлмасин...

Эдгар

Ана шунда, Роланд, қора минорага яқинлашиб қолди, у ердан боши кўкка етган салосил дев чиқиб «уф, уф, Британ қонининг ҳиди келяпти, уф» деди.

БЕШИНЧИ САҲНА

Глостер саройида бир хона. Корнуэль билан Эдмунд чиқади.

Корнуэль

Эҳ, мен бу ердан жўнамасимдан илгари, ундан қасос оламан.

Эдмунд

Ундаи бўлганда, жаноби олий, одамлар гап-сўз қилиб юборади, у хизматида кўрсатмоқчи бўлган садоқат ҳиссини ота-онага бўлган ҳурмат ҳиссидан юқори қўйилти-да деган гап бўлади. Менга бу тўғрида ўйлашнинг ўзи даҳшат.

Корнуэль

Энди менга маълум бўладики, сенинг аканг ўз отасини ўлдиришга йўл қидирар экан, иочор раъингнинг орқасидан бормабди. Аксинча, унинг покиза таъби Глостернинг шармандаларча тубанлигидан ғазабга келган экан.

Эдмунд

Менинг тақдирим жуда ҳам беомон тақдир экан, мен энди ўз садоқатимдан пушаймон бўлишга, товба қилишга мажбурман. Глостер айтган хат мана, бу хатдан унинг француз партиясига яширин тарафдор экани кўринниб турибди. Эҳе, худойим! Кошки эди, у сотқин бўлмаса! Кошки эди, мен унинг устидан махфий хабарлар беришга мажбур бўлмасам.

Корнуэль

Юр, бирга маликанинг ҳузурига борамиз.

Эдмунд

Бу хатда ёзилган гаплар тўғри бўла қолса, бу иш сиз учун анча ташвишга сабаб бўлади-да.

Корнуэль

Бу хат қанчалик тўғри, қанчалик йўқ, ҳар ҳолда у сени граф Глостер даражасига кўтаради. Тездан отангни тол, токи уни вақт ўтказмай қамоқقا олиш мумкин бўлсин.

Эдмунд (*Бир чеккага*)

Агар мен уни қиролга ёрдам қилаётган вақтида топа олсам бу иш шубҳаларнинг тасдиқи учун маъқул бўлар эди. (*Корнуэлга*) Мен ўз вазифам буюрган йўлдан қиттак ҳам четга чиқмайман, гарчанд вазифам билан ота ҳурмати ўртасида бўлган курашда наслдошлик қонининг овози даҳшатли бўлса ҳам.

Корнуэль

Мен ўзимнинг ҳамма ишларимда сенга ишонаман, сенга бўлган муҳаббатим, керагидан зиёда оталик вазифасини ўтай олади.

Чиқиб кетадилар.

ОЛТИНЧИ САҲНА

*Сарой ёнидаги фермаларнинг биридаги хона.
Глостер, Лир, Кент, Масхара ва Эдгар
кирадилар.*

Глостер

Бу ер ҳар ҳолда очиқ ҳаводан кўра яхши. Шунинг учун ҳам худога шукур қиласкеринглар. Мен эса сизларнинг қулайроқ яшашингиз учун нима керак бўлса, ўшани топиб бу ерга келтиришга ҳаракат қиласман. Мен ҳозир қайтиб келаман.

К е н т

Киролнинг бутун ақли-кучи бундай оғир ҳаяжонларга бардош беролмай қолди. Бу яхшиликлар учун сизга худо хайр берсин.

Г л о с т е р ч и қ а д и .

Э д г а р

Фратерейтт деган фаришта мени чақирипти; у айтдики, қадим Румо ҳукмдори Нерон жаҳанинамдаги Қора кўлда балиқ туваётган эмиш. Ибодат қила кўр, ҳай дарвиш, ўзингни ёмон руҳларнинг шарридан сақла.

М а с х а р а

Амакижон, марҳамат қилиб менга шуни айтиб берсанг, кўпроқ кимлар тентак бўлади, сарой аҳллари — аъёнларми, деҳқонларми?

Л и р

Кирол, қирол!

М а с х а р а

Йўқ, ўғли аъёнлик даражасига кўтарилган деҳқонлар бўлса керак: чунки ўғлинг сарой аҳли бўлиб, сендан ўтиб кетганини кўриб туриб, жинни бўлмай бўладими?

Л и р

Минглаб руҳлар қўлларида оташ қисқич-ла
Увос тортиб ўшаларга олов ёғдирсинг!

Э д г а р

Евуз арвоҳлар менинг бағримни ғажиятилар.

Масхара

Бўриларнинг беозорлигига, отларининг саломатлигига, балоғатга етмаганларнинг севгисига, саёқ хотинларнинг қасамига ишонганларни жинни деса бўлади.

Лир

Маслаҳат шу! Айбларини юзларига айт!

(Эдгарга)

Сен бу ерда ўлтирасан, билимдон судъя.

(Масхарага)

Сен донишманд, мана бунда ҳей, сиз тулкилар!

Эдгар

Ана ўзи, кўзларини уларга тикиб қараб турибди.
Мунчалик кўзларингизни ўйнатаверасиз,

хонимлар?

Бас, тезроқ мен томонга сузиб кел.

Масхара

У хонимнинг қайиги тешилиб қолибди.

Бу гапни у сенга айттолмаётибди.

Шунинг учун сузиб келолмаётибди.

Эдгар

Ёвуз арвоҳ, булбул овози билан шўрлик Томнинг
ғашига тегаётибди. Фобданс эса Томнинг қорнида ту-
риб иккита қоқ балиқ сўраб қичқираётибди. Ҳадеб
қағиллайверма, қора фаришта, Томнинг сенга беради-
ган овқати йўқ.

Кент

Тикка туриб ўйлайверманг, соҳибқироним.

Бу ёстиққа ёнбош қилинг, бир оз дам олинг.

Л и р

Йўқ, суд бошланар. Гувоҳларни чақириб келинг!

(Эдгарга)

Сен судьялик кийимини кийиб бунда тур!

(Масхараға)

Сен судьянинг ёрдамчиси, ёнма-ён ўлтириш.

(Кентга)

Сизлар эса суд аъзоси: сиз ҳам ўлтиришинг.

Э д г а р

Суд ишини адолат-ла олиб борамиш.

Ҳой, азamat чўпон бола, ухлаб қолдингми?

Қарасанг-чи, поданг пайҳон қилар буғдойни.

Сибизғангни олиб қаттиқ чалиб юборсанг

Подаларинг ҳеч нарсага зарар бермайди,

Пишт-пишт, кулранг мушук.

Л и р

Бу хотиндан биринчи сўроқ олиссин.

Бу Гонерилья. Шу йигилган ҳурматли мажлис аъёнларига қасам билан иқрор қилиб айтаманки, бу хотин ўз отаси бўлган бечора қиролни калтак олиб қувлади.

М а с х а р а

Мана бу ерга марҳамат қилинг. Сизнинг исмингиз Гонерильями?

Л и р

Бу ҳақиқатни у инкор қила олмайди.

Масхара

Кечирим сўрайман, мен сизни скамейка, деб
ўйлаган эканман.

Лир

Бу бошқаси; ғилай кўзи эгри қалбининг
Емонлиғин фош этмоқда.— Қўлдан чиқарманг!
Қилич! Олов! Қурол беринг! Бу порахўрлик!
Судья сотқин! Жавобгарни қочирди, ушланг.

Эдгар

(Бир чеккага)

Э худойим, эсин жўйма бечора чолнинг.

Кент

Оғир қайфу! Шаҳаншоҳим, доим мақтанган
Сабру тоқат, чидамингиз қаерга кетди?

Эдгар

(Бир чеккага)

Ачингандан кўз ёшимнӣ тия олмайман!
Бу ёш мени фош қилмаса яхши бўларди.

Лир

Қаранглар-а! Биргалашиб қувлаб келмоқда,
Олапару, тўрткўз, мўйноқ менга вовиллар.

Эдгар

Том бўлса ўз калласини тош ўрнида отиб, уларни
ҳайдайди. Кетма-кет, итваҷчалар.

Ҳай-ҳай, оқ ит, қора ит,
Оғзинг қурғурии беркит.
Лайчами, тозимисан,
Кўпракнинг ўзимисан.

Сен, чиноқ, акиллайсан.
 Том урса вакиллайсан,
 Тош калламни отаман,
 Барингни тарқатаман.

Ҳай, кет, ҳай қоч, бозору кўчаларга бор. Ҳалимхона, каллахоналарга бор. Шўрликкина Том, мугизинг шамоллаб қолибди-ку.

Л и р

Регананинг ичак-чавоғларини ағдариб, дилида қанақа қурту қумурсқа валиллаб ётганини кўриш керак. Табиатдаги қандай сабаблар натижасида қалб бунчалик тошга айланиб кетар экан? (Эдгарга) Мен сизни, жаноб, рицарларимга юзбоши қилиб тайинлайдман. Фақат менга кийимингизнинг авраси ёқмай турибди. Эрон сипоҳсоларларидай бунақа дабдабали усти бошни қаердан олдингиз? Ҳар ҳолда, буни ўзgartиш керак.

К е н т

Шаҳаншоҳим, бир оз ётинг, андак дам олинг!

Л и р

Шовқин солманглар, шовқин солманглар: дарпардаларни тортиб қўйинг. Ҳа, балли, ҳа, балли. Кечки овқатни тонг отарда еймиз. Ҳа, балли, ҳа, балли! (Ухлай бошлайди.)

М а с х а р а

Мен эса кун ярмидан оққандан кейин ухлайман.

Г л о с т е р киради.

Г л о с т е р

Айт-чи, азиз дўстим, шаҳаншоҳ қани?

Кент

У шу ерда. Ухлаб қолди. Озор бермайлик.
Унинг эси айнаб қолди.

Глостер

Вафоли дўстим,
Уни олиб чиқиш керак, қўлда бўлса ҳам.
Ўлдирмоқчи бўлибдилар, яширин суиқасд.
Эҳтиётдан иосилка ҳам ола келганмиз
Дарров уни элтасиз Доверга томон:
Ва у ерда сизни кутар ҳимоячилар.
Агар яна ярим соат сусткашлик қиласанг,
Унинг жони, сеники ҳам ва кимки унга
Ёрдам берган бўлса, аниқ хавф остидадир.
Дарров уни олиб менинг орқамдан юринг.
Сенга соқчи, йўловчилар қўшиб бераман.

Кент

Қийналгандан, эндигина ухлаган эди.
Үйқу унга малҳам каби даво бўларди,
Ухламасдан шунча жабру жафо ичидা
Кетган кучни ўз ўрнига қайтариш қийин.

(Масхарага.)

Қани юр-чи. Ёрдам кўрсат, олиб чиқайлик.
Орқамиздан эргаша бер.

Глостер

Тез-тезроқ бўлинг.

Кент, Глостер, Масхара Лирни олиб чиқиб
кетадилар.

Эдгар

Катталарнинг тортган жабру жафосин кўриб
Унутасан ўз бошингга тушган қайфуни.

Елғиз бошга алам тортиш икки бор қийин,
 Аламингга алам қўшар бошқалар бахти.
 Ўртогингни бахтсизликда учратган чоғинг
 Унутилар ўзинг тортган аламзадалик.
 Қирол шунча ғуссаларда ўртанаар экан,
 Менинг тортган бу мунгларим ғоятда енгил.
 Қирол — ўзин қизларидан, мен — ўз отамдан,
 Энди сен Том, барчасини кузатиб бор-чи.
 Вақти келиб бу ярамас ифлое бўҳтондан
 Тозаланиб ва оқланиб олганингдан сўнг
 Кимлигингни элу юртга эълон қиласан.
 Ҳозир қирол — бир амаллаб сақлана олса бас.
 Ўзинг ҳам яширин! Яширин!

Чиқади.

ЕТТИНЧИ САҲНА

Глостер саройнда бир хона.
 Корнуэль, Регана, Гонерилья, Эдмунд ва
 мулоғимлар чиқади.

Корнуэль

(Гонерильяга)

Тездан ўз эрингиз олдига отланиб боринг ва унга
 бу хатни кўрсатинг. Француз қўшини қирғоққа тушиб-
 ди. Тездан сотқин Глостерни қидириб топинг!

Мулоғимлар чиқадилар.

Регана

Уни тездан отиб ўлдириш керак.

Гонерилья

Кўзларини ўйиб ташлаш керак!

Корнүэль

Унга жазо беришни менинг ғазабим ихтиёрига қўйинг. Эдмунд, сен опамиз билан бирга жўна. Отанг гуноҳига яраша жазо тортар әкан, тепасида сенинг қараб туришинг бўлмайди. Ҳозир олдига жўнаётганингда герцогга маслаҳат бер, у тезроқ тайёрланишга ваъда берамиз. Ҳар икков ўртамизда узлуксиз ва тез алоқа бўлиб туради. Хайр, қадрли опамиз. Хайр, граф Глостер!

О с в а л ь д киради.

Ўзинг бу ердасан, қирол қани?

О с в а л ь д

Қиролни қочирибди граф Глостер.
Ва қиролни излаб юрган ўттизта аъён
Улар билан қўшилишиб қопқа тубида
Графга хос йўловчилар билан бирликда
Довер томон йўл олишиб кетибди бари.
Ўз-ўзича мақтанишиб, у ерга боргач
Қуролланган дўстлар билан учрашамиз деб.

Корнүэль

Энди тездан от эгарла маликанг учун.

Гонериля

Хайр, сизга азиз герцог, хайр.

Корнүэль

Хайр, Эдмунд!

Гонериля, Эдмунд ва Освальд кетадилар.

Қани, ўша сотқин Глостер?

Излаб топинг! Уғрилардай қўлинни боғланг.

Олиб келинг! Гарчи судсиз жазо ўнғайсиз,
Аммо бизнинг ҳукмронлик ҳуқуқларимиз
Фазабимиз қаршисида тизин буқади.
Биздан гина қилиш мумкин, аммо тўхтатиш
Мумкин эмас. Бу ким бўлди? Қани у сотқин?

Регана

Ана ўзи! Ҳо, кўрнамак, алдоқчи, тулки.

Корнүэль

Қуруқ, қоқшоқ қўлларини маҳкамроқ боғланг.

Глостер

Бу нима гап, биродарим, герцог азизим?
Сиз меҳмонсиз, шаҳдингииздан қайтинг, дўстлар!

Корнүэль

Тездан боғланг!

Хизматчилар Глостерни боғлайдилар.

Регана

Маҳкам боғланг хиёнаткорни!

Глостер

Ноинсофлик қиляпсиз! Мен сотқин эмас.

Корнүэль

Маҳкам боғланг скамейкага!
Жирканч одам, ҳали қараб тур...

Регана Глостернинг соқолига ёпишади.

Глостер

Тангриларга қасам бўлсин, бу виждонсизлик,
Ҳурматсизлик қиляпсан оқ соқолимга.

Регана

Оппоқлиққа оппоқ, аммо ғоятда маккор.

Глостер

Шум малика, соқолимнинг оқин қўявер,
У ўзини оқлаб, сени қарғай олади.
Сиз бу ерда меҳмонсиз-ку. Тусингиз ўчсин.
Менинг шунча меҳмондўстлик шаъним булғаган
Босқинчилик қадамингиз қирқилиб кетсии.

Корнуэль

Сен бирор хат олганмидинг француздардан?

Регана

Лақиллатма! Ҳамма гапнинг тагин биламиз.

Корнуэль

Бизнинг юртга босиб кирган душманлар билан
Нима учун сен алоқа боғлаган эдинг?

Регана

Жинни бўлган қиролни-чи қайга яширдинг?
Тўғрисин айт.

Глостер

Қандайдир бир холис кишининг
Ёзган хати тасодифан қўлимга тушди.
Душманларнинг хати эмас.

Корнуэль

Хийла!

Регана

Ва ёлғон.

Корнуэль

Кирол қайга жұнатилди?

Глостер

Довер томонга.

Регана

Ұзинг ахир тақиқлигин билар әдинг-кү.

Хүш, нимага Довер томон уни жұнатдинг?

Корнуэль

Нима учун Доверга, хүш? Қани жавоб бері!

Глостер

Шунинг-чунки, шу ништардай тирногинг билан
Чолнинг күзин ўйғанингни күрмайин дедим,
Манжалалақи опанг түнғиз тишин ботириб,
Нозик танин юлганини күрмайин дедим...
Оқшом, бўрон, у бош яланг тентирар эди...
Бу қуюндан ҳатто денгиз ўкириб, қайнаб,
Осмоннинг машъаллари ўчгудай эди,
У шўрлик-чи, ёш тўкарди осмон билан тенг.
Шу кечада, агар бўри қопқонга келиб
Паноҳ сўраб ув тортганда раҳминг келгандан
«Эшикни оч, қоровул» деб айтган бўлардинг.
Аммо сендей бағри қаттиқ фарзандлар учун
Нечук жазо борлигини кўриб қоларман.

Корнуэль

Йўқ, кўрмайсан, кўролмайсан. Ҳой! Маҳкам
ушланг!

Кўзларингни товонимда эзиб ташлайман.

Унинг бир, кўзини ўйиб ташлайди.

Г л о с т е р

Қарилликдан умидвор бир киши борми,
Ердам беринг!

Хе, золимлар! Парвардигорим.

Р е г а н а

Буниси ҳам ўксинмасин, буни ҳам ўйинг!

К о р н у э л ь

Биз тортажак жазоларни кўрмакчимидинг?

Б и р и н ч и м у л о з и м

Қўлингизни тортинг, герцог, мен, ахир, сизга
Еш чоғимдан бошлаб хизмат қилиб келганман,
Шу топдати қилғуликдан тўхтата олсан
Яхши хизмат бўлар эди.

Р е г а н а

Нима гап, кўпак?

Б и р и н ч и м у л о з и м

Соқолингиз бўлса эди энгагингизда
Битта-битта юлар эдим. Бу нима қилиқ?

К о р н у э л ь

Менинг қулим?!

Қилич ялангочлаб мулозимга ташланади.

Б и р и н ч и м у л о з и м

Бўпти, қани олишамиз. Ўл, э ярамас.

Улар олишадилар. Корнуэль яраланади.

Р е г а н а

(Бошқа мулозимга)

Қиличингни менга бер-чи. Қул бош кўтарди!

Қилич олиб биринчи мулозимнинг орқасидан яралайди.

Биринчи мулозим

Мен-ку, ўлдим! Граф, аммо бир кўзингиз сор,
Кўряпсизми, бунга боллаб жазо берганиман.

(Улади)

Корнүэль

Пўқ, у мутлоқ кўролмайди. Стил шилимциқ!
Глостернинг иккинчи кўзини ҳам ўяди.

Ҳа, ҳа! Қани, ўша порлаб, чақнаб туришинг?

Глостер

Зулмат... жабр... Эдмундгинам, ўғлим, қайдасан?
Ўвлим Эдмунд, фарзаандликнинг ишқ ўтин ёқиб,
Золимлардан ўчимни ол.

Регана

Йўқол, э хони.

Сендан ҳазар қиласиган шахсни чақирма.
Сенинг ирганч сирларнингни бизга фош қилган
Эдмунд ўзи бўлади-ю, ачинармиди.
Сендайларга ачинмайди, у тоза одам.

Глостер

Оҳ, мен аҳмоқ! Демак, Эдгар бегуноҳ экан!
Мени кечир, парвардигор, унга нажот бер.

Регана

Ҳайданг буни, бу эшикдан нарига қувланг!
Довер йўлин, майли исқаб, пийпаслаб топсин!
Нима қилди сизга, герцог? Қутингиз ўчган!

Корнүэль

Жуда оғир яраландим. Кетайлик, хотин.
Сўқир чолни, бу хонини ҳайдаб чиқаринг:
Ва бу қулнинг ўлаксасин гўнгта итқитинг.

Тұхтамасдан қон кетмакда, жоним Регана!
Жуда бевақт яраландым! Құлингни бер-чи.

Регана құлтиқлаб олади. Корнуэль икков чиқадилар.

Иккинчи мулозим

Агар бунга худо лойиқ жазо бермаса
Бундаи кейин ҳеч гуноҳдан құрқиб турмайман.

Учинчи мулозим

Бу хотин ҳам ўз ажали билан ўлса-чи,
Бошқа ҳамма хотинларни жин урди дейвер.

Иккинчи мулозим

Кекса граф орқасидан боришим керак.
Етаклашга бирор гадо топилиб қолар,
Ү жиннилар шундай ишга ярайди, холос.

Учинчи мулозим

Майли, тез бор. Мен ҳам бориб озроқ ов билан
Тухум оқи келтираман қон тұхтатишга.
Парвардигор, у мазлумга ўзинг паноқ бер!

Чиқиб кетадилар.

IV ПАРДА

БИРИНЧИ САҲНА

Чўл.
Эдгар чиқади.

Эдгар

Хушомадлар ниқобига яширинган нафрат —
Соясида яшагандан ўша нафратни
Очиқ-ойдин билиб яшаш албатта яхши.
Шум тақдирнинг таъзирига кўникиб кетган
Анчагина бечоралар қўрқув билмасдан
Қалбларида умид, ишонч билан яшайди.
Бахтиёрлар қўрқса бўлур бахтсиз кунлардан.
Модомики ўзинг бахтсиз, мунглик одамсан,
Сенинг учун бахтсизликдан унча қўрқинч йўқ.
Салом, нафас олганим, э бевужуд ҳаво,
Бир шўрликни гирдобларга пуллаб ғарқ этдинг,
Унга ортиқ бўронларнинг қўрқинчлиги йўқ.
Ким у келаётган?

(Битта чол Глостерни етаклаб келади.)

Бу гадо чол етаклаган менинг отам-ку.
Номард дунё, бевафолик қилмаса эдинг,
Биз абзий яшамакни орзу қиласдик.

Чол

Менинг меҳрибон хўжайиним, мен сизнинг ерин-
гизда қарийб саксон йилдан бери яшайман; аввал
отангиз замонида, кейин сизнинг.

Глостер

Жўна, жўна, йўлдан қолма, қадрдон ошина.
Сен барибир менга ёрдам қила олмайсан.
Ўзингга ҳам бирор шикаст етиши мумкин.

Чол

Сиз ўзингиз юрар йўлни топа олмайсиз!

Глостер

Менга йўл ҳам, кўрап кўз ҳам даркорлиги йўқ.
Кўзим очиқ текис йўлда туртинган шахсман.
Бу ҳаётда баъзали бизнинг камчилигимиз
Ўзимизга фойда бўлиб тушиши мумкин.
Оҳ, азизим, ўғлим Эдгар, отагинангнинг
Аҳмоқларча ғазабига сен қурбон бўлдинг.
Кошкি эди сени силаш муюссар бўлган
Қўзи очиқ бир ҳаётга эга бўлолсам.

Чол

Хе, бу ерда ким бор?

Эдгар

(Ўз-ўзига.)

Э, худойим! «Ёмон куннинг авжига етдим,
Бундан ортиқ ёмон аҳвол бўломмайди» деб,
Қайси инсон ўз ҳолига айта оларкин?
Ёмонларнинг ёмонроғи аҳволим ҳозир.

Чол

Бу шўрлик Том.

Эдгар

(Ўз-ўзига.)

Ва бундан ҳам ёмон ҳолда қолишим мумкин.
Мадомики нолимакка мажолимиз бор,
Жуда ёмон дақиқалар келганича йўқ.

Ч о л

Йўллар бўлсин, оғайнижон?

Г л о с т е р

Бу бир гадоми?

Ч о л

Балли, битта жинни гадо.

Г л о с т е р

Тиланишни билса, унча тентак эмасдир.
 Қеча оқшом шундайлардан бирисин кўриб,
 Одам — ожиз бир чувалчанг — деб ўйлагандим.
 Ҳалигача душманим деб ўйлаб юрганим,
 Ўғлим шунда тушган эди менинг ёдимга...
 Энди билсам, бу гап тамом бошқача экан.
 Болаларга паشا қанча ўйин бўлгандай,
 Биз қирилсак худоларга шунчалик эрмак.

Э д г а р

(Ўз-ўзига.)

Энди нима қиссан экан? Шундай қайфуда,
 Ҳазиллашмоқ ўзимга ҳам, бошқаларга ҳам
 Оғир таҳқир бўлиб тушар.

(Глостерга)

Худо ёр бўлсин.

Г л о с т е р

Ҳа, бу ўша шир ялангоч жинними?

Ч о л

Уша.

Глостер

Жұна, ахир; мейга хизмат құлмоқ истасаңғ,
Орқамиздан қувиб етгил Довер йұлида.
Қадрдонлик ҳурмати-чун шу яланғочнинг
Елкасига ташлагали бирор кийим топ,
У бизларга йүл бошлайды.

Чол

Эссиз, тентак-ку!

Глостер

Замон шундай: сүқирларни жинни етаклар,
Илтимосим ерда құйма, ёнки рад қил,
Фақат — жұна.

Чол

Үнга жуда яхши кийим топиб бераман.
Нима бұлса бұла қолар.

Чиқади.

Глостер

Хой, сен яланғоч...

Эдгар

Шүрлік Том совқотди!

(Бир чеккага)

Бундан ортиқ найрангбозлик...
Құллимдан келмас.

Глостер

Қани, яқин қел.

Эдгар

(Бир чеккага)

Аммо мажбурман.

Тангри ўзи шифо берсин қонли кўзингга.

Глостер

Танишмисан Довер томон борар йўл билан?

Эдгар

Йўлдаги ҳамма ўнқир-чўнқирлар билан, чордеворлар билан, от йўли-ю, сўқмоқ йўл билан — барчаси билан танишман. Шўрлик Томнинг ақлига бир оз путур етган. Худои таоло сени ёвуз руҳларнинг таъсиридан омон сақласин. Шўрлик Томга бирданига бешта деву пари юқ солган: булардан бириси — йўлдан озганларнинг париси Обидикут, лолу гүиглар шаҳзодаси — Хобеданес, ўғриларнинг беги — Маҳу, қотилларнинг юзбошиси — Модо, қичиқлик, нозу карашмалар парихони Флибертиджиббет, бу кейингиси сўнгги вақтда мендан айнаб ҳарамдаги хизмат қиласидиган пардозчи, машшота хотинларга кўчган. Ишқилиб, парвардигор сени ўз паноҳида сақласин, менинг хўжайингинам.

Глостер

Сен мана бу ҳамённи ол, тангри қарғаган,
Ожиэ банда, балки менинг бахтсиз аҳволим
Сен шўрликка бахт туғдирап. Э парвардигор!
Давлатлари қутуртирган, кўзин ёғ босган,
Айшу ишрат эркалаган, очкўз, ноинсоф
Боёнлар ҳам шу ғазабга гирифтор бўлиб,
Шу сиз тортган жафоларни бир тортиб кўрса,
Ортиб қолган неъматларни дарров бўлашиб,
Ҳамма тўйин бўлар эди, гадо қолмасди.
Айт-чи, яхши биласаним Довер йўлинни?

Эдгар

Биламан, жаноб.

Глостер

Ана шунда бир қоя бор, унинг чўққиси
 Даҳшат билан мойил турар денгиз қаърига,
 Мени худди шу қоянинг четига бошла.
 Шунда сенга қиммат баҳо совға бераман,
 Ушбу совғу гадоликдан сени қутқарап.

Эдгар

Қани, менга қўлингни бер,
 Бечора Том олиб борар айтган ерингга.

Чиқиб кетадилар.

ИККИНЧИ САҲНА

Герцог Альбаниннг саройи олада.
 Гонерилья ва Эдмунд чиқадилар. уларни Освальд
 кутиб олади.

Гонерилья

(Эдмундга)

Хуш келдингиз, азиз милорд. Хўш, нима учун
 Ювош эрим, бизни кутиб қарши чиқмади?
 (Освальдга)

Герцог қаерда?

Освальд

У ўзида, аммо феъли анча ўзгарган.
 Душман қўшин туширганин хабарин айтсан
 Илжаяди. Қелишингиз дарагия билиб;
 «Бу иш ундан баттар бўлтй» дёган сўз айтди.
 Глостернинг хиёнатин ва унга қарши
 Эдмунд қўлган ботирликни ҳикоя қилсан,
 Мени аҳмоқ деб айтади ва «сен бу сирни

Тескарича тушунибсан» деди ва сўқди.
Хуллас, ёмон хабарлардан қувонади-ю,
Яхши хабар айта қолсанг, жаҳли чиқади.

Гонерилья

(Эдмундга)

Бундай эса, тўхтаб туринг!

Бу номард одам

Жонидаги ушбу ирганч қўрқоқлик билан
Маъракадан чўчимоқда ва бизда бўлган
Қасосталаб аламларни кўрмоқчи эмас.
Ҳалигача ўртамизда бўлган суҳбатда
Келишилган ишлар тамом бажарилади.
Қўшин тузиб, шу қўшинни сиз етаклайсиз.
Мен ҳам қўлга қилич олиб эрим олдига
Чарху чифириқ, ип-калава қўйиб қўяман.
Бу фидойи йигит бизга чопар бўлади.
Сизга тездан ўз севимли бекачингиздан
(Аммо сиз ҳам дадил, эпчи бўлишингиз шарт)
Бир мукофот тегиб қолар. Мана, олинг.
(Унга лента ҳадя қиласди.) Жим...
Тсс... эгилинг.
Бу ўпишим ич сирини айтолган бўлса,
Сенинг руҳинг қанотланиб учини керак.
Ҳаммасини тушуниб ол. Ва ҳозирча хайр.

Эдмунд

Үлгунимча мен сеники.

Гонерилья

Жоним, Глостер!

Эдмунд кетади.

Икки эркак, бир-бирига ҳеч ўхшамайди!
Сенга бутун хотин зоти эгилса арзир,
Аҳмоқим-чи, менга эрмас, фақат босқувчи,

О с в а л ь д

Мана, герцог, азиз маликам!

Чиқади.
Альбани киради.

Г о н е р и л ь я

Бизлар энди кутишга ҳам арзимаймизми?

Альбани

Гонерилья!

Сен, шу қийғос шамоллардан юзингга құнган
Тұзонға ҳам арзимайсан. Ва менинг учун
Сенинг барча қилиқларинг ғоятда құрқинч;
Ұзи пайдо бүлган зотни хұрлаган киши
Емонликда қар мөъердан чиқишиңға қобил,
Ұз туғишиңдан даражтидан узилиб тушиб
Унинг жонбахш шарбатини әммаган новда
Тезда сұлиб жаҳаннамга үтін бўлади.

Г о н е р и л ь я

Етади, бас! Аҳмоқона насиҳатгүйлик.

Альбани

Яхши ният, яхши үгит — ёмонга ёмон.
Балчиқ фақат ўз-ўзини яхши күради.
Нима қилиб қўйдингиз сиз, нима қилдингиз?
Сиз қизмисиз, ё урғочи арслонлармисиз?
Ұз туғишиң отангизни, муборак чолни
Ҳатто айиқ ювош тортиб ялашга лойиқ,
Ваҳшийларча, барбарларча тентак қилдингиз.
Олижаноб укам бунга қандай чидади?
Эркак эди! Герцог эди! Лирга миннатдор!
Агар осмон ғазаблари тезроқ гуркураб
Бу маънати ёвузликка барҳам бермаса,
Шундай замон келадики, барча одамлар

Денгиздаги аждарсимон махлуқлар каби
Бир-бировин ғажиб ейди, тамом қиласди.

Гонерилья

Беватан қўрқоқ.
Сендаги бу манглай эмас — нафрат тахтаси,
Ва юзларинг тарсакилар тушадиган ер!
Қўзинг эса уят, номус қайда, қўрмайди.
Наҳотки сен шундай оддий ишини билмассанг:
Ёвузларга ёвузликни қилгунларича
Жазо бериш лозим экан, аҳмоқ ачинар.
Сенинг ўша ғулғулали довулинг қани?
Франция қўшинининг жанг байроқлари
Тинч юртимиз осмонида ҳилпирамоқда:
Укпар таққан дубулғали душман аскари
Сенга қарам мамлакатга қўрқинч солмоқда,
Сен аҳмоқ-чи, тантилиндан чордана қуриб
«Вой, нима гап бўляпти?» деб нола қиласан.

Альбани

Ўзингга бир қарасанг-чи, урғочи иблис!
Ёвуз руҳнинг ғазаби ҳам хотин кишининг
Ғазабидай қўрқинч эмас.

Гонерилья

Ҳой, тубан аҳмоқ.

Альбани

Ҳой опала, ҳой алвости, озгина уял!
Юзларингни бужмайтирма. Қани мен энди,
Ҳиссим амрин бажаришда қўлга эрк берсам.
Сенгинани эту суяқ-саёқ аралаш
Бурда-бурда, парча-парча қилиб ташлардим.
Иблисликка иблиссан-а, бунинг устига
Хотинлигинг ҳимоячи — сипар бўлади.

Гонерилья

Эркаклигинг ёдингга ҳам тушди, ҳайтовур.

Чопар киради.

Альбани

Қандай хабар?

Чопар

Шаҳаншоҳим! Вафот қилди герцог Корнуэль.
Глостернинг кўзин ўйиб турган вақтида
Бир мулозим дабдурустдан ўлдирниб қўйди.

Альбани

Кўзни? Ўйди деяпсанми?

Чопар

Ўз тузини ичиб катта бўлган бир мулозими
Ачингандан ёвузликка ҳалал бериш-чун
Қилич чопиб ўз хўжасин чавағлаб қўйди.
Шу разабда мулозимни у ҳам ўлдирди,
Аммо яра оғир эди, ўзи ҳам ўлди.

Альбани

Демак, кўкда адолатли судьялар бормиш,
Бизнинг ерда қиласиган жиноятларга
Жуда тездан жазо ҳукми берилар эмиш.
Уқубатга учрадими, шўрлик Глостер?
Кўзин ўйиб олдиларми?

Чопар

Хар иккисини.

(Гонерильяга)

Синглингиздан сизга ҳат бор ва маликамиз
Сиздан тезроқ жавоб кутиб йўлга мунтазир.

Гонерилья

(Бир чеккага)

Маъқул бўпти!

Аммо синглим бева қолибди.

Унинг билан доим бирга Глостергинам

Шундай биқиқ, диққинафас ҳаёт ичидা

Ўзим учун бино қилган хаёлий қасрим,

Бирданига қуламаса яхши бўларди..

Аммо ушбу хабар ўзи, ёмон хабармас.

(Чопарга)

Үқиб бўлиб, жавобини дарров ёзаман.

Чиқади.

Альбани

Отасини қийнашганда ўғли қайдайди?

Чопар

Шу томонга келган эди маликам билан.

Альбани

У бу ерда йўқ·ку, ахир.

Чопар

Қайтиб кетди.

Мен у билан йўл·йўлакай учрашиб ўтдим.

Альбани

Бу ярамас мусибатдан хабари борми?

Чопар

Албатта-да, жаноб олий, отасин чаққан
Ва бу оғир жазоларга халал бермай деб
Ўйдан қочган унинг ўзи.

Альбани

Шўрлик Глостер!

Лирга бўлган садоқатинг мукофоти-чун

Танда жоним бўлганича кўзин ўчини

Золимлардан ғлиш учун тинчиб-тинмайман.

Юр-чи, дўстим, ҳамма гапни тугал айтиб бер.

Кетадилар.

УЧИНЧИ САҲНА

Довер яқнинида французлар лагери.

Кент билан бир сарой кишиси чиқади.

Кент

Нима учун француз қироли шунчалик шошилиб
Францияга қайтиб кетди?

Сарой кишиси

У Францияда давлатга хос зарур бир ишни бит-
казмай қўйиб келган эди. Кейин маълум бўлишича,
қиролликка катта бир таҳлика қўрқинч солай деб қо-
либди, шунинг учун қиролнинг ўзи шахсан у ерда
бўлиши лозим бўлиб қолибди.

Кент

Қўшинлар устидан қўмондонлик қилиб туришини
кимга топширди?

Сарой кишиси

Француз маршали Мосье Лафобрга.

Кент

Айтинг-чи, сиз келтирган хат қироличада қандай-
дир бир қайғу нишонлари кўринишга сабаб бўлдими?

Сарой кишиси

Балли жаноб, қайғу билан чидам олишиб
 Борган сари унинг ҳуснин оширап эди.
 Қүёш чиқиб турганида ёмгир ёққанин
 Кўргандирсиз? Кўз ёшлари билан табассум
 Алмашиниб турагар эди. Фунча лабида
 Уйнаб турган майин кулгу, гўё кўзидан
 Дур, маржондай оқдан ёшни билмаган каби.
 Ростин айтсан, агар қайғу киши жамолин
 Шунча сўлим қилар бўлса, бебаҳо нарса.

Кент

Яна бирор қўшимча гап сўрамадими?

Сарой кишиси

«Отам»— деб бир лаб очди-ю, лекин кўксини
 Аллақандай бир оғирлик бўқандай бўлди,
 «Опаларим! Сиз хотинлар! Уялсангиз-чи!
 Кет!. Опалар! Менинг отам! Ёлғиз, бўронда!
 Қора кеча, меҳрибонлик йўқми!» деди-ю
 Кўзларидан дур тўкилган бу муқаддас сув
 Тўлқинланиб айтадиган гапини бўғди.
 Кейин дарров ичкарига ўзини олди.
 Қайғусини ёлғиз ўзи тортмоқчи бўлди.

Кент

Шундан маълум бўлдики, толе юлдузи
 Биэга энди хайриҳоҳлик билан боқмоқда,
 Йўқса, ахир, қандай мумкин бир ота-она
 Турли-турли феълдаги бола туғиши!
 Сен у билан кейин яна гаплашмадингми?

Сарой кишиси

Йўқ.

Кент

Бу гаплар бўлар экан, қирол бормиди?

Сарой кишиси

У йўқ эди. Аллақачон жўнаган эди.

Кент

Сен билиб қўй, бахтсиз Лир ҳам Доверга келган,
Аҳён-аҳён келиб турар эси ўзига,
Не мақсадда келгани ҳам ёдига тушар,
Аммо, нима қилсангиз ҳам ўз қизи билан
Учрашишга унамайди.

Сарой кишиси

Хўш, нима учун?

Кент

Жуда катта уят унга азоб беради.
У бешафқат ғазаб билан шу кенжা қизин
Маҳрум қилиб ўз оталик фотиҳасидан,
Шундай қўрқинч томонларга қувлаб юборган,
Унинг ҳақи бўлган барча мерос-мулкларни
Ит юракли шум қизларга бўлишиб берган.
Шунинг учун, бу ўтган гап юрагин ўртаб
Ўз бағрига босолмайди Корделияни.
Жуда қаттиқ уялади.

Сарой кишиси

Шўрлик, бечора!

Кент

Икки герцог қўшинидан нима хабар бор?

Сарой кишиси

Бу томонга келаётган бўлсалар керак.

К е н т

Юринг, сизни олиб борай қирол олдига.
 Сиз у ерда тура туриңг. Бир мұхим сабаб
 Мени ҳозир яширинишга мажбур қилади.
 Кейинчалик кимлигимни билиб оласиз,
 Үкінмайсиз шу топдаги ошначиликдан.
 Кетдик, марҳамат.

ТУРТИНЧИ САҲНА

Француз лагери.
 Чодир қурилган.
 Байроқлар осилган, барабанлар.
 Корделия, табиб, солдатлар чиқадилар.

Корделия

Хойнақой, у! Уни ҳәли күрган эканлар.
 Денгиз каби тұлқынланған, ҳовлиққан экан,
 Бошида-чи, дала-даشتни босиб ётгувчи
 Отқулоқми, қоқи ўтми, печак, мингбоши,
 Қичитқи ўт, қариқиздан ўрилган чамбар,
 Тиммай құшиқ айттар эмиш.
 Отряд юборинг.
 Ұсиқ ўтлар орасини, далани, қирни
 Ҳамма әқни ахтаришиб толиб келтирсиин.

Офицерлардан бири кетади.

Илм унинг эсу-хүшин жойига солиб,
 Соғайтириш чорасини тополмасмикан?
 Шундай қылсанг, нима десанг шуни бераман.

Т а б и б

Бунинг яхши чораси бор, қироличамиз,
 Бизнинг ҳамма дардымизга уйқу даводир,
 Қирол эса уйқусизлик азобин тортар,
 Үхлатишда турли-туман дори-ўтлар бор.
 Шулар билан қайғу күзин юмдириш мүмкин.

Корделия

Э, сиз кўкнинг ҳалигача яширин сирлари,
 Табиатнинг синалмаган мажҳул кучлари
 Кўз ёшларим ҳурмати-чун бир дам қўзғалиб,
 Ердам беринг шу бечора, нотавон чолга!
 Тез қидиринг, жаҳл усти тентаклик билан
 Ўзин-ўзи нобуд қилиб қўймасин тагин.

Чопар киради.

Чопар

Киролича,
 Британия қўшини бу томонга келмоқда.

Корделия

Бу бизларга маълум эди. Биз ҳам уларга
 Тўқишишга тал-тайёрмиз. Азизим, отам,
 Сенинг учун бу ишларга қадам қўйдим ман.
 Ва шафқатли эрим эса, менинг кўз ёшим,
 Ялинишим ҳурмати-чун жангга отланди.
 Қонли уруш — обрў талаш жанжали эмас.
 Севги ҳақи, отам, чолнинг ҳуқуқи учун.
 Кошки эди, кошки эди, тезроқ кўролсам.

Чиқади.

БЕШИНЧИ САҲНА

Глостер қасрида бир хона. Регана билан Освальд
 чиқади.

Регана

Хўш, акамиз қўшиклари йўлга тушдими?

Освальд

Балли, маликам.

Регана

Шахсан поччам ҳам шундами?

Освальд

Истар-истамас

Үзларидан, хотинлари ўткир, жанговар.

Регана

Герцог билан учрашдими, граф Эдмунд?

Освальд

Учрашгани йўқ.

Регана

Опам унга хатида нималар ёзган,

Освальд

Билолмадим, маликамиз.

Регана

Балки, Эдмунд зарур бир иш билан кетгандир.

Глостернинг фақатгина кўзини ўйиб,

Үлдирмасдан қўявериш чакки иш бўлди.

Энди бу кўр қайга борса арзу дод айтиб,

Одамларни бизга қарши қўзғаб юради.

Тахминимча, сўқир чолнинг аччиқ ҳаётин

Қисқартишга Эдмунд ўзи кетгандир.

Балки —

Иўл-иўлакай душман кучин айгоқ ҳам қилар.

Освальд

Орқасидан бориб, толиб хат толшираман.

Регана

Куни эрта биз ҳужумга ўтсамиз керак.

Сен бу ерда қолавергил, йўллар хатарли.

О с в а л ь д

Иложим йўқ, маликамиз, топшириқ жиддий,
Вазифамни бажаришим қатъяни зарур.

Р е г а н а

У Эдмундга нима гаплар ёзган бўлсайкин?
Наҳотки сен менга айтиб бера олмасанг?
Ва балки у... яна қайдам... бериб тур-чи,
Ўқий қолай, сенга қиммат ҳадя берардим.

О с в а л ь д

Йўғ-э, маликам...

Р е г а н а

Мен биламан, ўз эрини маликанг севмас.
Кейинги гал пайқаб қолдим, граф Эдмундга
Эҳтиросу ғамза билан кўз қирин солди,
Мен биламан сир маҳрамисан ўз маликангга.

О с в а л ь д

Менми, маликам?

Р е г а н а

Мен, ҳамиша аниқ билган сўзни айтаман.
Сен ҳам, ахир, ўз танангга бир оз ўйлаб кўр...
Герцог эса ўлиб кетди. Мен билан Эдмунд
Ваъдалашдик, менинг учун муносиб эр у,
Маликангга эп бўлмайди. Яхши билиб қўй.
Граф билан учраша олсанг, мана буни бер.

(Ўзугини чиқарив беради.)

Сен опамга бу гапларнинг ҳаммасин айтиб,
Ақллироқ бўлишига маслаҳат ҳам бер.
Хозирча хайр.

Пўл-йўлакай кўр хоиндан бир шарпа сезсанг,
Билиб қўй-ки, боши учун мукофот тайёр.

Освальд

Учрашай-чи, ким томонда эканлигимни
Ана шунда кўрадилар.

Регана

Йўлинг оқ бўлсин.

Чиқиб кетадилар.

ОЛТИНЧИ САҲНА

Довер яқинида бир ер.
Деҳқон кийим-бошини кийган Глостер билан
Эдгар чиқади.

Глостер

Уша қоя тепасига етдиқ дедингми?

Эдгар

Кўтарилиб бормакдамиз, йўл тикка, оғир.

Глостер

Менга текис сезилмоқда.

Эдгар

Кўрқинч, учирим.
Сиз денизнинг ўшқиришин эшитяпсизми?

Глостер

Йўқ, эшитмайман.

Эдгар

Демак, кўзниаг оғриғидан танангиздаги
Барча ҳислар ўтмасланиб қолибди.

Глостер

Балки.

Менга шундай туйилмоқда, товушинг ўзгариб
Сўзларинг ҳам анча равон эшитилмоқда.

Эдгар

Янглишасиз, заррача ҳам ўзгаргани йўқ.
Кийим-бошим дуруст, холос...

Глостер

Сўзинг ҳам бошқа.

Эдгар

Ана, келдик, Сиз қўзгалманг!
Вой, бу ваҳима-ку!
Бу таги йўқ жаҳанинамга қараш ҳам қўрқинч!
Пастда учган қарға, зағча қўнғиздай кичик.
Ана пастда бир учирим тошга осилиб
Битта одам йиғаётир денгиз укропин,
Хунар бўлмай ўлсин ахир. Узоқдан худди
Қатталиги ўз бошидан кичик кўринар.
Қирғоқдаги балиқчilar сичқондан майда,
Лангар ташлаб турган катта кемалар эса,
Кичик-кичик қайиқлардай қалқиб турибди,
Қайиқлар-чи, тол ҳивичдай кўзга илғанар,
Қирғоқдаги тошга уриб парчалангувчи
Тўлқинларнинг ўкириши бу ерга етмас.
Бўлди энди, қарамайман, бошим айланди,
Кўзим тиниб жарга томон қулаш им мумкин!

Г л о с т е р

Ўзинг турган ерга мени олиб чиқиб қўй.

Э д г а р

Қўлни беринг.

Бир қадамча берида сиз ўша ўнгирдан.
Вой-бу! Агар ой нур сочган шу дунёдаги
Фазналарни берсалар ҳам, сакрамас эдим.

Г л о с т е р

Қўлимни қўй. Тағин ушбу ҳамённи ҳам ол,
Ичи тўла қимматбаҳо дурру гавҳарлар,
Сендай битта камбағалга ғазна бўлади.
Руҳлар сенинг тақдирингга посбон бўлсин!
Энди қани, хайрлашиб мен билан, жўна!
Лекин сенинг кетганингни мен эшитайин.

Э д г а р

Хайр сизга, жаноби олий!

Г л о с т е р

Хайр, биродар!

Э д г а р (Ўз-ўзиға.)

Шундайгина макру ҳийла ишлатиб уни
Умидсизлик касалидан соғайтираман.

Г л о с т е р (Тиз ҷўқади).

Э, осмон қудратлари!

Бу дунёни мен тарк қилдим, сизга юкиниб,
Оғир ғамни ўз елкамдан соқит қиласман.
Сизнинг қодир эркингизга қарши келмасдан
Бу қайғуни узоқ йиллар кийиб тўзгитсам,
Жонга теккан ҳаётимнинг машъал пилиги
Ўз-ўзидан ёниб адoқ бўлажаги рост.
Эдгар агар тирик бўлса, омон сақлангиз.

(Ўрнидан туради.)

Хайр энди, қадрдоним.

Эдгар

Хайр, мен кетдим.

Глостер гүё ўзини пастга ташлайди, йиқилади.

(Эдгар, бир чеккага.)

Ҳаёт ўзи ўлим томон тўғри йўл экан,
Ўз-ўзини ўлдиришнинг ҳеч ҳожати йўқ.
Ҳаёт ўзи таслим бўлгач ўғри қўлига,
Тасаввур ҳам бу ҳаётни ўғирлай олур.
Ўз ўйлаган манзилига етгандан қейин,
У ортиқча ўйламай ҳам қўя қолади.

(Овозини ўзгартириб.)

Тирикмисан? Ҳой, биродар, товушингни чиқар!
Е ўлдингми? Иёғ-э, ана қимирлаяпти.
Ўзингиз ким?

Глостер

(Ўзига келаётуб)

Иўқол дейман! Тинчроқ ўлайин.

Эдгар

Сен нимасан, парданмисан, ҳаводаммисан,
Е ўргумчак ипиданми — мунча енгилсан,
Шунча юксак учиримдан йиқилган киши
Парча-парча бўлар эди тухум пўчоғидай.
Сенинг бўлса нафасинг бор, қон ҳам чиқмабди,
Сўзлаяпсан, тану жонинг соғу саломат.
Сен йиқилган шу қоянинг, шу учиримнинг
Баландлиги оз деганда ўн терак бўйи.
Бир мўъжиза рўй берди-ю саломат қолдинг.
Қани гапир!

Глостер

Йиқилдимми, йиқилмадимми?

Эдгар

Шу даҳшатли бўр қоянинг қоқ чўққисидан.
Юқорига қарасанг-чи, унда сайраган
Тўргайларниң товши бунида эшитилмайди.
Қарасанг-чи!

Глостер

Афсус, афсус, мен кўрман, ахир!
Ё аламдан бирор ўзин ўлдиримак бўлса,
Улим уни шафқатидан маҳрум қилганми?
Ёхуд бирор жабрдийда золим қўлидан
Ўз-ўзини ўлдириш-ла қутуолласми?

Эдгар

Оёғингда турасаними, қўлингни бер-чи.

Глостер

Эҳ, аттаинг-а...

Эдгар

Бу иш худди мўъжиза бўлди!
Ҳув тепада, чўққидаги сиз билан турган
Ким эди у?

Глостер

Бир камбагал, ожиз тиланчи.

Эдгар

Пастдан менга жуда қўрқинч бўлиб кўринди
Икки кўзи икки ойдай катта, ярқироқ,
Юзида-чи, минглаб бурун нафас олгандай,

Икки щоҳи тўлқинлардай лапанглаб турар.
У ҳойнаҳой шайтон бўлса керак, фикримча.
Э, отахон, баҳтиёр бўлиб, омон қолдингиз,
Худойимнинг қудратига шаку шубҳа йўқ.

Глостер

Бу иш менга ўғит бўлди. Бу кундан кейин
Қанча жабру жафо бўлса туриб бераман,
Токи ўзи «бас, ўласан» демагунича.
Ҳамроҳимни мен одам деб ўйлаган эдим.
Ҳадеб, ҳадеб «уҳ, ёвуз руҳ!» деяверарди.
Уша мени бу ергача етаклаб келди.

Эдгар

Сиз тинчланинг, сабр қилинг. Бу одам кимдир?
Дала ўтларидан чамбар ўраб бошига кийган,
таажжуб аҳволда Ли р киради.

Саломат ақл ва тушунча ўз эгасини
Бу зайлда оро бериб безолмас эди.

Лир

Жаҳонда мендан бошқа ҳеч ким ўз номига пул
сўқдира олмайди, чунки мен қиролнинг ўзгинаси бўла-
ман.

Эдгар

Бу аҳволга кўз ташласам юрагим портлар.

Лир

Бу ишларда табиат одамзоднинг ҳийлаю найранг-
ларидан юқорироқ туради. Аскар болалар, мана сиз-
нинг биринчи ойлиғингиз. Бу ўспирин ўқёйни худди
полиздаги қўргуғичдай ушлар экан. Сенга ўқ-ёй ту-
тишини ким қўйибди, қўлингга газ ушла. Ия-ия, қаранг-
лар-а, сичқон. Жим... жим... Мана шу бир бурда

пишлоқ бизга ёрдам беради. Қўлқопимни ечиб истаган паҳлавони замон билан жангга киришга тайёрман. Қани, совутимни келтиринг. Ие анов қушча хўп учеб кетдими. Фут-фут!.. Нишонга ол, тўғри нишонга ол. Паролни айт.

Эдгар

Ошрайҳон.

Лир

Ут!

Глостер

Бу товуш менга таниш.

Лир

Ҳа, ҳа! Оқ соқолли Гонерилья!

У мени кучук боладай эркалаб, «сенинг оқ соқолинг бор» деб ишонтиromoқчи бўлар эди. Менинг-чи, умримда соқолим бўлган эмас, мен улар билан нима тўғрида гаплашсам, барибир, бир «ҳа» деб, бир «йўқ» деб жавоб берар эдилар. Бир вақтнинг ўзида ҳам «ҳа» деб, ҳам «йўқ» деб жавоб бериш, бу энди виждонсизлик бўлади. Мен ёмғирда қолиб, мағзи-мағзимгача увиганда, изғирин бўрондан совқотиб тишим тишимга тегмаганда, момақалдироқлар менинг амрим билан тинмаганда, ана ўшанда мен уларнинг ким эканликларини танидим. Ва сўзларининг бебурд қадрини англадим. Балли, уларнинг сўзлари билан ишлари бошқа-бошқа бўлар экан. Улар менга «сен ҳамма нарсадан кучлироқсан» деган эдилар, бу ёлғон чиқди, чунки безгак мендан кучлироқ экан.

Глостер

Бу товушни жуда яхши танийман.
Наҳотки бу қирол бўлса.

Лир

Қирол, қирол, бошдан-оёғи қирол.

Менга битта қарашибликнинг ўзи кифоя.

— Теваракда ҳамма одам чулдираб қолар.

Ҳаётини бағишлайман. Айби нимади?

Мұҳаббатнинг уят иши дедингми, нима?

Сен ўлмайсан. Шу гуноҳга ўлим ҳукмими?

Йўқ, бўлмайди. Қуёнлар ҳам, тиллақўнғизлар

Кўз ўнгига уят ишни қиласидилар-ку.

Фаҳш, разолат гуллайверсин! Нима қиласиди

Глостернинг ҳаром ишдан туғилган ўғли

Менинг тоза ва никоҳли хотиним туққан

Қизларимга қараганда, ўз отасига

Вафолироқ чиқиб қолди. Қани шайлапинг!

Тезроқ туғинг ва туғдиринг. Солдатлар керак!

Сиз мана, бу кеккаювчи хонимга қаранг,

Башараси пайғамбару ичи тўла муз.

Қулоғига «маза» сўзи кирап-кирмасдан

Мугомбирлик қилиб бошин чайқаб қўяди.

Айшу ишрат, завқу сафо ишларида-чи,

Кўркаламуш ёки бирор ёшгина байтал

Ўшанчалик эҳтиросга мубтало эмас.

Афсонада Кентавр деб аталган ҳайвон

Ярми хотин, ярмиси от бўлган маҳлуқлар.

Белигача худоларнинг эрмаги бўлиб,

Белдан қуий шайтонларнинг ихтиёрида,

У ерда-чи, жаҳаннам ҳам, гугурт ҳиди ҳам,

Зулмат тўла қурдум дарё бариси шунда.

Қайноқ ҳаво, ўт, аланга, бадбўйлик ва барбодлик.

Фу, фу, фу, брр! Барака топкур аттор, менга бир мисқолгина мушк бер, ҳидлаб эсу ҳушимни йиғишириб олай. Мана пули.

Глостер

Қўлингни бер, юзу қўзимга суреб, ўпайин.

Лир

Аввал артай, ундан мурда ҳиди келмоқда.

Глостер

Хе, сен! Олий табиатнинг барбод бир қисми,
Қачондир, бир кун келиб шу обод олам
Сенинг каби барбодликка юз тутажакдир.
Айт-чи, мени танияпсанми?

Лир

Сенинг кўзларингни яхши эслайман. Нега менга
кўзингни гилай қилиб қарайсан. Бекорга овора бўлма,
сўқир муҳаббат тангриси, мен сева олмайман. Шу
таклифномани ўқиб кўр-чи, ўқиганда айрим ҳарфлар-
нинг щикаст гажакларига айниқса эътибор қил.

Глостер

Агар бу хатда ҳар бир ҳарф қуёш бўлиб кўрин-
ганда ҳам, барибир, мен ўқий олмайман.

Эдгар

Бирор айтса ишонмасдим, афсус, рост экан.
Ва юрагим ачигандан торс ажраб кетди.

Лир

Ўқи дейман!

Глостер

Нима билан? Кўз косаси билан ўқийми?

Лир

Эҳа! Ишларимиз ҳали шунақаснига келиб тақалдими? Манглайимида кўз, чўнтағимизда пул йўқми? Чўнтақнинг-ку иши енгил, кўзларга қийин. Шундай бўлса ҳам, барибир сен теварак оламда нима гап, нима ишлар бўлаётганини кўра оласан-ку.

Глостер

Кўрмайман, аммо сезаман.

Лир

Бу нима деганинг, жинни бўлдингми? Одам деган кўзи бўлмаса ҳам теварак оламда нима бўлаётганини кўра олади. Сен қулоқларинг билан қара. Ана судья оддий майда ўринни масхара қилаётганини кўряцсанми? Бу ёқقا кел, қулоғингга бир нима шивирлайман: буларнинг ўринларини алмаштириб қўйиш керак. Бир, икки, уч,— энди судья қани-ю, ўғри қани? Хонадон қўриқлайдиган итнинг гадойга ҳурганини кўрганмисан?

Глостер

Кўрганман, шоҳим.

Лир

Уша шўрлик гадонинг итдан қандай қочганини ҳам кўрганмисан? Мана шу сенга ҳукмронликнинг яққол тимсоли бўла олади. Ит ўзининг хизмат бурчини адо қилмоқда, демак, унга итоат қилиш керак.

Қонли қўлларингни тўхтат, раҳмсиз жаллод!

Не сабабдан узмоқчисан, шу қизнинг бошин?

Қизнинг боши чопилишига сабаб гуноҳни

Сен ҳам жон деб қилмасмидинг, ўз-ўзингни чоп.

Муттаҳамни худди судхўр дорга осгандай,

Юпқа бўздан майда гуноҳ ошкор кўриниб,

Зарбоб, қундуз тагида-чи яшириниб қолар.
 Гуноҳингни олтин билан жилолантиранг,
 Унга қонун найзаси ҳам ўтмай, синади.
 Сен устингга жулдуурвоқи кийиб олсанг-чи,
 Адолатнинг похол чўли тешиб ўтолур.
 Айборд йўқ! Бунда ҳеч ким айборд эмас!
 Ҳаммангизни мен оқладим, шунақа дўстим,
 Оғизларни юмдиришга ҳукмим ўтади,
 Айтинг мени ким бу ишда айблай олади!
 Сен ўзингга шиша кўзлар сотиб ола қол,
 Кейин жирканч сиёсатдан кишилар қаби
 Кўрмасанг ҳам кўряпман деб риё қиласан.
 Қани, қани, этигимни тортиб юбор-чи!
 Қаттиқроқ торт: шундай...

Эдгар

Оҳ, бу гаплар, алжираш билан саломат фикрнинг,
 Тентаклик билан ақлнинг аралашмаси.

Лир

Мабодо сен тақдиримга йиғлаш истасанг,
 Кўзларимни ола қол. Сени танийман:
 Сен — Глостер. Чида! Ўзинг яхши биласан,
 Биз дунёга йиги билан туғиламиз-ку,
 Бу оламнинг ҳавосини ҳидлар-ҳидламас
 Фифон тортиб йиги бошлигимиз.
 Қулоқ солсанг, бир ўгит бор, сенга айтаман.

Глостер

Оҳ, қийин кун, заҳар-заққум кун!

Лир

Туғиларкан биз йиғлаймиз, чунки ҳаётнинг
 Саҳнасида аҳмоқларнинг ролин ўйнаймиз.

(Эдгар кийган қалпоқни кўриб)

Жуда яхши қалпоқ экан! Ҳарбий макр учун,
Мен шу кигиз қалпоқчани кийиб оламан
Ва отларнинг тақаларин тескари қоқиб,
Куёвларим даргоҳига яширин кираман!
Ундан кейин ур ҳо уру, ҳо уру, ҳо уру, ҳо уру!

Бир сарой кишиси билан бир неча
мулозимлар киради.

Сарой кишиси

Ана ўзи, ана ўзи! Дарров тутинглар!
Шаҳаншоҳим, сизни севган мушфиқ қизнігиз...

Лир

Тагин нима? Нажот йўқми? Мен асирманми?
Яна тақдир панжасида эрмак бўлдимми?
Баримта ҳам тўлай қолай, андак ювош бўл.
Мен миямдан яралиман, табиб келтиринг.

Сарой кишиси

Ҳамма нарса тайёр бўлар, шаҳаншоҳимиз.

Лир

Ёрдам берар кишим йўқми? Ёлғиз ўзимми?
Қўйма тузга айланаман, бу шўр ёшлардан.
Икки кўздан ирмоқ каби оққан кўз ёшим
Куз кездаги дала йўлни чангин босгудай.

Сарой кишиси

Шаҳаншоҳим...

Лир

Үлганда ҳам мард ўламан, шотир куёвдай!
Нима қилар, битта шўхлик қилиб қўяй-чи!
Мен қиролман — билмайсизми мени, жаноблар?

Сарой кишиси

Сиз, биэларнииг қиролимиз, биз сизга чокар.

Лир

Үндай бўлса, қониқарли, ишлар жойида.
Мени тутмак истасангиз, хўп, тута қолинг.
Қани! Қани! Қани! Қани!

Қоча бошлиди, хизматчилар қувладилар.

Сарой кишиси

Ҳаққа етган гадода ҳам бу кўрлик бўлмас,
Қирол шундай ҳолда бўлса... нима ҳам дейсиз!
Икки қизи шу аҳволга солиб қўйибди,
Уз наслини шу лаънатдан сақлаб қолишга
Кичик қизи қараб турмай ҳаракат қиласр.

Эдгар

Салом, жаноб.

Сарой кишиси

Салом бўлсин! Хўш, қандай хизмат?

Эдгар

Уруш бўлар эмиш, жаноб, эшитдингизми?

Сарой кишиси

Бўлмасам-чи; қулоғи бор ҳамма эшитған,
Ва ҳаммага аллақачон аён бўлган сир.

Эдгар

Айтиб бера оласизми, душман яқинми?

Сарой кишиси

Жуда яқин, биз томонга келишга шошар,
Эшитдимки, кутмоқдалар ҳар соат сайин.

Эдгар

Ташаккур, жаноб.

Сарой кишиси

Бунда бир оз тутилса ҳам қироличамиз
Аммо қўшин аллақачон отланиб бўлган.

Эдгар

Ташаккур, жаноб.

Сарой кишиси чиқиб кетади.

Глостер

Эй шафқатли парвардигор! Жонимни олгил,
Қайта бошдан душман келиб ўчакишимасин,
Ёв қўлига таслим бўлмай, ўлиб кетайин.

Эдгар

Мана буни дуо депти,
Аъло, отажон.

Глостер

Ўзинг кимсан, азиз дўстим?

Эдгар

Битта бечора,
Тақдирнинг ҳам зарбларига қўникиб кетган,
Эҳтиёждан таълим олган, қайғуга ошна,
Ачинишга дили мойил. Қўлни беринг-чи
Сизга бирор бошпана ҳам топиб бераман.

Глостер

Рахмат!

Сенга тангри ўзи мададкор бўлсин
Битта қилган шафқатингга юз ато қилсин.

Освальд киради.

Освальд

Баракалла! Мукофот ҳам бизники бўлди.
Кўзиз калла, фақат менинг катта обрўлар,
Даражалар топишимга яратилгансан.
Кекса хони, тез тавба қил гундохларингга!
Улдиришга қиличим ҳам қинидан чиққан.

Глостер

Оғайнилик қўли билан
Битта силтаб чоп.
Эдгар ўртага киради.

Освальд

Ҳой қишлоқи, бу қанақа безбетлик бўлди,
Сотқин ёнин олмоқдасан, алон ошкор?
Қоч! Бўлмаса, бу хоинга тикилган бало
Сенга юқиб, сен ҳам бирга ўлиб кетасан.
Кўлинин қўй!

Эдгар (*Қишлоқча гапира бошлиайди.*)
Йўғ-э, жаноб олийлари, нима қилсангиз қиласиз,
мен бунинг ёнидан нари жилмайман.

Освальд

Қоч, қулвачча, йўқса, ўласан!

Эдгар

Барака тоқкур хўжайин, тўғри йўлингизга кетаверинг-да, шу камбағал бечоралар ўтиб кетсин. Агар мени манманлик юзасидан ўлдириш мумкин бўлганда эди, бу ёруғ жаҳонда икки ҳафта ҳам тирик юролмас

эдим. Қўйинг энди, мўйсафидга тега кўрманг, бўлмаса мана бу сўйилни ишлатишга тўғри келиб қолади, сизнинг бөшингиз қаттиқмикан, ёки менинг сўйилим. Мен сизга гапнинг дангалини айттаётиман.

О с в а л ь д

Қоч деяпман, бир уйим гўнг.

Э д г а р

Қиличингиз билан истаганингизча янаверинг, жаноб олий, энди мен сизнинг тишингизни қоқиб олиб, санамасам бўлмайдиган кўринади.

Икковлари олишадилар. Освальд йиқиласди.

О с в а л ь д

Ҳой, қул, мени сен ўлдирдинг — мана ҳамён
Уз бахтингни истар бўлсанг, мени дафи қил.
Чўнтағимда бир мактуб бор, ўшани олиб,
Граф Эдмунд Глостерга тезликда топшир.
У инглиз қўшинида хизмат қилади.
Бевақт ўлим, чакки бўлди!

(Ўлади.)

Э д г а р

Сени яхши танир эдим, тубан ялоқхўр,
Бузуқ хулқли маликанга ёқмоқлик учун
Ҳар истаган ирганч ишдан чўчимас банда.

Г л о с т е р

Нима бўлди, у ўлдими?

Э д г а р

Бир оз дам олинг,
Отажоним. Мен бир муни титиб чиқайин,

Балки шу хат менга қилар ошиғарчилик.
У ўлишга ўлди, аммо жуда ҳам эсиз
Бошқа қиши жаллод бўлса яхши бўларди.
Кўрайлик-чи!...

Сен ранжима юмшоққина мум.

(Муҳрни синдиради.)

Хулқу одоб — бизни кечир!
Баъзан душман ниятини билмаклик учун
Ҳатто қалбин ёриб кўриш жоиз бўларкан,
Қоғозини йиртиб қарашиб — кечирарликдир.

(Уқийди.)

«Ҳар иккимизнинг бир-биримизга берган ваъда-
ваидларимизни ёдингга тушир. Сенинг қўлингда унинг
ишини саранжом қилиб қўя қолиш учун бирталай им-
кониятлар бор. Шагинг бўлса, -бас — қулай фурсат
ҳамма вақт топилар. Агар у ролиб бўлиб қайтиб келса,
бизнинг ҳалигача қилган ниятларимиз фойдасиз бўлиб
қолади. Мен унга бир умр асира бўлиб қоламану,
унинг тўшаги менга зиндан бўлади. Мени бу тўшак-
нинг қўланса қучогидан қутқариб, ўзим қилган бу
журъатнинг мукофоти учун эримнинг ўринини эгалла.
Сенинг (хотининг дейишни жуда орзу қилар эдим)
садоқатли Гонерильянг».

Уҳ, хотинлар иродасин лойқа гирдоби!
Ўз меҳрибон эрига ҳам қила олар қасд!
Уринбосар менинг укам бўлиб қолармиш!
Жинояткор фоҳишларнинг чопарин эса
Шу ердаги қум ичига кўма қўяман.
Ва герцогни ўлдиришга таҳдид қилғувчи
Бу лаънати хатни сақлаб, вақти келганда
Ўз қўлига топшираман. Чопар ўлганин
Ва бу қўрқинч қасд хабарин унга айтаман.
Тақдир менга бу қисматни юклаб қўйибди,

Глостер

Қирол эса эсин жўйган... мен тентак бўлмай,
 Ҳанузгача чидам билан бошимга тушган
 Бутун жабру жафоларни англаб турибман.
 Кошки эди мен ҳам тентак бўла қолсам-ку
 Фикрим билан тортган қайрим тафовут қилса,
 Елғондакам хаёлларга кўмилиб кетиб,
 Машаққатлар ўз-ўзини унудиб қўйса.

Узоқдан барабан овози.

Эдгар

Қани менга қўлни беринг. Тингляяпсизми
 Узоқлардан эшитилар довул овози,
 Сизни дўстлар ҳузурига олиб бораман,
 Қани кетдик, отажоним.

Чиқадилар.

ЕТТИНЧИ САҲНА

Француз лагерида бир чодир
 Лири бир ётоқда увлаб ётибди; унинг ёнида табиб, сарой
 кишиси ва бир неча мулоғимлар.

Музиканинг сокин овози эшитилади.

Корделия

Шафқатли Кент, яхшилигинг мукофотига
 Бу ҳаётда нима билан жавоб берайни?
 Ҳаёт десам — ҳаёт қисқа,
 Давлат десам — давлатим оз.

Кент

Шу сўз ўзи — менинг учун олий мукофот,
 Мен бу гапни юрагимдан олиб айтаман.

Корделия

Устингдаги қора кундан хотира бўлган
Усти бошни ечиб ташлаб, бошқасини кий.

Кент

Афв этасиз, мен ўзимни билдириб қўйсам
Мўлжал қилган бутун ишим барбод бўлади.
Илтимос шу, токи ўзим айтмагунимча
Сиз ҳам мени танимаган бўлиб кўрининг.

Корделия

Сиз айтганча бўла қолсин,
Хурматли лордим.

(Табибга)

Хўш, қиролнинг ҳоли қалай?

Табиб

Ҳозирча ухлар.

Корделия

Э, осмон қудратлари, сиз шифо беринг,
Аламлардан мажруҳ бўлган унинг қалбига.
Қайғудардан гўдакланиб қолган отамнинг
Ҳиссиётин қайта бошдан тартибга солинг.

Табиб

Анчагина ухлаб қолди. Майли десангиз,
Энди уни уйғотсак ҳам бўлаверади.

Корделия

Илм нима деган бўлса ўшани қилинг.—
Бор ихтиёр ўзингизда. Қачон кийинди?

Сарой кишиси

У шунчалик қаттиқ ухлаб қолган эдики,
Үйқусида кийинтирдик, сезгани ҳам йўқ.

Табиб

Уйғотганда сиз ўзингиз шу ерда бўлинг.
Хойнаҳой тинч уйғонади.

Корделия

Яхши, бўламан.

Табиб

Сиз, маликам, яқин келинг.

(Музикачиларга)

Қаттиқроқ чалинг.

Корделия

Азизгинам, отажоним, кошки эдики,
Менинг лабим, ўпишларим бир шифо бўлиб,
Опаларим оқ сочинингга етказган алам
Бир лаҳзада унутилса.

Кент

Азиз маликам...

Корделия

Ҳатто бизга бегона зот бўлганида ҳам,
Оқ сочиға раҳм қилмоқ керак бўларди.
Шу ёшдаги кекса бардош бера олармиди,
Бўронларнинг аёв билмас даҳшат кучига,
Қўрқинч билан илон изи солган чақмоқнинг
Ўлдиралик ваҳмасига, гулдуросига?

Ахир, бунинг зўримиidi (шўрлик тунқотар)
 Боши очиқ тонг отдириш очиқ ҳавода?
 Душманимниг мени қопган ити бўлса ҳам
 Чақирадим шуидай кеча гулхан ёнига.
 Шўрлик отам, дарбадарлар билан тентираб
 Чирик похол уйимидан паноҳ қидириб,
 Чўчқаларга қўшни бўлган иоиложликтан.
 Қаандай алам! Шунга шукур қилиш керакки,
 Ақли билан баб-баравар жони чиқмабди.
 У уйғонди!

Сиз ўзингиз аввал гаплашинг.

Т а б и б

Йўқ, яхшиси сиз гаплашинг.

К о р д е л и я

Хукмроним, аҳволингиз энди дурустми?
 Соғлигингиз жойидами, улуғ шаҳаншоҳ?

Л и р

Нега мени тобутимдан чиқарадилар?
 Биласами, нурга чўмган, порлоқ фариштам,
 Мени оташ чамбаракка михлаб қўйганлар,
 Кўз ёшларим эритилган қўрғошин каби
 Тиним билмай оқмоқдадир шу чамбаракка.

К о р д е л и я

Шаҳаншоҳим, айтинг, мени танийапсизми?

Л и р

Ҳа, ҳа, сени танияпман,
 Сен нурли малак.
 Қачон ўлган эдиңг?

Корделия

Ана, алаҳлаяпти.

Табиб

Ҳозиргина уйғонди у. Озгина кутинг.

Лир

Мен қайдайдим? Қаердаман? Бу нур қаердан?
 Күнглинг чўккан. Ўзим тушган ушбу аҳволда
 Бир ўзгани кўрсам эдим, ранжиб ўлардим.
 Нима дейман? Шу қўллар ҳам меникимикан?
 Қани, синаб кўрайлик-чи... Нина санчияпти.
 Энди битта ҳақиқатни аниқлаш керак,
 Мен ўзим кимман!

Корделия

Менга битта тикилиб қаранг
 Ва яхшилаб дуо қилинг, фотиҳа беринг.
 Э, йўқ, йўғ-э, тизза чўқманг, мунақа қилманг.

Лир

Сўрар эдим, мени әрмак қилиб кулманглар,
 Мен қексайган, эсин еган қишиман, холос.
 Қам ҳам эмас, кўп ҳам эмас, саксонга кирдим,
 Чинин айтсан ўз-ўзимдан таҳлика даман,
 Бир оэгина эсдан ажраб қолдиммикан деб.
 Сизни таниб тургандайман... Бу кишини ҳам...
 Шубҳам шуки, қаердаман, билмай турибман.
 Ҳам мана шу уст-бошлар қаердан келди,
 Етти ўлаб, ёдимга ҳам келтиролмайман.
 Ва билмайман бу кечаси қайда тунадим.
 Янглиш айтсан, мазақ қилиб кула кўрманглар...
 Тахминимча, гўёки шу, шу, ушбу хоним
 Менинг болам, Корделия.

Корделия

Худ, худди ўзи!

Лир

Бу ёш нима, кипригинг нам? Бас қил, йиғлама.
 Агар бўлса, заҳар топдир, мен ичмоқчиман.
 Ва сен мени севолмайсан. Опаларинг-чи,
 Ҳеч сабабсиз менга қаттиқ озор бердилар,
 Сенда эса сабаблар бор.

Корделия

Ҳеч нима йўқ! Йўқ!

Лир

Қаердаман? Франциядаманми?

Кент

Ўз давлатингиз, ўз мамлакатингиздасиз,
 Менинг шаҳаншоҳим.

Лир

Алдаш керак эмас.

Табиб

Сиз юпатинг, қиролича, кўриб турибсиз,
 Дард қўзғалди, ўтиб кетди ёвуз тутқаноқ.
 Бироқ, ҳадеб ўтган ғамни эсга солсангиз
 Қайта бошдан янгиланиш хавфи йўқ эмас.
 Уни бундан бирор ерга дарров кўчириб,
 То ўзига келгунича беозор қўйинг.

Корделия

Менинг билан бирга кетиш сизга маъқулми
Нима дейсиз, шаҳаншоҳим!

Лир

Аммо мен билан
Яшамакка сенда чидам бўлиши зарур.
Сўровим шу, ўтган гапни унут ва кечир.
Мен бир қари, эсин жўйиб қўйган кишиман.

Кент ва сарой кишисидан бошқа ҳамма чиқиб кетади.

Сарой кишиси

Герцог Корнуэллинг ўлдирилганилиги тўғрисидаги
овозалар ҳақиқатга тўғри келадими, жаноб?

Кент

Мутлақо тўғри, жаноб.

Сарой кишиси

Унга қарашли қўшинлар устидан энди ким қўмон-
дон бўлиб қолди?

Кент

Овозаларга қараганда, Глостернинг ҳароми ўғли.

Сарой кишиси

Глостернинг қувгин ўғли Эдгар, граф Кент билан
бирга Германияда деб айтадилар.

К е н т

Ишқилиб, ҳар хил овозалар бор. Бироқ, энди ўзимиз тўғри ўйлашга ҳам вақт етди: герцогнинг қўшинлари яқинлашиб қолди.

С а р о й к и ш и с и

Жуда қонли жанг бўладиганга ўхшайди. Хайр, жаноб. (Кетади.)

К е н т

Ортиқ марра яқин. Бизни фалокатми, баҳтми кутади, буни энди жангнинг оқибати ҳал қиласди.

Чиқади.

У ПАРДА

БИРИНЧИ САҲНА

Довер яқинлигига Британия лагери.
 Барабанлар чалиб, байроқлар кўтариб Эдмунд, Регана
 аъёнилар ва солдатлар чиқадилар.

Эдмунд (аёнлардан бирига)

Сиз герцогдан сўраб кўринг: сўнгги режаси
 Ўз кучида турибдими, ё ўзгардими?
 У донмо шубҳа билан тарааддудга банд.
 Бизга ахир бирор қатъий жавобин берсин.

Аъён чиқиб кетади.

Регана

Мен опамнинг чопаридан хавотирдаман.

Эдмунд

Мен ҳам бирор иш бўлди деб қўрқаётирман.

Регана

Менинг сизга бўлган майлим қандай экани
 Ўзингизга жуда равшан, азиз Глостер.
 Шунинг учун очиқ-ойдин тўғрисин айтинг,
 Сиз опамни севасизми?

Эдмунд

Хурмат қиласман.

Регана

Сиз поччамнинг мулки томон олиб боргувчи
Ёниқ йўлга тушганмисиз?

Эдмунд

Адашмоқдасиз.

Регана

Тахминимча опам билан шундай яқинсиз,
Иккингизни бир бутун деб ҳисоблаш мумкин.

Эдмунд

Номусимга онт ичаман — бу, бундай эмас.

Регана

Шундай аҳвол бўла қолса чидолмас эдим,
Унинг билан яқинлашманг, жоним Глостер!

Эдмунд

Йўқ, йўғ-э, сиз заррача ҳам хавотир олмайг.
Ана ўзи эри билан бирга келяпти.

Барабанлар, байроқлар билан Альбани, Гонерилья
ва солдатлар кирадилар.

Гонерилья

(ўз-ўзига)

Мен бу жангда мағлуб бўлсан, бўларман, аммо
Синглим, бизни ажратишга йўл қўя олмайман,

Альбани

Ўз севимли синглимизга саломлар бўлсин,

(Эдмундга)

Қирол кичик қизи билан биргамиш, жаноб.
 Ва бизнинг бу қаттиққўлли иродамиздан
 Ранжиган кўп кишилар ҳам у ерда эмиш.
 Мен ожизман, ҳаққоният бўлмаган ерда.
 Француэлар бизга қарам давлат ерига
 Босириққа келишлари маъқулмас, тўғри,
 Аммо қирол ва қиролга яқин зотларнинг
 Биздан қилган шикояти, афсус, ўринли.

Э д м у н д

Бу маъқул гап.

Р е г а н а

Баҳслашув нимага керак!

Г о н е р и л ь я

Ҳозир ёвга баҳамжиҳат қарши чиқайлик.
 Оилавий ёки шахсий можароларнинг
 Ҳозир қатъий ўрни эмас.

А л ь б а н и

Бўлмаса, дарров
 Қўшиндаги оқсоқоллар кенгаш чақирсан,
 Шулар қилган қарор билан ишни бошлаймиз.

Э д м у н д

Тезлик билан мен қеламан, сизнинг чодирга.

Р е г а н а

Сиз, биз билан юрасизми, опажоним.

Г о н е р и л ь я

Иўқ.

Регана

Одобли иш бўлар эди, юриинг, сўрайман!

Гонерилья

(ўз-ўзига)

Ҳа, ҳа, демак, маълум бўлди.

(Овоз чиқариб)

Хўп, кетдик, синглим!

Деҳқонча усти-бош кийиб олган Эдгар киради.

Эдгар

Биздай ожиз камбагалга ижозат бўлса,
Икки оғиз сўз бор эди жаноб герцогга.

Альбани

(бошқаларга қараб)

Мен ҳозир бораман. Хўш, нима гапинг бор?

Альбани билан Эдгардан бошқа ҳамма кетади.

Эдгар

Шу хат сизга; жангдан олдин бир ўқиб қўйинг.
Жангдан голиб чиқолсангиз, бурғу чолдиринг,
Хат топширган киши дарров етиб келади!
Кўринишда жуда иочор кўринисам ҳамки,
Бу хатдаги бор гапларни тасдиқ қилувчи
Бир жангчини толиб келиш қўлимдан келар.
Ва мабодо жангдан омон чиқа олмасангиз,
Ўз-ўзидан бу дунёнинг ташвиш-фурбати
Сиз учун ҳам, бошқа учун ҳам барҳам топади.
Омон бўлинг, толенингиз доим ёр бўлсин.

Альбани

Сен тура тур, бу хатни мен ўқиб чиқайин.

Эдгар

Бир нафас ҳам кечикишга имконият йўқ.
 Зарур бўлган ҳар соатда худайчи чалсин,
 Уша замон мен бу ерда ҳозир бўламан.

Чиқади.

Альбани

Бўлмаса хайр! Мен бу хатни ўқиб чиқаман.

Эдмунди киради.

Ёв лашкари кўринмоқда. Қўшин тортайлик.
 Айғоқчилар топиб келган бу маълумотда
 Ёв аскарин кучи, сони аниқ айтилган.
 Тез ҳаракат қилиш энди сизнинг бурчингиз.

Альбани

Уз вақтида, кечикмасдан тайёр бўламиз.

Чиқади.

Эдмунди

Севаман деб қасам ичдим опа-сингилга,
 Улар худди илон чақсан кишилар каби
 Минг тўлғониб бир-бировин ёмон кўради.
 Бу икковдан қайсибирин эгаллай экан?
 Биттасинми? Икковинми? Ҳеч қайсисинми?
 Ҳар иккови тирик қолса баҳт ҳам бўлмайди.
 Бевасини олай десам, Гонерильяни
 Гиж-тижлаган, қутиритрган бўлиб қоламан.
 Ўзин десам, эри тирик, ўйин ютмайди.
 Эри эса, олдимида турган жанг учун
 Шу соатда жуда зарур. Аммо кейинроқ...
 У кимнингким йўл устига ғов бўлиб турса
 Уша одам бунинг ишин бартараф қиласар.
 Агарда у жангда енгиб, ғолиб чиқа олса,
 Корделия билан Лирга омон бермоқчи.

Бўлмаган гап! Мен бошқарган умумий аҳвол
Иш сўрайди, баҳсу жавоб талаб қилмайди.

Чиқади.

ИККИНЧИ САҲНА

Ҳар икки лагерь ўртасида ҳарб майдони. Барабанлар чалиб,
байроқлар кўтариб Лир, Корделия ва қўшин ўтади.
Эдгар билан Глостер кириб келади.

Эдгар

Бери келинг, отажоним. Шу соя ерда
Хақ иш учун курашганлар енгишин сўраб
Дуо қилинг, оқибатни кутиб ўлтиринг.
Тирик бўлиб, шикаст емай қайтиб келсан
Сизга нима керак бўлса тайёр қиласан.

Глостер

Парвардигор сизни сақласин!

Эдгар кетади.

(жанг олаговури, сўнг қайтиши марши.)

Эдгар қайтиб келади.

Эдгар

Қочамиз, чол. Қани, дарров менга қўл беринг!
Қирол тамом шикаст топди. Ўзи ва қизи
Асир тушди.

Қўлни беринг, қани, қочайлик!

Глостер

Қочиш нега? Шу ерда ҳам чирий оламаи.

Эдгар

Тағин ўша bemaza gap. Биз ўлим пайтиң
Туғилганда бўлган каби жуда табиий

Тақдир бўлган соатида кутиб оламиз.
Ҳамма ишнинг ўз вақти бор. Қани кетайлик!

Глостер

Сен ҳақлисан.

Кетадилар.

УЧИНЧИ САҲНА

Доверда британияликлар лагери.
Барабанлар, байроқлар билан голиб Эдмунд кириб келади.
Унинг орқасидан асир сифатида Лир билан Корделияни
олиб кирадилар: офицерлар, солдатлар ва
бошқалар киради.

Эдмунд

Олиб боринг, қамаб қўйинг! Тоинки судья
Ўз қудратли олий ҳукмин эълон қилгунча,
Фоят қаттиқ назоратда сақланиб турсин.

Корделия

(Лирга)

Яхши ишлар қилмоқ бўлиб тақдир қўлида,
Жазоларга учрашимиз биринчи эмас.
Шум тақдирнинг ғазабидан унча қўрқмайман,
Сенгагина қайғираман, бечора қирол.
Бир учрашиб кўрсакмикан опамлар билан?

Лир

Йўқ, йўқ, йўқ, йўқ. Икковимиз кетдик турмага.
Қафасдаги қушлар каби унда куйлаймиз.
Сен мабодо мендан бирор фотиха сўрсанг,
Тизза чўкиб, афв сўраб қиласман дуо.
Куйлар куйлаб, чўпчак айтиб, ибодат қилиб,
Бирга-бирга авоқтада яшаб турамиз.
Ялтираган парвоналар тутиб куламиз,

Қўча-кўйда дайдиб юрган дарбадарлардан
 Саройдаги аҳволларни сўраб биламиз,
 Ким мартаба эгаллади, ким дорга кетди,
 Кимнинг ҳоли қалай бўлди, билиб турдимиш,
 Тангри бизни жасурликка юборган каби
 Нарсаларнинг чин сиррига воқиф бўламиш.
 Шундай қилиб қоп-қоронги зиндан ичидан
 Ҳуқмроилар ўртасида тошқин-босқиндай
 Бир пасайиб, бир улғайиб давом этувчи
 Олқишлиарни сайр этамиш.

Эдмунд

Икковин олинг!

Лир

Корделия, худди шундай қурбонлар учун
 Худоларнинг ўзи ҳатто исириқ солади.
 Биз биргамиш, бизни энди ажратмоқ учун
 Тулқиларни ўт тутатиб индан қувгаидай
 Осмондан ёнган тўнка ўғирлаш керак.
 Йиғлама-э!

Булар бизни йиғламоққа мажбур қилғунча
 Үзларини эту сўнгак билан аралаш
 Ёвуз тоғун, қора вабо ютиб қўяди.
 Аввал булар ўладилар,

Қани, юр, кетдик!

Қўриқчилар Лир билан Корделияни олиб
 чиқадилар

Эдмунд

(бир офицерга.)

Менга қулоқ бер...

Унга бир қофоз беради.

Хатни олиб сен буларнинг орқасидан бор.
 Даражангни юқорироқ кўтариб қўйдим:

Шу хатдаги буйругимни бажаришинг шарт.
 Шунинг билан ўз обрўйингга кенг йўл очасан.
 Замонамиз қандай бўлса биз ҳам шундаймиз.
 Қилич учун кўнгилчанлик муносиб эмас.
 Буйруқ қатъий, ортиқча сўз тамом ўринисиз.
 «Хўп!» десанг бас; акс ҳолда бошқача тақдир.

Офицер

Хўш!

Эдмунд

Дарров жўна, ёдингда тут, агар амримни
 Тўла-тўкис бажара олсанг, баҳтли бўласан.
 Эпчилроқ бўл. Гапларимни яхши уқдингми?
 Хатда нима ёзган бўлсам ўшаңдай бажар.

Офицер

Юк тортган от арла емай туролмас, ахир,
 Одам қилган ҳамма ишни бажара оламан.

(Кетади.)

Бургу товуши.

Альбани, Гонерилья, Регана, офицерлар
 ва солдатлар киради.

Альбани

Қаҳрамонлик кўрсатдингиз бугун сиз, жаноб.
 Ва тақдир ҳам сизга анча ёр бўлган эди:
 Душманлар ҳам қўлингизга асир тушдилар.
 Амримиз шу, асиirlарни бизга топшириинг,
 Биз уларнинг ҳуқуқлари, хавфсизлигимиз
 Ҳар икковин баб-баравар назарда тутиб,
 Кўрсатамиз лозим бўлган муомилани.

Эдмунд

Мен қиролни қамамоққа лозим деб топдим.
 Толесиз чол аллақаҷон қамаб қўйилди;

Унинг ёши, рутбасида гўё сеҳр бор.
Ана шулар халқнинг дилин тортиши мумкин.
Уз найзамиз ўзимизга қарши қўзғалур.
Шунинг учун малика ҳам бирга қамалган.
Сизнинг олий ҳукмнингиздан ўтмаклик учун
Бугун, әрта, ё кейинроқ келсалар мумкин.
Ҳозир жангнинг тери қони тўхтаганча йўқ.
Дўст ўлигин дўст қидирар майдон ичидা.
Жуда маъқул ва шарафли жанг бўлди, аммо
Жангнинг бутун фожиасин тотган кишилар
ЛАънат билан ёдламоқда бу ҳарбу зарбни.
Корделия ва қиролни ҳозир чақириб,
Суд қилмоқлик дуруст бўлmas, менинг фикримча.

Альбани

Афв этасиз, жаноб! Билинг, сиз ахири бизнинг
Амримизга бўйин эккан жангчисиз, холос.
Биз билан тенг ҳуқуқи бор биродар әмас.

Регана

Биз-чи, уни биродар деб ҳисоб қиласиз.
Бу тўғрида гапиришдан бир оз илгари
Бизлардан ҳам сўрамоқлик керак бўларди.
Жангга бизнинг қўшинларни у бошлаб кирди,
Қойилмақом бўлди менинг рутбам, шахсимга,
Демак, сизга биродар деб аталмоқ учун
Шу яқинлик унга тўла ҳуқуқ беради.

Гонерилья

Ховлиқаверма!
У ўзининг даражасин кўтармоқ учун
Сенинг меҳру шафқатингдан кўпроқ иш қилди.

Регана

Менга, менинг давлатимга ўринбосарлик
Уни олий мақомлар билан тенг қилур,

Альбани

Агар сизга уйланганда шундай бўларди.

Регана

Ҳазил чинға айланса-чи!

Гонерилья

Етади, бас қил!

Үз кўзингга ишонмагил, ғилай кўради.

Регана

Бир оз кўнглим айнаятти,— бўлмасам бекач,
Билар эдим, сизга боллаб айтар сўзимни.
Ҳой саркарда! Менинг бутун ҳокимиятим,
Қўшинларим ва асиirlар сеники бўлди.
Мен ўзим ҳам сеникиман ва давлатим ҳам.
Қўргон тамом топширилди, турганлар гувоҳ.
Бу кундан сўнг сен эримсан ва ҳукмронсан.

Гонерилья

Уни тамом сен эгаллаб олмоқчимисан?

Альбани

Ва ризолик бериш сенинг ихтиёрингмас.

Эдмунд

Ва сиздан ҳам ризоликни сўрамайдилар.

Альбани

Янглишасан, ҳой дурагай!

Регана (Эдмундга.)

Довул қоқдир! Даражангни элга эълон қил!

Альбани

Бир оз тўхта! Диққат билан қулоқ сол! Эдмунд,
Қамалгансан, айблисан, давлат хоини.

(Гонерильяни кўрсатиб)

Ялтираган бу илон ҳам сен билан бирга.
Сингилгинам, сиз Эдмундни эгаллаш учун
Қилаётган даъволарни бекор қиласман.
Хотинимнинг манфаатин кўзлашим керак.
У олдинроқ Эдмунд билан унашган экан.
Мен, эриман, демак, унинг ёнини олиб,
Сизнинг олиқ-солиқларни тақиқ қиласман.
Жуда ҳам эр кусайдиган бўлсангиз агар —
Мана, мени сева қолинг. Менинг хотиним
Бошқа билан ўз-ўзини унашиб қўйган.

Гонерилья

Лўттибозлик!

Альбани

Эдмунд, қилич ёнингдами? Айт, бурғу чалсин!
Агар сенинг тубан хоин эканлигингни
Исбот қилиб бермоқ учун бирор мард чиқиб
Сенинг билан қиличбозлик қилмаса, унда
Бу майдонга мен чиқаман,

(Қўлқопини ташлайди.)

Мана, гаровим!

Ва туз тотмай исбот қилиб бера оламан.
Сен бояги айтганимнинг ўзгинасисан.

Регана

Кўнглим озиб алланечук бўлаётибман.

Гонерилья

(бир чеккага.)

Бўлмасам-чи, заҳар кучин кўрсатади-да.

Эдмунд

(қўлқопни ташлаб.)

Мана гаров, қимки мени хоин демакка
 Журъат қилса, уни мутлоқ ўлим кутади!
 Бурғу чалсин! Журъат қилиб ушбу майдонга
 Ким чиқмасин, ўша билан, майли сиз билан
 Ўз номусим, садоқатим оқлаш йўлида
 Олишмоққа, жанг қилмоққа таппа-тайёрман!

Альбани

Ҳой, худайчини чақиринглар.

Эдмунд

Худайчи қани, ҳой худайчи!

Альбани

Лекин қара, фақатгина ўзингга ишон-а,
 Мен қўшинни уруш учун чақирган эдим,
 Яна битта фармон билан уни тарқатдим.

Регана

Ҳолим ёмон! Ҳамма ёғим оғриққа кирди!

Альбани

Мазаси йўқ. Олиб боринг дарров ҷодирга.

Регана чиқади. Худайчи киради.

Қел-чи, худайчи. Айт-чи, қани бурғу чалсинлар.
 Уни ўқи.

Офицер

Чалинг!

Бурғу чалинади.

Худайчи

(ўқийди.)

«Қўшин ичида бўлган рицарлардан ёки даражали одамлардан кимда-ким Эдмунд, яъни ўзини граф Глостер атаб юрган кишининг каттақон хиёнаткор эканини исбот қилиб беришни истаса, бурғулар уч марта чалингандан сўнг майдонга чиқсин. Эдмунд, яъни ҳариф у билан учрашишга тайёр».

Эдмунд

Бурғу чалинсин!

Бурғу бир марта чалинади.

Худайчи

Яна!

Бурғу иккинчи марта чалинади.

Яна!

Учинчи марта чалинади.

Саҳна орқасидан жавоб бургуси чалинади.

Тамоман ҳарбийча кийинглан Эдгар чиқади.

Унинг олдида бурғучилар.

Альбани

Сўра ундан, нима керак ва нима учун
Бурғу билан чақириқقا у етиб келди?

Худайчи

Ўзинг кимсан? Отинг нима? Даражанг нима?
Нима учун бу талабга майдонга чиқдинг?

Эдгар

Бир оз туриб ҳаммасини билиб оласиз
Менинг номим бир хиёнат сабаби билан

Нобуд бўлган, унугилган, йўқолиб кетган.
 Аммо ўзим аслзода бир киши бўлиб,
 Насабимда душманимдан қолар жойим йўқ,
 Уша билан олишмоққа майдонга чиқдим.

Альбани

Айт-чи, сенинг душманинг ким?

Эдгар

Душманим Эдмунд.
 Гўё граф Глостер деб аталган киши.

Эдмунд

Уша менман. Нима дейсан?

Эдгар

Қиличингни ол:

Агар сенинг шарафингни ўринсиз сўксам
 Қўлинг билан ўч олишга тамом ҳақлисан.
 Мана менинг қиличим ҳам қўлимда тайёр.
 Менда бўлган паҳлавонлик — рицарлик номи
 Ва шарафим ушбу ерда товушим борича
 Эълон қилиб қўйишинга беради ҳуқуқ.
 Сен шу кучу ёшлик, улуғ рутбангга боқмай,
 Қилич каби кескирлигинг, мардоналигинг
 Шу биринчи ғалабанг-у зўр жасоратинг
 Барчасига боқмай туриб — катта хоинсан!
 Сен тангрига, ўз отангга, туққан акангга
 Зўр хиёнат қилган киши ва герцогга ҳам
 Орқаворат суиқасдлар тайёрлагансан:
 Сен бошиндан то оёғинг товонигача
 Оёқ босган ерингдаги тупроқларгача,
 Ола танли чўл қурбақа каби хоинсан.
 Иўқ десанг-ку, инкор қилсанг, мана қиличим,
 Қўлда кучим, юрагимда жасорат билан
 Уз сўзимни исботлашга тайёр турибман.

Эдмунд

Елғон айтасан!

Мен отингни сўрашлигим керак бўлса ҳам,
Мардлигингдан, ғурурингдан ва сўзларингдан
Жуда равshan кўринмоқда олган тарбиянг.
Ва рицарлик қонунича бу тўқнашувни
Бошқа галга қолдиришга ҳаққим бор, аммо
Мен бу ҳақдан жирканаман, инкор қиласман.
Менга қўйган айбларингни қайтиб бераман.
Сен дўзахи ёлғон билан қалбимни ўртаб
Мени мажруҳ қилмоқчийдинг, шундай бўлмади.
Энди эса қўлимидаги мана шу қилич
Кўкрагингдан бир умрга жойин топади.
Қани, чалинг бурғуларни.

(Улар олишадилар. Эдмунд ииқилади.)

Бурғулар чалинади.

Альбани

Тамом ўлдирма!

Гонерилья

Глостерим, алдадилар, бунда алдов бор:
Сен номаълум душман билан чакки олишдинг.
Бу навбат сен заррача ҳам енгилганинг йўқ,
Балки тубан алдовларнинг қурбони бўлдинг.

Альбани

Сиз хап бўлинг. Бўлмаса-чи ушбу хат билан
Бўғзингиздан бўғиб қўйиш жуда ҳам осон.

(Эдмундга)

Ол, ярамас! Ўз тубанлик номингни ўқи!

(Гонерильяга)

Йирта кўрманг! Бу хат сизга танишдир?

Гонерилья

Шундай бўлса нима бўпти! Ҳўкмдор манман.
Сен эмассан! Мени ким ҳам тергай олади?

Альбани

Ёвуз махлук! Сен бу хатни танигандирсан?

Гонерилья

Нималарни билишимни мендан сўрама.

(Чиқади.)

Альбани

(бир офицерга)

Орқасидан кузатиб бор. Ҳаёли бузук.

Офицер чиқади.

Эдмунд

Менга қандай айб қўйсангиз, барчаси тўғри,
Ҳаммасини, ҳатто ортиқ гуноҳлар қилдим.
Вақти келиб биттаси ҳам қолмай фош бўлар.
Бу ишларга ва ўзимга энди хотима!
Лекин кимсан, мендан ғолиб чиқсан эй йигит?
Аслзодалар авлодидан бўлсанг — кечирдим.

Эдгар

Яхшиликнинг жавоби ҳам яхшилик бўлур.
Менинг қоним сеникидан паст эмас, Эдмунд.
Қонимнинг шу тозалиги, аслзотлигим
Сени баттар жиноятчи қилиб қўйганлар.
Билмак бўлсанг сенинг аканг, Эдгар бўламан.
Адолатли парвардигор, ширин гуноҳнинг
Лаззатларин аввал бизга тотқизиб қўйиб,
Кейин шунинг ўзи билан жазо беради.

Сен яширин учрашувдан туғилганинг-чун
Мана отанг икки кўздан ажраб турибди.

Эдмунд

Гапинг тўғри, сен ҳақлисан! Омадим чархи
Чаппасига айланди-ю, мени мағлуб бўлдим.

Альбани

Қиёғангдан маълум эди аслзотлигинг.
Кел, бир қучай. Отанг билан сени севмаклик
Менинг учун бир баҳт ўзи.

Эдгар

Буни биламан.

Альбани

Шу топгача қаерларда яширингган эдинг?
Отанг тортган кулфатларни қаердан билдинг?

Эдгар

Кулфатига шерик эдим. Қисқаси шуки,
Ҳикоямни бошдан-оёқ айтганимдан сўнг
Ҳатто қалбим портлаб кетса парво қилмайман!
Қонли ўлим ҳукми чиққан орқаворотдан
Бир амаллаб қутулишнинг пайига тушдим,
(Биласиз-ку, жон кўп ширин, одамзод деган
Бир ўлимдан қочаман деб минг марта ўлар.)
Ҳатто итлар ҳазар қилган қўсқилар кийдим.
Шу орада отам билан учрашиб қолдим.
Икки қонли кўз чаноги бегавҳар эди.
Кўр отамга етакчилик қилиб тиландим,
Алдаб-сулдаб тентаклиқдан омон сақладим.
Аммо, аттанг, ўз-ўзимни ошкор қилмадим.
Фақат бундан ярим соат чамаси бурун
Шу жанг учун яроғ, совут тақар эканман,
Шу муқаррар ғалабага унча ишонмай,

Фотиҳасин олар чоғи кимлигим айтдим.
 Азиятлар ўртаб кетган унинг юраги
 Шодлик билан қайгуларнинг тўқнашувига
 Дош беролмай портлаб кетди табассум билан.

Э д м у н д

Гапинг билан юрагимга тегиб ўтолдинг,
 Яхшилиқдан нишонадир. Давом этавер,
 Яна бир гап демоқчисан, кўриб турибман.

А ль б а н и

Тагин-тагин ғусса бўлса, айтма, керакмас.
 Шу гапларни эшишибоқ тоқатим тугаб,
 Уввос тортиб йиғламоққа тайёр турибман.

Э д г а р

Бу гап тўғри, қайгуларни севмас кишига
 Ҳикоямнинг шу қисми ҳам кўплик қиласди.
 Эндини ҳалигача айтганларимдан
 Ҳаддан зиёд қайгулироқ ва ғуссаларироқ.
 Мен отамнинг тепасида ўлтирар экан,
 Битта киши келиб қолди. Бундан илгари
 Мени гадо аҳволида кўриб қочганди.
 Энди эса, кимлигимни билиб қолди-ю,
 Фигон билан қучоқлади, қўкни титратиб,
 Ва отамнинг жасадига ўзин ташлади...
 Сўнгра қирол Лир ҳақида, ўзи ҳақида,
 Қон йиғлатиб ташлайдиган достон бошлади.
 Айтган сари нолалари авжига чиқиб,
 Ҳаёт тори бирин-бирин узилар эди.
 Шу маҳалда бирданига бурғу чалиниб
 Уни беҳуш қолдирганча бу томон чопдим.

А ль б а н и

Ким экан у?

Эдгар

У Кент эди, қувринди Кент, жаноби олий,
 Қирол уни ёмон кўриб қолган бўлса ҳам,
 Қийим-бошин ўзгартириб, хизмат қиласади,
 Сотиб олган қул ҳам бунча хизмат қилолмас.

Бир сарой кишиси қўлида қонли пичоқ билан чопиб
 киради.

Сарой кишиси

Ёрдам беринг! Ёрдам беринг!

Эдгар

Қанақа ёрдам?

Альбани

Тезроқ гапир!

Эдгар

Пичоқ қон-ку, бу нима бўлди?

Сарой кишиси

Қоннинг ҳовури бу пичоқдан ҳали кетган йўқ.
 Ўзи ўлди, юрагидан сұғуриб олдик.

Альбани

Үлган кимди, тезроқ айтсанг-чи!

Сарой кишиси

Хотинингиз, жаноб олий, ўз хотинингиз!
 Шундан олдин синглисига заҳар берибди,
 Улаётиб иқрор қилди ўз оғзи билан.

Эдмунд

Икковига оламан деб ваъда бергандим,
 Учовлашиб тўй-томуша қиласиз энди.

Э д г а р

Кент ҳам келди.

А л ь б а н и

Хоҳ ўликдир, хоҳ тирикдир, бунда келтилинг.

С а р о й кишиси кетади.

Биз худонинг ғазабидан чўчиймиз, холос,
Бу гапларни кўравериб дийдамиз қотган.

К е н т киради.

Кент келди-ку аммо уни бизлар шу топда
Ҳурмат билан қаршилашдан андак ожизмиз.

К е н т

Келишимдан мақсад шуки, қиролни топиб
Хайрли кеч — алвидони айтмоқчи эдим.
Шу ердами?

А л ь б а н и

Зарур гапни унугибмиз-ку —
Эдмунд, айт-чи, қирол билан қизи қаерда?

Регана билан Гонерильянинг жасадларини
олиб кирадилар.

Сен буларни кўриб қўй, Кент!

К е н т

Бу нима бўлди!

Э д м у н д

Баракалла, Эдмунд шундай севимли эди.
Мен деб, опа ўз синглисин ҳалок этди-да,
Орқасидан ўзини ҳам ўлдирди-қўйди.

А л ь б а н и

Шундайликка шундай бўлди. Юзларин ёпинг.

Э д м у н д

Ҳаёт тамом. Гарчан бу иш феълимга зиддир
 Бир яхшилик қилиб қўяй сўнгги нафасда.
 Дарров, гездан турма томон одам юборинг.
 Корделия билан Лирни ўлдирмоқ учун
 Буйруқ бериб қўйган эдим,
 Кечикиб қолманг!

А ль б а н и

Чопинг тезроқ, чопинг дарров!

Э д г а р

(Альбанига)

Ким томон чопай?
 Қимга буйруқ берган эдинг, ким эди ўзи?
 Уша буйруқ бекор деган битта белги бер.

Э д м у н д

Яхши айтдинг. Қиличимни олиб бора қол,
 Офицерга кўрсатасан.

А ль б а н и

Жўна, уч, югур.

Э д г а р югуриб чиқади.

Э д м у н д

Мен, хотининг офицерга Корделияни
 Турма ичра осасан деб буюрган эдик.
 Кейин эса, аламидан ўзин осди деб
 Овоза ҳам тарқатишин топширган эдик.

А ль б а н и

Уни ўзинг омон сақла, парвардигорим!
 Буни олинг!

Эдмундни олиб кетадилар.
Кўлида Корделиянинг жасадини кўтарганича Лир, Эдгар,
офицерлар ва бошқалар қирәдилар.

Лир

Оҳ-воҳ тортинг! Узвөс тортинг! Тошдил одамлар,
Дарёларча ёш оқизган кўзим бўлсайди,
Осмонни қўпоргудай сўзим бўлсайди,
Ҳаёт қайда, ўлим қайда ажрата оламан,
Нафас олмай ётибди бу. Ер каби ўлик.
Битта кўзгу топиб беринг, қўйиб кўрамиз,
Агар кўзгу хираланса, демак, бу ҳаёт.

Кент

Нима гап, бу, охир замон бўлиб қолдими?

Эдгар

Ушанга ўхшаш.

Альбани

Барбодлик бу, ҳалокат бу!

Лир

Тирик экан! Мана бу пар қимиirlаб кетди.
Оҳ, агарда шундай бўла қолганда эди,
Бу жаҳонда тортиб ўтгани қайғу-кулфатим
Бирваракай унут бўлиб кетган бўларди.

Кент

(Тиз чўкиб)

Э бечора, шаҳаншоҳим...

Лир

Иўқол, нари бор.

Э д г а р

Бу Қент ахир, ўз дўстингиз!

Л и р

Сиз ҳоинлар, сиз қотиллар! Вабога учранг!
Уни олиб қолар эдим... ҳалал бердингиз,
Улиб қолди! Корделия, Корделия,
Мунча шошасан!

А, нимади? Нима дединг? Унинг овози
Хотинликнинг латофати анқиб тургувчи
Жуда ювош, жуда нозик, мулойим эди.
Қизгинамни дорга осган қулвацчани-чи,
Мен ўлдирдим.

О ф и ц е р

Тўғри, уни ўлдириб қўйди.

Л и р

Үлдирдим-а, ўлдирганим рост а, кўрдинг-ку?
Бир замонлар қўлимдаги кескир қиличим
Бундайларни йўргалашга мажбур қиласарди.
Қариб қолдим, бу жафолар чарчатиб қўйди.
Ўзингиз ким? Танирдим-ку кўзларим хира.

Қ е н т

Агар тақдир бу жаҳонда икки кишини
Емон кўриб ғурбатларга йўллаган бўлса,
Ушаларнинг биттаси ман.

Л и р

Бу ерда анча қоронғироқ. Қент эмасмисан?

Қ е н т

Худди ўша, сизнинг содиқ дўстингиз Қентман,
Бир Қай деган хизматчингиз бўларди, қани?

Л и р

Сизга айтсам, кўп ажойиб бир йигит эди,
Қўрқмас жангчи. Ўлиб кетди, ҳозир тупроқда.

К е н т

Йўқ, шаҳанишоҳ, ўша киши мен эдим, ахир.

Л и р

Биз бу гапни текширамиз ва аниқлаймиз.

К е н т

Бошингизга шу жафолар тушгандан буён
Орқангиздан ҳамроҳ эдим ғусса йўлида.

Л и р

Сени кўрсам қувонаман.

К е н т

Бошқа ҳеч ким. Бу ерда-чи, теварак-атрофда
Ғусса, зулмат, ўлимгина ҳукмрон, холос.
Икки катта қизингиз ҳам мудҳиш аҳволда.
Ўлиб бўлди.

Л и р

Тахминимча шундай бўлибди.

А л ь б а н и

Ўзи нима деганини англамайди ҳам,
Унга бўлган мурожаат тамом ўринисиз.

Э д г а р

Тўғри, ўринисиз.

Б и р օ ф и ц е р қ и р а д и .

Офицер

Эдмунд ўлди.

Альбани

Үлса ўлар, бизга нимади?
 Биродарлар, жаноб лордлар! Қароримиз шу:
 Жафо тортган шўрликларга қўлдан келганча,
 Нима ёрдам лозим бўлса қилиб кўрамиз.
 Шу улуғвор мўйсафиднинг тирик чоғида
 Мамлакатнинг бор ҳукмини унга берамиз.

(Эдгар билан Кентга)

Сизга эса, шунча қилған яхшилигингиз —
 Ҳурмати-чун бутун ҳуқуқ ва рутбангизни
 Қайтарамиз, устга-устак ошиги билан.
 Сиз мукофот қадаҳини нўш этинг, дўстлар,
 Душманимиз заҳар ютсин.

Ия, қаранглар!

Лир

Осилдингми, шўрлик болам... ҳаётинг йўқми!
 Нега ахир итлар, отлар ва каламушлар
 Яшайди-ку сен бечора нафас олмайсан?
 Яна қайтиб келмайсанми, энди ҳеч қачон?
 Ҳеч қачон-а! Ҳеч қачон-а!
 Шу еримнинг тугмасини ечиб юборнинг...
 Раҳмат сизга, кўряпсизми?
 Унга бир қаранг;
 Кўрсангиз-чи... лабларига... қарасангиз-чи...
 Қарасангиз-чи...

(Улади.)

Эдгар

Шаҳаншоҳим! У ҳушини йўқотиб қўйди.

Кент

Юраккинам, ёрилсанг-чи!

Эдгар

Хукмронимиз!

Кент

Қўй, руҳига озор берма. Малол чекмасдан
Дунё билан видолашсин.
Унга энди яшамоқнинг мashaққатини
Душмангина раво кўрар.

Эдгар

Улди.

Кент

Мудҳиш хаёл каби бўлган узун ҳаётни
Мўъжизадай чидам билан яшаб тугатди.

Альбани

Уликларни олиб чиқинг! Бизлар ҳам энди
Бу умумий қайғуларга чора ўйлаймиз.

(Эдгар билан Кентга)

Энди сизлар, жонга яқин қадрдонларим,
Мамлакатнинг идорасин қўлга олингиз.
Ва давлатнинг ярасига малҳам қўйингиз.

Кент

Йўқ, мен тездан узоқ йўлга жўнаб кетаман:
Қиролимиз чақирмоқда — унга етаман.

Эдгар

Мотам тутинг, мунг ҳиссига итоат қилинг!
 Ҳеч ким жафо тортмагандир бу кексага тенг.
 Биз ёшлар-чи, балки шунча яшамасмиз ҳам,
 Балки бизнинг бошимизга келмас шунча ғам.

Ҳаммалари мотам марши остида чиқиб кетадилар.

Парда,